

Xwiyá yayí neainariņí Jono eaņípirini.

Ríwamiņí ripi “Xwiyá yayí neainipaxí Jono eaņípiyi” riniņípirini. O Jisaso wiepisagowa worini. Xewaniņo náni niriri nearíná yumí “Wiepisariņí Jisaso diņí sixí uyiņoyí” niriri eaņorini. O Jisaso rixa nipémáná niwiápínimeámi aņínami náni nipeyimáná eņáná ámi xwiogwí aga obaxí niþwémáná eņáná ríwamiņí ripi eaņíri. Ámá “Gorixo arire imóniņoriani?” yaiwiaríná Jisaso riri eri eņípimi dáni niĵá imónířixiniri niriri eaņíri. “Ói Gorixo tíáminíniņí iniyíyi Jisasoriani?” niyaiwiro diņí niwikwíroriņípimi dáni diņí niyimiņí imóniņípi tígiáyí eni imónířixiniri niriri eaņíri.

Xwiyáoyi riniņo ámá imóniņípi nánirini.

1 ¹Iwamíó xwía riri sini meĵáná Xwiyáoyi riniņo íná ŋweaņíri. O Gorixo tñi nawíni niņweari o tñi xixeni imóniņíri. ²Aga iwamíó dáni Gorixo tñi ŋweaġíforini. ³O Gorixo neriņípimi dáni amípí imóniņí niþini imóniņíri. Pí pí imóniņípi wí xegípi mimóní xío neriņípimi dánini imóniņíri. ⁴O diņí ámá amípí siņí imóninía náni tíņorini. Diņí o tíņípi, ayí ámáyo Gorixo imóniņípi náni wía wókinía nánirini. ⁵Wía api síá yináriņe wía ónaríná síápi wí síá uyimixiņímani.

⁶Ámá wo —O wayí neameaiņí Jonoyi riniņorini. Gorixoyá xwiyá yaņí wiowáriņorini. Omi Gorixo urowárenapáná ⁷o ámá níni wía api náni ariá niwiro diņí ikwíropíri náni áwanġ uriminiri náni biņinigiņi. ⁸O ámáyo wía wókiariņomani. Sa wía wókiariņo náni áwanġ neariminiri biņorini.

⁹Aga nepa wía wókiariņo, ayí rorini. Xwía tíyo náni nibiríná Gorixo imóniņípi náni diņí mopíri náni wía wókímixiņorini. ¹⁰O xwía tíyo ŋweaņáná xwíárí tñi amípí tñi xío neriņípimi dáni imóniņí aiwi oxí apixí mí miwómixiġawixini. ¹¹O ámá xegí Judayí tíņí e náni úagi aiwi mumíminíġawixini. ¹²E neri aiwi ámá omi numíminiro diņí wikwíróiáyí niaíwí Gorixoyá oimóniþoyiniri siņwí winiņíri. ¹³Ayí niaíwí ámá emeaarigíá yapi imóniġámani. Apixí xirarigíá yapi imóniġámani. Ámáya diņíyo dáni eni imóniġámani. Sa Gorixoyá diņíyo dáni xegí niaíwíyí imóniġári.

¹⁴Xwiyáoyi riniŋo aga áamá nimóniri xwíá tíyo nene t́ni ɲweañána nene seáyí e o imóniŋípi aga xegí bi imóniŋagi winiŋwanigini. O, Gorixoyá siŋíniŋí émiaonŋo xío t́ni xixeni seáyí e imóniŋagi winiŋwanigini. Ámaéne wá ayá wí neawianariŋagi winiŋwanigini. Gorixo imóniŋípi nepa xixeni siwá neainariŋagi eni winiŋwanigini. ¹⁵O nání wayí neameaiŋí Jono áwanŋí niriríná wái re riŋinigini, “O nioni re riŋáorini, ‘Ríwíyo binío nioni sini meŋáná o xámi ɲweañagi nání nioni seáyí e nimónini.’ riŋáorini.” riŋinigini. ¹⁶Ayí ripi nání “Ámaéne wá ayá wí neawianariŋagi winirane Gorixo imóniŋípi nepa xixeni siwá neainariŋagi winirane eŋwanigini.” rariŋini. O wá nineawianiríná bi onimiápi mineawianí xwapí ayá wí nineawianiri arirá ámi ámi neaiŋírini. ¹⁷Ayí ripi nánirini. Moseso Gorixoyá diŋí t́ni ɲwí ikaxí niriri ríwamiŋí eanŋí eŋagi aiwi ayí Jisasi Kiraiso neaíwapiyiŋípi dání Gorixo wá neawianariŋípi nání niŋiá imónirane nepa xío imóniŋípi nání niŋiá imónirane eŋwárinini. ¹⁸Wafná aiwi Gorixomi áamá go siŋwí winiŋírini? E neri aí ɲwíá siŋíniŋí émiaonŋo —O ífná xanoyá sáŋyo ɲweañorini. Nene “Xano imóniŋípi apírani?” yaiwiani wíá neaókímixiŋírini.

Wayí neameaiŋí Jono xewaniŋo nání riŋípi nánirini.

¹⁹Judayí wí Jerusaremi dání re niyaiwiro, “Wayí umeaiariŋí Jono áamá Gorixoyá diŋí t́ni yeáyí neayimixemeanía nání aríowayá xwíá piaxíyo dání iwiaronífoyi rariŋwáoríani? Woríani?” niyaiwiro apaxípaniŋí imónigíá wa t́ni áamá Ripaiyi riniŋíyí wa t́ni —Ripaiowa aŋí Gorixo nání ridiyowá yarigíiwámi mewegíáwami saŋí uráparigíáwarini. Awa t́ni nuro Jonomi “Goxirini?” urípoyiniri uowáraná ²⁰awa nuro omi niwímearo yariŋí “Goxirini?” wíáná o yumí bi miwí waropárí niniri “Aga nepa searariŋini.” nuriri “Nioni áamá yeáyí seayimixemeanía nání Gorixoyá diŋí t́ni aríowayá xwíá piaxíyo dání iwiaronífoyi rariŋonimani. Kiraisoyi rariŋonimani.” uríagi ²¹awa yariŋí re wigíawixini, “Joxi ayí o meŋánáyí, goxirini? Joxi wíá rókiamoagi Eraijaoxirani?” uríagia o “Ayí nionimani.” uríagi awa “Joxi wíá rókiamoagi Isirerene xwayí naniri ɲweañwáoxirani?” uríagia o “Oweoi.” uríagi ²²awa “Joxi ‘Gonirini.’ simónarini? Áamá none nearowárenapiáyo áwanŋí uraniri rariŋwini. Jiwanixoxi píoi rinariŋini?” uríagia ²³o re uriŋinigini, “Nioni wíá rókiamoagi Aisaiwo riŋípi t́ni xixeni áamá diŋí meañe dání ríaiwá re rariŋáonirini, ‘Óí Ámináo nání pírániŋí wimoípoi.’ rariŋáonirini.” uríagi ²⁴awa —Parisiowa uowáráwarini. ²⁵Awa yariŋí re wigíawixini, “Joxi áamá yeáyí neayimixemearía nání aríowayá xwíá piaxíyo dání iwiaronífoyi rariŋwáoxi mimónipa eri wíá rókiamoagi Iraijaxi mimónipa eri wíá rókiamoagi nene xwayí naniri ɲweañwáoxi mimónipa eri eŋánáyí, pí nání ámányo wayí numeaiariŋini?” uríagia ²⁶Jono re uriŋinigini, “Nioni ámányo wayí numeairíná iniigí t́nini umeaiariŋáonirini. E neri

ái seyíné t́ni áwinimi roŋí wo soyíné siŋwí mí mómixíforini. ²⁷Ámá nioniyá ríwíyo binío náni rariŋini. Ámá nioni náni ‘Wé róniŋorini.’ niaiwiariŋagía aí o aga seáyi e nimóniŋagi náni oyá sikwí sú gwí wikweaipaxonimani.” uríŋinigi. ²⁸Jono iniígí Jodani rapáyo j́ariwámíni aŋí yoí Betani t́ŋí e wayí umeaiaríná niwímearo yariŋí api wígiawixini.

Jisaso sipisipí ridiyowá nániniŋí imóniŋí eŋagi nánirini.

²⁹Wayí neameaiŋí Jono, sá weŋo Jisaso xío t́ŋí e náni bariŋagi niwiniri re riŋinigi, “Sipisipí miá ridiyowániŋí ámá nineneni uyíniŋí yariŋwápi yokwarimí neaiinía náni Gorixo neaiapiŋo iworini. ³⁰O re riŋáorini, ‘Ámá nioniyá ríwíyo binío nioni sini meŋáná o ŋweaagi eŋagi náni nioni seáyi e nimóniŋorini.’ riŋáorini. ³¹Xámi nioni eni ámá nibiri yeáyí neayimixemeaníwiniŋiniri xwayí naniri ŋweaŋwáomi mí miwómixipa neri aiwi o náni gí Isireriyo wayí numeaiariŋíŋipi mí dáni wía urókiamómíniŋi biŋáriní.” riŋinigi. ³²Wayí neameaiŋí Jono Gorixomi xewaxo wímeaŋipi náni mko nimóniri áwaní re neariŋinigi, “Nioni kwíyí Gorixoyápi aŋínami dáni xawíówí yapi niweapiri omi xerŋweaagi winiŋanigini.” nineariri ³³re neariŋinigi, “Xámi nioni eni ámá nibiri yeáyí neayimixemeaníwiniŋiniri xwayí naniri ŋweaŋwáomi mí miwómixipa neri aiwi iniígí t́ni wayí numeaiia ouniri nirowárenapiŋo re niriŋinigi, ‘Ámá joxi kwíyí niweapiri wímeaagi winirío náni diŋí re yaiwíríxini, ‘Ámáyo wayí numeairíná kwíyí t́ni numeairi sixí umímonío, ayí oráni?’ yaiwíríxini.’ niriŋinigi. ³⁴Gorixo niriŋipi t́ni xixeni niwaníŋoni omi siŋwí niwiniri náni nímeaŋipi náni míkoni ‘O niaíwí Gorixoyáorini.’ searariŋini.” neariŋinigi.

Wiepisariŋí waú waú awami niwirimeáa uŋí nánirini.

³⁵Wayí neameaiŋí Jono, sá weŋo wíápi t́ni xegí wiepisariŋí waú t́ni nawíni éí niororíná ³⁶weniŋí éyí winiŋinigi. Jisaso aŋí wariŋagi niwiniri re riŋinigi, “Sipisipí miá ridiyowá náni Gorixo neaiapiŋo iworini.” riagi ³⁷wiepisariŋowá Jono e riagi aría niwiri Jisasomi númi waríná ³⁸o nikinimóniri winiŋinigi. Awaú númi bariŋagí niwiniri re uríŋinigi, “Pí yaniri númi nibariŋí?” uríagi awaú re urígísixini, “Rabai —Negí agapíne niriŋíná ‘Nearéwapiyariŋoxirini.’ rariŋwápirini. Rabai, joxi aŋí giwámi wearíŋirini?” uríagi ³⁹o re uríŋinigi, “Awagwí nibiri siŋwí winípiyi.” uríagi awaú t́ni nuro aŋí xío wearíŋiwá siŋwí niwiniri rixa síapi t́ni 4:00 p.m. imóniŋagi náni síá ayi o t́ni e sá wegíawixini. ⁴⁰Wayí neameaiŋí Jono Jisaso náni riagi aría niwiri númi úfíwaú wío Adiruorini. O Saimoni Pitaomi xexirímeáorini. ⁴¹O xámi nuri xexirímeáo Saimono náni píá neri re urémeaŋinigi, “Yawawi ámá negí Xibíruyí píne t́ni Mesaiaoyi rariŋwáo —O ámá yeáyí uyimixemeanía

náni aríowayá xwíá piaxíyo dáni iwiaroníoyi rarigíorini. Kiraisoyi eni riniñorini. Omi rixa siñwí winimeáwii.” nurimi ⁴²niwirimeámi Jisaso tñj e náni nuri wímeáána Jisaso omi siñwí agwí niwiniri re uriñinigini, “Joxi Jonomi xewaxoxi Saimonoxirini. Ríná dáni yoí Sipasoxi —Yoí api Girikiyí píné niriríná Pitaoyi rarigíápirini. (Yoí míkípi síñái rinini.) Yoí Sipasoxi riripíráoi.” uriñinigini.

Piripo tñni Nataniero tñni nánirini.

⁴³⁻⁴⁴Jisaso, sá weño wíápi tñni Gariri piropenisíyo náni uminiri neríná ámá womi —O Piripoyi riniñorini. Anj yoí Betisaida dánjorini. Anj api ayí Adiruo tñni Pitao tñni eni anj apimi dánjowaurini. Jisaso Piripoyi riniñomi niwímeari “Joxi nixídei.” uríagi ⁴⁵Piripo nuri xegí ámá womi —O xegí yoí Natanieroyi riniñorini. Omi niwímeari re uriñinigini, “Ámá Moseso eníná niriri ríwamiñj eari wíá rókiamoagíáwa niriro ríwamiñj earo egí rixa siñwí winimeáwini. O Nasareti dánj Josepomí xewaxo Jisatorini.” uríagi ⁴⁶Nataniero ámá Gorixo Isireriyi yeáyí uyimixemeanía náni uowárenapínfo náni re uriñinigini, “Joxi re riyaiwiarini, ‘Nasareti dáni nene ayá síwí nearopaxí imóniñj bi imónipaxíri.’ riyaiwiarini?” uríagi Piripo re uriñinigini, “Joxi nibiri siñwí winei.” nurimi nuri Jisaso tñj e baríná ⁴⁷o Nataniero bariñagi niwiniri o náni re riñinigini, “Isireriyí wo ámáyo yapí bi miwíwapiyariño iworini.” ríagi ⁴⁸Nataniero ududí niwiniri re uriñinigini, “Arige neri joxi nioni náni nijá imóniñj?” uríagi Jisaso re uriñinigini, “Piripo sini ríaiwá miriripa éimi joxi íkíá pikínami íkwapiñíyo ñweañáná siñwí raníanigini.” uríagi ⁴⁹Nataniero re uriñinigini, “Nearéwapiyariñoxini, joxi niaíwí Gorixoyáoxirini. Isirerene negí mixí ináyoxirini.” uríagi ⁵⁰Jisaso re uriñinigini, “Nioni ‘Joxi íkíá pikínami íkwapiñíyo ñweañáná siñwí raníanigini.’ riríagi náni joxi ‘Gorixomi xewaxoríani?’ niniaiwiri diñj rinikwíroarini? Nioni apimi seáyí e imóniñj bi yariñagi siñwí naniríarini.” nuriri ⁵¹omi re uriñinigini, “Aga nepa seararini. Anjínami dáni óf ináná Gorixoyá anjínají ámá imóniñáoni tñj e náni yiri weapiri yariñagía siñwí winipíríarini.” uriñinigini.

Aga iniigí iniigí wainí oimóniri imixiñj nánirini.

2 ¹Síá wíyáú pwéáná Gariri piropenisíyo anj bi xegí yoí Kenai riniñipimi ámá wo apixí meariñagi náni aiwá api nimixiro yaríná Jisasomi xinái anj ayo ñweañáná ²omi tñni xegí wiepisariñowami tñni urepearíá enjagi náni awa eni nibiro ñweañáná re enjinigini. ³Ámá aiwá api náni awí eáníáyí iniigí wainí nñni nowáraná Jisasomi xinái re uriñinigini, “Íwe, wainí nñni rixa nowáráoi. Bi sini miwenini.” uríagi ⁴Jisaso re uriñinigini, “Ineyi, jíxi nioni pí oeniri nirarini? Nioniyá enj eániñj síñáni imóniniyí rínámani.” uríagi ⁵xinái ámá aiwá nixero yanj

wiarigiáwami re uriñinigini, “O pí pí searíyí xixeni xídipoyi.” uríagi ⁶Jisaso síñá tñi xwárá sixí imixiniñí wé wíumi dání wo —Apí wáni wáni iwajíá neríná 100 ritá iwajíá epaxípirini. Judayí wigí yarigiápi tñi xixeni neríná Gorixoyá siñwíyo dání amipí wé rónigiá imónaniro igwíá wímoarigiápa yaniri yarigiápirini. Jisaso sixí wé wíumi dání wo apí wenagi niwiniri ⁷ámá aiwá yaní wiarigiáwami re uriñinigini, “Iniigi niwiro iwajíá neríná magwí époyi.” uríagi awa aga iniigi iwajíá neróná magwí imimí yáraná ⁸o awami re uriñinigini, “Xwárá sixí tíyo dání niwiro nimeámi nuro seáyí wiarigióyíné seáyí e seaimóniñomi mini wípoyi.” uríagi awa nimeámi nuro mini wíaná ⁹seáyí wiarigiáwami bosí umieariño aga iniigi rixa wainí imónípi gígí neri —O awa iwíe nání majíá neri aiwi aiwá yaní wiarigiáwa nijíárini. O gígí neri apixí meariñomi “Eini.” nuriri ¹⁰re uriñinigini, “Ámá nñi iniigi wainí yaní niwia nuróná re yarigiárini. Xámi awiaxípi yaní niwia núisáná ámá wainí apí rixa ninimáná eñáná naní onimiápi imóniñipi yaní niwia warigiárini. E yarigiá eñagi aiwi joxi e méini. Joxi xámi wainí naní imóniñipi yaní nineaiapiri aiwi wainí aga awiaxípi yómiñí nimeri agwini neaiapariñini.” uriñinigini. ¹¹Jisaso Gariri piropenisíyo aní Kenayo niñwearíná emimí apí iwamíó niwíwapiyiriniñipi dání eñí eániñí xío imóniñipi siwá winaríná xegí wiepisariñowa siñwí niwiniro diñí wikwírogiawixini.

¹²E nemo aní xegí yoí Kapaneami riniñipimi nání niweri xegí xináí tñi xexirímeáowa tñi xegí wiepisariñowa tñi eni nawíni niwero e síá árñí wí wegíawixini.

Jisaso aní ridiyowá yarigiáwami nipáwiri eñipi nánirini.

¹³Jisaso síá Añínajo Neamúroagoi riniñiyi anwi e imóniñáná Jerusaremi nání niyoari ¹⁴aní ridiyowá yarigiáwami ákiñáyo nipáwiri weníñí éfyí winiñinigini. Nigwí nání wa burimákaú bí ero sipisipí bí ero xawíowí bí ero yariñagía niwiniri nigwí senisí wiarigiáwa eni éí niñwearo yariñagía niwiniri re eñinigini. ¹⁵Sámí nimeari sikwíá niyírearíná sipisipí tñi burimákaú tñi mixí xídowná riri xiáwowami eni mixí xídowná riri nigwí senisí yarigiáwayá nigwípi nimeari emi noyaximori wigí ikwianwí eni miwiárori nemáná ¹⁶xawíowí bí yarigiáwami mixí re uriñinigini, “Nimeámi úpoyi. Aní gí ápoyá riwá makeríá aniwániñí pí nání imixariñoi?” uríagi ¹⁷xegí wiepisariñowa Bikwíyo ríwamiñí re niriniri eániñipi nání diñí winiñinigini, “ ‘Ápoxiniyá aniwámi pírániñí érixiniri sími nixeadípeniriñipimi dání miyíoyo uríkwínariñini.’ nimónarini.” niriniri eániñipi nání diñí winiñinigini. ¹⁸Judayí ámináowa Jisaso éipi siñwí niwiniro mixí re urigíawixini, “Nene ‘E epaxoríani?’ siaiwiani nání emimí bí rixa rineaiwapiyariñini?” uríagi ¹⁹Jisaso re uriñinigini, “Soyíné aní riwá pineápoyi. E nerínáyí, nioni ámi síá wiyáú wiyimi mirimíárini.” uríagi ²⁰Judayí ámináowa re

urigiawixini, “None aŋi riwá miraríná xwiogwí 46 neamúroŋiwárini. Joxi anani síá wiyáú wiyimi miripaxoxirani?” uríagía aiwi ²¹o e nuriríná ewayí ikaxí xewaniŋo náni niriri e uriŋinigini. ²²Ayináni ríwéná Jisaso Gorixoyá diŋŋyo dání piyí weje dání niwiápínimeámáná eŋáná wiepisariŋowa ewayí ikaxí xío aŋiwá náni uriŋiŋipi náni diŋŋ niwiniri “Bikwíyo xío náni niriniri eániŋipi t́ni xwiyíá xío riniŋipi t́ni neparini.” niyaiwiro diŋŋ wikwírogiawixini.

**Jisaso ámá níni xwioxíyo dání yaiwiarigiápi
náni niŋiá imóniŋi nánrini.**

²³Síá Aŋínajo Neamúroagoi riniŋiyi náni aiwá imixarigiíná Jisaso sini Jerusaremi niŋwearíná emimí yariŋagi ámá obaxí e ŋweagiáyí siŋwí niwiniro omi diŋŋ niwikwíro apaxí mé “Oríani?” yaiwiarigaŋía aiwi ²⁴xewaniŋo nepaxiŋo nimóniri siŋáni “Onirini.” niriri áwanŋi mirowiároŋinigini. O ámá níni yariŋiápi náni niŋiá imóniŋo eŋagi náni áwanŋi mirowiároŋinigini. ²⁵Ámá wigí yaiwiarigiápi xwioxíyo adadí niwiri niŋiá imóniŋo eŋagi náni wí ámá nibiro api náni áwanŋi uripaxomani.

Jisaso t́ni Nikodimaso t́ni xwiyíá riniŋi nánrini.

3 ¹Ámá wo —O xegí yoí Nikodimasoyi riniŋorini. Gwí mónigiá yoí Parisiyi riniŋiyí worini. Axo Judayí mebá worini. ²O síá wiyimi árwíyimi nuri Jisasomi niwímeari re uriŋinigini, “Rabai, ‘Joxi nearéwapiyariŋi Gorixo rirowárenapiŋoxi imóniŋini.’ neaimónarini. Gorixo diŋŋ mukikayonáná ámá wo emimí joxi yariŋipi epaxí mimóniŋagi náni rariŋini.” uríagi ³Jisaso re uriŋinigini, “Aga nepa rirariŋini. Ámá giyí giyí seáyimi dání meweapa nerínáyí, Gorixoyá xwioxíyo wí ŋweapíríá menini.” uríagi ⁴Nikodimaso re uriŋinigini, “Ámá go go rixa xwé niwiarómáná arige neri ámi eweaniŋoi? ‘Ámi xináyá agwíyo páwíáná omi ámi siŋi xinái xiripaxírini.’ niriri rinirariŋini?” uríagi ⁵Jisaso re uriŋinigini, “Aga nepa rirariŋini. Ámá iniigíyo dání eweari Gorixoyá kwíyíyo dání eweari mepa nerínáyí, wí Gorixoyá xwioxíyo nipáwiri ŋweapaxí menini. ⁶Xaniyaúmi dání xirarigiápi, ayí warápinirini. Kwíyíyo dání imónariŋipi, ayí diŋŋ siŋi imóniŋipirini. ⁷Nioni re riríápi náni, ‘Joxi “Gorixoyá xwioxíyo ŋweáimigini.” nisimóniríná wí seáyimi dání ewearípi nimúropaxímani.’ riríápi náni ududí misinipani. ⁸Imiŋi yariŋipi náni diŋŋ moi. Imiŋi xegí wimónariŋimani yaríná joxi iwí rariŋagi aríá niwiri aiwi gimi dání bíŋpirani, gimi náni úŋpirani, joxi niŋiá imónariŋimani. Niŋiá mimónipa neri aiwi ‘Imiŋi menini.’ ripaxímani. Kwíyí eni axípi imónini. Ámá siŋi ewearíná siŋwí winipaxí mimóniŋagi aiwi ‘Siŋi meweáiyírini.’ ripaxí menini.” uríagi ⁹Nikodimaso re uriŋinigini, “Joxi nirariŋipi arige

neri imónipaxírini?” uríagi ¹⁰Jisaso re uriniginini, “Joxi áminá negí Isirerene nearéwapiyariñí woxi enjagi aí nioni rirariñápi náni majíá rimóniñini? ¹¹Aga nepa rirariñini. None niñíá imóniñwáyí náni rirane siñwí winiñwáyí náni áwaní rirane yariñagwi aiwi píné none rariñwáyí soyiné aríkwíkwí yariñoi. ¹²Amipí xwíá rirími imóniñyí náni áwaní searána soyiné ‘Neparini.’ niyaiwiro diñí mikwíropa yariñagía náni amipí anínami imóniñipi áwaní nisearirínáyí, arige nero ‘Neparini.’ niyaiwiro diñí ikwíropíráoi? ¹³Ámá imóniño —O anínami dáni weapiñorini. O ámá niyoni aiwi oni anínami náni yinorini. ¹⁴Eníiná negí aríowa ámá diñí meañe nemeróná ámá weaxíá sidiñí óyíy siñí upíría náni Moseso ainixí tñi weaxíániñí nimixiri íkíáyo niñwirárimáná seáyí e míeyoáipi siñwí niwiniriñipimi dáni siñí ugiáwixini. Ainixí weaxíániñí imixiniñipi niñwiráiro míeyoagiápa ámá imóniñomi axípi numíeyoapírírini. ¹⁵Ámá omi diñí wikwírófá giyí giyí diñí niyimiñí tígíáyí imónipíría náni omi numíeyoapírírini. ¹⁶Ayí ripi nánirini. Gorixo ámá niyoni diñí sixí xwapí ayá wí nuyiri náni xegí niafwi siñíniñí émiaonjo nene náni wírenapiñiginini. Ámá xewaxomi diñí wikwírófá giyí giyí manínipa nero diñí niyimiñí imóniñipi tígíáyí imónipíría náni wírenapiñiginini. ¹⁷Ayí ripi éwiniginiri Gorixo xegí xewaxomi xwíá rirími náni urowárenapiñiginini. O ámáyo xwiyíá umeárfwiniginiri murowárenapiñiginini. Yeáyí uyimixemeanfwiniginiri urowárenapiñiginini. ¹⁸Xewaxomi diñí wikwírófá giyí giyí Gorixo xwiyíá umeáripaxí mimóniñoi. E neri aiwi xewaxomi diñí miwikwírófá giyí giyí Gorixoyá siñíniñí émiaonjomi diñí miwikwíroarigíá enjagi náni rixa xwiyíá umeáripaxí imóniñoi. ¹⁹Sa míkí tíyo dáni Gorixo ‘Xwiyíá tíñoxini.’ uriri ‘Xwiyíá mayoxini.’ uriri eníárini. O xwíárimi ñweagiáyí e éfrixiniri wimónariñipi wíániñí wókíagi aiwi ámá wigí yarigíápi sipíni imóniñí enjagi náni wíá ókiñipi náni miwimónipa neri síá yiniñipi náni wimónariñírini. ²⁰Ayí ripi náni ámá sipíni yarigíáyí níni wíá ókiñipi náni aga miwimóní síá yiniñipi náni wimónariñírini. Wigí yarigíápi wíá ókímixinaniginiri wíá ókiñe náni barigíámani. ²¹E neri aiwi ámá yadimiñí yarigíá giyí giyí Gorixo wimónariñipi oeminiri aríá niwiri yariñipi siñáni oimóniri wíá ókiñe náni anani barigíárini.” uriniginini.

Wayí umeaiñí Jono Jisaso náni riñipi nánirini.

²²E nemáná Jisaso tñi wiepisariñowa tñi Judia piropenisíyo náni nuro wí e awa tñi nawíni niñwearóná ámáyo wayí numeaia waríná ²³wayí neameaiñí Jono aní yoi Inoniyí riniñipimi —Aní api Serimi dáni anwi erini. Jono aní apimi niñwearíná e iniigi obaxí wearíñe enjagi náni o ení ámá bimiarigíáyo wayí numeaia waríná ²⁴—Íná Jono sini gwí aníyo miñwirárinini. ²⁵Íná Jono xío xegí wiepisariñowa re egíawixini. Niwíápinimearo wigí Judayí wo tñi xwiyíá niriniróná

Gorixoyá siŋwíyo dání naŋí imónaniro nání iniigíyo igiá éanarigiápi nání xwiýiá ximiximí niniro ²⁶e nemowa wayí neameaiŋí Jono tíŋí e nání nuro re urigiawixini, “Nearéwapiyariŋoxini, áamá joxi tíni iniigi Jodani rapáyo jíariwámíni ŋweagió —O joxi áwaní neariŋorini. O re yarini. Ámáyo wayí numeaiá warini. E yaríná oxí apixí niaíwí níni o tíŋí e nání wariŋoi.” uríagiá ²⁷wayí neameaiŋí Jono re uriŋinigini, “Ámá wigi díŋíyo dání seáyi e imónarigiámani. Aŋínamí ŋweaŋo ‘Ámá o e neri seáyi e oimónini.’ miyaiwipa nerínáyí, wí e neri seáyi e imónipaxímani. ²⁸Xámi nioni áwaní re searariŋagi aríá nigíárini, ‘Nioni Kiraisoni, áamá yeáyi seayimixemeaniá nání aríowayá xwíá piaxíyo dání iwiaroníoyi rarigiónimani. Omi xámi umeáwiniginiri nirowárenapiŋonirini.’ searariŋagi rixa aríá nigíárini.” nuriri ²⁹ewayí xwiýiá bi ripi uriŋinigini, “Apixí ŋwirárioyí ayí apixí oyáirini. Apí wái wiŋoyáímani. E neri aiwi o dami dání éí nirori apixí meáo yayí yariŋagi aríá niwiríná xío eni yayí seáyimi dání yariŋirini. Ayináni díŋí níá nininiri bi onimíapi mininarinini. ³⁰Nioni rixa yíwí nimóga waríná xewaniŋo niwiarori aga nepa néra nuníŋoi.” nuriri ³¹ámi re uriŋinigini, “Ámá erami dáŋo áamá niyoni seáyi e wimóniŋorini. Ámá xwíá rirími dáŋoni aga áamá imóniri amipí xwíá tíyo dáŋí nání riri yariŋáonirini. E neriŋí aiwi aŋínamí dáŋo aga niyoni seáyi e wimónini. ³²Xewaniŋo aŋínamí dání siŋwí winiri aríá wiri eŋíyí nání ámáyo áwaní nura wariŋagi aiwi wí o áwaní rariŋípi mumíminariŋoi. ³³E searariŋagi aiwi áamá áwaní o rariŋípi aríá niwiri ‘Neparini.’ yaiwíá giyí giyí réniŋí rariŋoi, ‘Neparini. Gorixo xío rariŋípi tíni xixeni yariŋorini.’ rariŋoi. ³⁴Ayí ripi nánirini. Ámá Gorixo uowárenapiŋomi xewaniŋoyá kwíyí ayikwí miwiŋí eŋagi nání xíoyá xwiýiá nira wariŋorini. ³⁵Xano xewaxomi díŋí sixí nuyiri amipí níni íaniŋí wiepíxíniasinirini. ³⁶Ámá xewaxomi díŋí wikwíroarigiá giyí giyí díŋí niyimiŋí imóniŋípi tigiáyirini. E neri aiwi xewaxomi aríkwíkwí wiarigiáyo díŋí niyimiŋí imóniŋípi wímeaníá menini. Wikí Gorixo áamá ayo wónariŋípi aniŋí wikwímoníárini.” uriŋinigini.

Jisaso tíni Samariayí apixí wí tíni xwiýiá rinigíí nánirini.

4 ¹⁻³Parisiowa aríá re wigíawixini, “Jisaso wiepisariŋíyí imixiri wayí umeairi yaríná oyáyi wayí umeaiariŋí Jonoyá wiepisariŋíyo rixa wíarí múroariŋoi.” aríá e wíagiá aiwi Jisaso xewaniŋo ámáyo wayí umeaiariŋagi maríái, sa xegí wiepisariŋowa wayí umeaiariŋagiá nání Parisiowa aríá e wigíawixini. Áminá Jisaso Parisiowa aríá e wíá eŋagi nání níjía nimóniri ámi Gariri piropeniŋíyo nání uminiri nání Judia piropeniŋíyo píni niwíarimi nuri ⁴“Aga Samariayí aŋí tíŋimani oumini.” niyaiwimo imani nuríná ⁵Samariayí aŋí bi xegí yoí Saikai riníŋípi —Aŋí api xwíá eŋíná Jekopo xewaxo Josepomi wiŋípi tíŋí e aŋwi erini. ⁶Míniŋwí Jekopo iniigi iwiníá nání ripiŋíwá erini. Aŋí api

tíe nírémómáná sogwí áwini e ηweañáná aŋí éí nání eŋí samíŋí uwéagi iniigí nání míniŋwí ripiniŋíwá tíŋí e sá niŋweari 7-8 wiepisariŋowa aiwá bí yaniro nání aŋí apimi nání rixa numáná eŋáná Samariayí apixí wí iniigí iwiminiri bariŋagi niwiniri re uriŋinigini, “Iniigí iwíŋipi bi onimini.” uríagi 9 í re uriŋinigini, “Arige simóníagi joxi ‘Iniigí bi niapei.’ nirariŋini? Joxi Judayí woxirini. Níŋni Samariayí apixí wíni eŋagi nání rirariŋini.” —Judayí Samariayí tíni wí kumixinarigíá meŋagi nání í e uríagi 10 Jisaso re uriŋinigini, “Jíxi Gorixo áamáyo aníá wiaríŋipi nání nijíá imóniri nioni ‘Iniigí bi niapei.’ riríáoni nání nijíá imóniri neri siŋwiriŋí, jíxi yariŋí níáná nioni iniigí diŋí siŋí sieweapaxí imóniŋí bi siapiminiri éarini.” uríagi 11 í re uriŋinigini, “Ámináoxini, iniigí ayí ná mími riwoni. Iniigí iwiri nání eni mimaxiriŋagi nání iniigí iwiri mimóniŋini. Ayináni joxi iniigí diŋí siŋí eweapaxí imóniŋipi ge iwiríŋini? 12 Joxi ‘Negí arío Jekopomi —O míniŋwí riwá niripiri iniigí xewaníŋo niri xewaxowa niro xegí sipisipi burimákaú amípí niro eŋorini. Omí anani wiáŋí múroŋáonirini.’ riyaiwinariŋini?” uríagi 13 Jisaso re uriŋinigini, “Ámá iniigí riwámi níá giŋí giŋí níŋni ámi iniigí nání winayiníarini. 14 E neri aiwi ámá iniigí nioni wíápi níá giŋí giŋí ámi iniigí nání winayiníá menini. Ayí ripi nánirini. Iniigí nioni míni wíápi ámá xwioxíyo iniigí simiŋí meaaríŋe dání úrúrimí yariŋípaniŋí nimóniri diŋí niŋimíŋí imóniŋipi íníná ηweapíríá nání wimixiníarini.” uríagi 15 apixí re uriŋinigini, “Ámináoxini, níŋni ámi gwíŋí yeáyí minipa oeniri iniigí joxi rariŋipi niapei. Iniigí iwiminiri mibipa emíá nání eni niapei.” uríagi 16 o re uriŋinigini, “Jíxi nuri dixí oxomi niwirimeámi re nání bípiyi.” uríagi 17 apixí re uriŋinigini, “Oxí mayínirini.” uríagi Jisaso re uriŋinigini, “Jíxi ‘Oxí mayínirini.’ nirariŋipi xixeni nirariŋini. 18 Ayí ripi nánirini. Jíxi oxí wé bi nipini rimeagíxirini. Jíxi ámá agwi meániŋo dixí oxo meŋagi nání xixeni nepa nirariŋini.” uríagi 19 apixí re uriŋinigini, “Ámináoxini, ‘Joxi e nirariŋagi nání wiá rókiamoarigíá woxiríani?’ nimónarini.” nuriri 20 re uriŋinigini, “Eŋíná negí aríowa Gorixomi yariŋí wiro yayí wiro yaniro nání dáfí ripimi nání bagíarini. E neri aiwi Judayíne re rariŋíarini, ‘Wí e maríái, sa Jerusaremi dánini yayí niwiríná ayí apáni yariŋoi.’ rariŋíarini.” uríagi 21 Jisaso re uriŋinigini, “Ineyi, píraníŋí aríá nii. Síá wiŋi dáfí ripimi dánirani, Jerusaremi dánirani, ápo Gorixomi yayí miwipíríá nání parimoníarini. 22 Seyíne yayí wiarigíó arigéniŋí imóniŋipi nání majíá imóniŋoi. E neri aiwi yayí wiaríŋwáo arigéniŋí imóniŋipi nání Judayene nijíarini. Ayí ripi nánirini. Gorixo áamáyo yeáyí uyimixemeámíniri yariŋipi gwí Judayene imóniŋwárimí dání yariŋí eŋagi nání o, yayí wiaríŋwáo nene nijíarini. 23 E niririri aiwi síá ámá e nero yayí níŋrixiniri wimónariŋipi tíni xixeni wiarigíáyí ápo Gorixomi xegí kwíŋíyo dání yayí wiro xixeni xío imóniŋipi nání diŋí nimoro yayí wiro wipíríŋi rixa aŋwi e neri rixa parimonoi. Ayí ripi nánirini.

Ámá xío nání e nero yarigíáyí nioni gí yayí niarigíáyí imóníírixiniri wimónariñí enagi nání rariñini. ²⁴Gorixo kwíyíni enjorini. Ayinání omi yayí wiarigíáyí xegí bi epaxímani. Sa kwíyíyo dání yayí wiro xixeni xío imóniñípi nání nepa diñí nimoro yayí wiro epaxírini.” uríagi ²⁵apixí re uriniginini, “Mesaiaio —Ámá Gorixo yeáyí neayimixemeanía nání aríowayá xwíá piaxíyo dání iwiaroníoyi rariñwáorini. O ámá nimóniri biníápi nání níini nijíarini. O nibiríná amipí níni áwaní neariníarini.” uríagi ²⁶Jisaso re uriniginini, “Oyi, jíxi tñi xwiyíá rinarigwíí ronirini.” uriniginini. ²⁷E uraríná xegí wiepisariñowa, aní jíapimi nání úíáwa ámi nibiro weniñí éíáyí winigíawixini. Apixí wí tñi xwiyíá rinarinagíi niwiniro ududí nero aiwi wo niwíápínimeari xwiyíá bi re muriñiginini, “Joxi pí urápininiri urariñini? Pí nání í tñi xwiyíá rinariníi?” muripa éáná ²⁸apixí xwárá sixí e nitimí aní jíapimi nání nuri ámáyo re uriniginini, ²⁹“Ámá níini eníná dání néra biñápi nipini nání áwaní nirariñomi nurane siñwí owinaneyi. O Kiraiso, ámá yeáyí neayimixemeanía nání aríowayá xwíá piaxíyo dání iwiaroníoyi rariñwáo menirani?” urémeááná ³⁰ayí anípmi píni niwíárimi Jisasomi siñwí winíe nání ugíawixini.

³¹Wiepisariñowa apixí ámáyo wirimeáminiri úáná “Nearéwapiyarinoxini, aiwá bi nei.” urariñagía aí ³²o re uriniginini, “Aiwá nimi nání soyíné majíápi tñáonirini.” uríagi ³³wiepisariñowa nepa aiwá nání nearariniri re rinigíawixini, “None jíami úáná ámá wo nibiri aiwá níni nání mini ría wiñoi?” rinaríná ³⁴Jisaso re uriniginini, “Nioni nirowárenapiño e éwiniginiri wimónariñípi eri xío ‘Joxi e éirixini.’ niriñípi xixeni yárirí nerínáyí, ayí gí aiwániñí imónini. ³⁵Seyíné ewayí xwiyíá ripi miripa yarigíarini, ‘Emá waú waú sinirini. Rixa múróáná aiwá mianfíwáriní.’ miripa yarigíarini? Seyíné e niriro aiwi nioni re searariñini, ‘Niwíápínimearo omiñíyo mini mini weniñí emiamópoyi. Aiwá rixa yóí neri mipaxí imónini. ³⁶Agwi aiwá miariñí go go omiñí neríná xegí éipi nání nigwí nimeari ayí diñí niyimiñí imónipíría nání rixa yarini. Aiwá iwíá urariño tñi miariño tñi nawíni niwaúni yayí episi nání e yarini. ³⁷Xwiyíá seyíné re rarigíápi, ‘Wo iwíá uriri wo miri yarigíarini.’ rarigíápi, ayí nioni riríápi tñi xixeni rinini. ³⁸Nioni gí seaiepisariñáoyíné, aiwá soyíné iwíá murigíápi mipíri nání searowáriníarini. Soyíné aiwá wa iwíá urigíápi nimiróná awa aníñí miní egíápi miariñoi.” uriniginini.

³⁹Samariayí, aní jíapimi dáníyí apixí áwaní re uríagi “Ámáo níini eníná dání néra biñápi nipini nání áwaní niriñoi.” urí enagi nání obaxí o nání diñí niwíkwíroro nání ⁴⁰nibiro niwímearóná nene tñi oñweaneyiniro yariñí wíagía o síá wíyáú e weniginini. ⁴¹Ámá obaxí wíni wíni eni xwiyíá o rariñípi aríá niwiro nání diñí niwíkwíroro ⁴²apixími re nura ugíawixini, “Jíxi nearípi aríá niwirane nánini omi diñí

miwikwíroariḡwini. Newaniḡene eni o xwiyáá rariḡagi aríá niwirane rixa niḡáá nimóniri re yaiwiarḡwini, ‘Ámá niyoni yeáyí uyimixemeámániri biḡoríani?’ yaiwiarḡwini.” urigíawixini.

Gapimaní woyá niaíwomi naḡí imixiḡí nánirini.

⁴³ Sía wiyáú weḡo aḡí apimi píni niwiárimi Gariri piropeniśyo náni uḡinigiḡi. ⁴⁴ Jisaso xewaniḡo re riḡo eḡagi náni, “Wíá rókiamoariḡí gomi ámá xegí aḡí e dánḡí wé íkwiaḡwíyo uḡwirárigíárani? Oweoi.” riḡo eḡagi náni ámi Gariri piropeniśyo náni uḡinigiḡi. ⁴⁵ Ayináni Gariri piropeniśyo rémóáná Gariri ḡweáyí eni aiwá síá Aḡínajo Múroagíyi náni Jerusaremiyo náni niyiro niḡwearóná amipí xío yariḡípi winigíá eḡagi náni wigí aḡíyo rémóáná umíminigíawixini.

⁴⁶ Jisaso Gariri piropeniśyo aḡí Kenai rinḡe —E xámi aga iniḡí aí wainí imixiḡí erini. E niremori ḡweaḡáná gapimaní wo xegí íwo simixí neri aḡí yoí Kapaneamiyo ḡweaḡáná ⁴⁷ xano aríá re wiḡinigiḡi, “Jisaso Judia piropeniśyo píni niwiárimi nibiri Gariri piropeniśí tiyómini rémónapiḡoi.” rariḡagiá aríá e niwiri Jisaso tḡí e náni niyapiri xegí niaíwo rixa nipéminiri aḡwi ayo eḡagi náni o niweapiri gí íwomi naḡí oimixiniri yariḡí wíagi ⁴⁸ Jisaso re urḡinigiḡi, “Seyíné nioni emimí mepa eri amipí ayá riwamónipaxí mepa eri yariḡagi ninanirínáyí, wí diḡí nikwíropíríméoi.” uríagi ⁴⁹ gapimano re urḡinigiḡi, “Ámináoxini, gí íwo peniginiḡi joxi aḡíni weapei.” uríagi ⁵⁰ Jisaso re urḡinigiḡi, “Dixí aḡí ui. Dixí íwo siḡí uniḡoi.” uríagi o xwiyáá Jisaso uríḡpi “Neparini.” niyaiwiri diḡí nikwírori xegí aḡí e náni nuri nuri ⁵¹ óf e sá weḡo wíápi tḡni sini óíyo waríná xegí xináíwániḡí nimóniro omiḡí wiilarigíáwa óf e órórí niniro re urigíawixini, “Dixí íwo rixa siḡí úinigiḡi.” uríagiá ⁵² o yariḡí re wiḡinigiḡi, “Gíná naḡí imóníinigiḡi?” uríagi awa re urigíawixini, “Agíná 1:00 p.m. imónáná wará ríá píri píni wiárfinigiḡi.” uríagiá ⁵³ xano re yaiwiḡinigiḡi, “Agíná Jisaso ‘Dixí íwo siḡí uniḡoi.’ niriḡná simixí píni wiárfárfani?” niyaiwiri xíomi diḡí niwikwírori xegí íwixé eni diḡí wikwírogíawixini. ⁵⁴ Jisaso Judia piropeniśyo píni niwiárimi ámi Gariri piropeniśyo nemeḡná emimí ámi bi api eḡinigiḡi.

Sikwí ikí eḡí womi naḡí imixiḡí nánirini.

5 ¹ Jisaso e nemo niḡweaḡisáná Judayí wigí yariḡíapa Gorixo náni diḡí moaniro aiwá Jerusaremiyo imixaríná o e náni niyoari niremómáná ² —Jerusaremiyo ákiḡá íwí wiyi Sipisipíyi riniḡíyi tḡí e ipí wá Xibiruyí píne tḡni xegí yoí Betesaidai riniḡíwá e riwoḡíwáriní. Midimidáni ríwíyi náni aḡí wiámíó wé wú miriniḡerini. ³ Aḡí wiámíó wé bi api miriniḡe ámá simixí yariḡíáyí tḡni siḡwí supárigíáyí tḡni sikwí ikí eḡíáyí tḡni sikwí wé kiriḡí eḡíáyí tḡni ayí obaxí e niḡwearo [iniḡí yaromí épi siḡwí owinaneyiniri ḡweaarigíerini. ⁴ Wainí wainá aḡínají Gorixoyá

wo niweri ipiwami yaromi méaná áamá simixí tígíáyí go go xámi páwíáná xegí wará naní imónariñí eñagi nání ηweaarigíferini.] ⁵Jisaso e nirémori áamá e ηweaarigíáyí wo —O xegí simixípi yaríná xwiogwí 38 múroñorini. ⁶O e weñagi siñwí niwiniri “Simixí eñíná dání néra biñoríani?” niyaiwiri níjjá e nimóniri nání re uriñinigini, “Joxi ‘Naní oimónimini.’ risimónariní?” uríagi ⁷simixo re uriñinigini, “Áamá roxini, ipíwá yaromi éaná áamá ipíyo ninimeari niwáripíri nání mayonirini. Niwanijoni niwiápínimeámi nuri páwiminiri yaríná áamá wa xámi páwiarigíárini.” uríagi ⁸Jisaso re uriñinigini, “Niwiápínimeari dixí íkwianjwí nixoperi nimeámi ui.” uráná re eñinigini. ⁹Naní nimóniri xegí íkwianjwí nimeámi añí uñinigini.

Síá ayi Sabaríá ayimirini. ¹⁰Ayináni Judayí ámináowa naní imóníomi re urigíawixini, “Sabaríáyimi eñagi nání dixí íkwianjwí xe nimeámi ouniri siñwí ranipaxí mimóniñwini. ηwíárini.” uríagía aí ¹¹o re uriñinigini, “Áamá nioni naní nimixío, o ‘Dixí íkwianjwí nimeámi ui.’ niríagi nimeámi waríjini.” uríagi ¹²awa yariñí re wigíawixini, “ ‘Dixí íkwianjwí nimeámi ui.’ go ririñoi?” yariñí e wíagía aí ¹³ámá o xíomi naní wimixío nání níjjá mimónipa neri nání áwaní uripaxí mimóniñinigini. Ayí ripi nánirini. Jisaso áamá e eñroyí egíáyo áwinimi dakwíagi nánirini.

¹⁴E nemáná eñáná Jisaso áamá o añí ridiyowá yarigíwámi roñagi niwiniri re uriñinigini, “Aríá nii. Simixí joxi yariñípi rixa naní imóniñinigini. ‘Xámi síipimi ámi bi wiárí múróñiñípi siniginiri nání íwí ámi mepa éirixini.’ rirariñini.” uráná ¹⁵o nuri Judayí ámináowami Jisaso nání re uriñinigini, “Naní nimixío, ayí orini.” uríagi nání ¹⁶Jisaso Sabaríáyo omi naní wimixí eñagi nání awa “Ririxinií wikárfwanigini.” niyaiwiro iwamíó e wianiro egíawixini. ¹⁷E wianiro éagía aiwi Jisaso re uriñinigini, “Amipí gí ápo bi píni miwiárí aníñí miní néra biñípi nioni eni axípi e neri ámáyo arirá wiaríjini.” uríagi nání ¹⁸Judayí ámináowa rixa mekaxí nimeró “Omi pikíwanigini.” rinigíawixini. O “Sabaríáyo ηwíárini.” riniñípi niwiaíkiri éyí nánini maríái, xewaniño Gorixo nání “Gí áporini.” niriríná ayí réniñí ríyí, “Nioni Gorixo tíni xixeni imóniñini.” éniñí ríyí nání eni e rinigíawixini.

“Ápo amipí íaniñí niepíxíniasiniñini.” uriñí nánirini.

¹⁹Ayináni Jisaso niwiápínimeari “Xamijoni bi osearimini.” nuriri xewaniño nání re uriñinigini, “Aga nepa searariñini. Xewaxo xegí diñíyo dání amipí wí epaxí menini. Xano yariñípimi siñwí niwiniri apini yariñirini. Pí pí xano yariñípi xewaxo eni axípi e yariñirini. ²⁰Ayí ripi nání searariñini. Xano xewaxomi diñí sixí nuyiri amipí xío yariñípi siwá wiaríñirini. Soyíné ududí epíría nání emimí xewaxo agwi yariñípimi seáyí e imóniñí bi éwiniginiri wiepísiníárini. ²¹Xano áamá piyíyo ámi siñí nimixiri diñí sixí umímoariñípa xewaxo eni xío xegí diñíyo dání

ámá xío wimónariŋíyo anani diŋí sixí umímoariŋírini. ²² Ripi eni xano ámá womi xwiyía umearariŋímáni. Xewaxo ámá niyoni xwiyía mearíwiniginiri wiŋí eŋagi náni oni xwiyía mearariŋírini. ²³ Ámá níni xanomi wé íkwiaŋwíyo uŋwirárariŋíápa xewaxomi eni axípi e étrixiniri ámá niyoni xwiyía mearíwiniginiri mini wiŋírini. Ámá xewaxomi wé íkwiaŋwíyo muŋwiráripa yarigíáyí xano, urowárénapijomi eni wé íkwiaŋwíyo muŋwirárariŋíárini.” nuriri ²⁴ re uriŋiginini, “Aga nepa searariŋini. Ámá xwiyía nioni rariŋápi aría niro nioni nirowárénapijomi diŋí wikwírooro éíá giyí giyí rixa diŋí niyimiŋí imóniŋípi tígíáyírini. Wí xwiyía meárinipíría náni mimóniŋoi. Sini óí pearigíáyímini miwaríŋoi. Diŋí niyimiŋí imóniŋí íníná ŋweapíríáyímini waríŋoi.” nuriri ²⁵ re uriŋiginini, “Aga nepa searariŋini. Sía ámá piyíniŋí imónigíáyí maŋí Gorixomi xewaxoyá aría niwiro xídipíríyi rixa aŋwi e neri rixa parimoŋoi. Ámá aría niwiro xixeni éíáyí diŋí niyimiŋí imóniŋípi íníná ŋweapíría náni meapíráo. ²⁶ Ayí ripi nánirini. Xano diŋí niyimiŋí imóniŋípi míkí tíŋo nimóniri ámá xío wimónariŋíyo wiaríŋípa xewaxo eni diŋí niyimiŋí imóniŋípi míkí tíŋo oimóniri wiŋírini. ²⁷ Ripi eni xewaxo ámá imóniŋo eŋagi náni anani ámá niyoni mí ómómiximí winía náni eni imóníwiniginiri íániŋí wiepíxíniasíŋírini. ²⁸ Nioni searíápi náni diŋí ududí miseainipani. Ayí ripi náni searariŋini. Sía ámá xwáripáyo wegíá níniyí xewaxoyá maŋí ráná aría niwiro wiápínimeapíríáyí aŋwi e nimóga bariŋagi náni searariŋini. ²⁹ Aría niwiro xwáripáyo dáni niwiápínimearóná naŋí yarigíáyí diŋí niyimiŋí imóniŋípi íníná pírániŋí ŋweapíría náni mearo sipí yarigíáyí xwiyía meáriniro epíríárini. ³⁰ Niiwaníŋoni gí diŋíyo dáni amipí wí epaxí mimóniŋini. Ápomi aría wiaríŋápi tíni xixeni ámáyo xwiyía umearariŋárini. Nioni gí nimónariŋípi mixídipa neri nirowárénapijó wimónariŋípi nixídiri náni ámáyo xwiyía numeariríná xixeni ayo umearariŋárini.” uriŋiginini.

Jisaso náni áwaní rigíá nánirini.

³¹ Ámi re uriŋiginini, “Soyíné diŋí re niaiwiaríŋagía aiwi, ‘Xewaniŋo náni áwaní nearáná “Neparini.” waiwipaxí menini.’ niaiwiaríŋagía aiwi ³² ámi wo nioni náni áwaní searariŋírini. Nioni náni niseariríná ‘Ayí neparini.’ yaiwipaxírini.” nuriri ³³ re uriŋiginini, “Xámi segí wami wayí neameaiŋí Jono tíŋímini urowáráná o nioni náni áwaní niseariríná nepaxiŋí imóniŋípi tíni xixeni seariŋiginini. ³⁴ Soyíné re riseaimónarini, ‘Xewaniŋo náni áwaní rinariŋípi aga ámá wí rariŋíápimi dáni sopiŋí ononiri rarini.’ riseaimónarini? Oweoi, seyíné Gorixo yeáyí seayimixemeanía náni wayí neameaiŋí Jono nioni náni seariŋípi miŋí nirori searariŋini. ³⁵ O uyíwí ápiáwí wearíŋípániŋí neri ámáyo wía ókímixaríná soyíné xegí xwiyía uyíwí wíániŋí imóniŋáná yayí axínáni egíawixini. ³⁶ O nioni náni áwaní nisearíagi aiwi nioni náni áwaníniŋí

searipaxí imóniņí bi omi seáyi e wimónini. Emimí amipí gí ápo e epaxí imóníwiniņiniri niapiņípi náni rariņini. Nioni emimí niseairíná api nioni náni áwanj réniņí searariņírini, ‘Xegí xano urowárénapinorini.’ éniņí searariņírini. ³⁷Gí ápo, nioni nirowárénapinjo eni nioni náni rixa áwanj seariņírini. Omi soyíné arfá bi wiro xío imóniņípi siņwí bi winiro megiárini. ³⁸Xwiyíá xío seariņíyí segí xwioxíyo miwenini. Ayináni áamá o nirowárénapinoni diņj minikwíronjoi. ³⁹Soyíné diņj niyimiņí imóniņípi meáwaniginiro Gorixoyá Bikwíyo íá roro pariro yarigiárini. Ríwamiņí ayo niriniri eániņípi nioni náni áwanj riniņagi aí ⁴⁰soyíné diņj niyimiņí imóniņípi tígiáyí imónipíría náni nioni tíamini mibipaxí seaimónarini.” nuriri ⁴¹re uriņinigini, “Nioni áamá weyí nimétrixiniri biņáoni meņagi aiwi ⁴²nioni soyíné náni niđjárini. Soyíné Gorixomi diņj sixí uyarigióyínemani. ⁴³Nioni gí diņíyo dáni biņáonimani. Gí ápo ninirípeari nirowárénapinoni aiwi soyíné minimíminariņoi. Áamá wo xío xegí diņíyo dáni bánáyí, anani numíminipaxoyínérini. ⁴⁴Soyíné áamá weyí oneamépoyiniri ero Gorixo —Oni ŋwíá imóniņorini. O weyí oneameniri xío wimónariņípi mixídipa ero yarigióyíné, soyíné sini e neróná arige nero diņj nikwíropíráo? Oweoi!” nuriri ⁴⁵re uriņinigini, “Nioni náni re miniaiwipa époyi, ‘Xanoyá siņwíyo dáni nene xwiyíá neaxekwímoníárini.’ miniaiwipa époyi. Áamá seyíné seaxekwímonío, ayí Mosesorini. Soyíné omi diņj niwikwímóá nuro re yaiwiarigiárini, ‘O arirá neainíárini.’ yaiwiarigiárini. ⁴⁶Amipí Moseso niriri eaņípi diņj nikwíroro siņwiriyí, nioni náni niriri eaņí eņagi náni nioni eni diņj nikwíroanro egiárini. ⁴⁷E neri aí xío niriri eaņípi náni diņj mikwíropa yarigióyíné, soyíné arige nero xwiyíá nioniyápi eni diņj ikwíropíráo? Oweoi wí e epaxí menini.” uriņinigini.

Jisaso oxí 5,000 awí eániđíayo aiwá mini wiņj nánirini.

6 ¹Jisaso e nurárimo neméisáná ipí Gariri riniņíwámi —Ipí awá xegí yoí ámi bi Taibiriasiyi riniņíwárini. Awámi jíariwámi dáni náni nuri ŋweaņáná ²ámá obaxí emimí xío simixí yarigiáyo wiarinípi siņwí niwíga nuro náni epíroyí nero omi númi uxídaríná ³⁻⁴sía Judayí aiwá Aņínajo Neamúroagoi riniņíyi náni imixipírri rixa aņwi e imóniņáná Jisaso díwíyo náni niyiri xegí wiepisariņowa tíni e éi niņwearo ⁵⁻⁶Jisaso siņwí aníyí winiņinigini. Áamá aga ayá wí epíroyí nero xío tíamini bimiarinagía niwiniri xío enípi náni niđjá nimóniri aiwi re yaiwiņinigini, “Gí wiepisariņá Piripo nepa eņí neániri diņj ría nikwíroni? Iwamíó owíwapiyimini.” niyaiwiri re uriņinigini, “Áamá tiyí aiwá niđírri náni ge bí neri wianíwini?” uríagi ⁷Piripo re uriņinigini, “None aiwá óf ininí 200 tíni bí nerane yaņj niwiranénáyí, áamá re epíroyí egiáyí aga obaxí imóniņagía náni woni woni bi onimíapi aí meapaxí imóninimeniņoi.” uríagi ⁸wiepisariņíyí wo —O Saimoni Pitaomi xogwáo Adiruoyi

riniŋorini. O re uriŋinigini, ⁹“Íwí woyá bisíkeriá pírawá barí tîni imixiniŋí wé wú tîni peyí orá biaú tîni neŋagi aiwi ámá obaxí epíroyí egíá tíyo yaŋí wipaxí rimónini? Oweoi!” uríagi ¹⁰Jisaso ará xwapí eŋe nâni wiepisariŋowami re uriŋinigini, “Ámá nîni éf oŋweápoyniri urípoyi.” uríagi wiepisariŋowa Jisaso urípa éaná oxí nîni éf ŋweaŋaná íá róíáyí 5,000 imóniŋinigini. ¹¹Jisaso ámá nîni éf ŋweáagiá niwiniri bisíkeriá pírawá barí tîni imixiniŋípi nimeari Gorixomi yayí niwimáná ámá e éf ŋweagiáyo yaŋí nimerí niwia ŋuinigini. Peyí orápiáú eni nimeari axípi neríná wigí onaneyiniro wimónariŋípi tîni xixeni niwia ŋuinigini. ¹²Rixa apáni niniro agwí ími uyíagi niwiniri wiepisariŋowami re uriŋinigini, “Wí xwiríá mikixepa oépoyniri niniro tíapia awí eaamépoyi.” uríagi ¹³awa bisíkeriá pírawá barí tîni imixiniŋí wé wú api ámá yí niniro tíapia awí neamero soxí íá xwé wé wúkaú sikwí waúmi aumaúmí nero magwí miárigíawixini. ¹⁴Ámá yí emimí Jisaso wíwapiyíípi siŋwí niwiniro nâni re rinigíawixini, “Neparini. Wíá rókiamoariŋí xwíá tíyo binó orini.” rinariŋagiá ¹⁵Jisaso xíomi mixí ináyí imixipíri nâni miwimónariŋagi af ayí “Íá nuxerane mixí ináyo oimixaneyí.” yaiwariŋagiá diŋí adadí niwiri nijíá nimóniri nâni ayo e niwárimi xegípi díwí miŋíyo nâni yiŋinigini.

Jisaso ipí Gaririyo xwiríŋwí nosaxa uŋí nánirini.

¹⁶Síápi tîni xegí wiepisariŋowa ipí imañí e nâni niwero ¹⁷ewéyo niŋixemoániro Kapaneami nâni oriwámi dâni xemoaniro nâni nimeámi nuro rixa síá yiniŋaná Jisaso awami sini miwímeámi eŋaná re eŋinigini. ¹⁸Ríwipí xwé eri ipí imeamíkwí eri yaríná ¹⁹wiepisariŋowa ewéyo nireaxa nuro sini ipíyo áwini e kiromita wé wúrani, wé wíumi dáŋí worani, núfasáná weniŋí éíáyí winigíawixini. Jisaso ewé tíámini ipíyo xwiríŋwí nosaxa bariŋagi winigíawixini. Siŋwí e niwiniro éf yariŋagiá af ²⁰o re uriŋinigini, “Ananire. Nionirini. Wáyí mepani.” uríagi ²¹awa omi rixa “Re xemónapei.” uraniro yaríná re eŋinigini. Rixa ipíyo jíariwámini aŋí wigí diŋí niyaiwiro warigíe iwiékínimeagiawixini.

Ámá yí Jisaso nâni piá egíá nánirini.

²²Ámá oriwámi dâni bisíkeriá níe sá wegíáyí wíápi tîni niwíápinimearo re yaiwigíawixini, “Agíná ewé ámi wí re miwé ná báni weŋagi winíwanigini. Nene siŋwí winiŋaná Jisaso xegí wiepisariŋowa tîni ewépami miŋixemoánariŋagiá niwinirane wiepisariŋowani niŋixemoániro wariŋagiá winowárwaniŋini.” yaiwariŋá ²³ewé wí aŋí yoí Taibiriasi dâni bisíkeriá Ámináo xegí xanomi yayí niwiri wíagi níe nâni báná ²⁴ámá e epíroyí egíáyí Jisaso sini wigí tíe miŋweaŋagi winiro wiepisariŋowa eni miŋweaŋagiá winiro neri nâni ewé bíáyo niŋixemoániro Jisaso nâni Kapaneamiyo piá yaniro ugíawixini.

“Nioni aiwá aŋŋnami dáŋŋniŋí imóniŋáonirini.” uríŋí nánirini.

²⁵ Ayí ipíyo járiwámmini Jisaso Kapaneamiyo ŋweaŋáná niwímearo re urigíawixini, “Nearéwapiyariŋoxini, joxi re náni gíná bíoxini?” uríagía ²⁶ Jisaso re uriŋinigini, “Aga nepa searariŋini. Seyíné emimí nioni seaíwapiyíápi siŋwí niwiniróná siwániŋí niseairi seaíwapiyimini éápi náni níjía nimóniro náni nioni náni píá riyariŋoi? Oweoi, seyíné bisíkería niniróná agwí ími seayí eŋagi náni nioni náni píá yariŋoi.” nuriri ²⁷ ewayí xwiyíá re uriŋinigini, “Aiwá piyí pénaríŋipi meaniro náni mepa nero aiwá niniriŋipimi dáni diŋí niyimiŋí imónipaxípi meaniro náni éfrixini. Aiwá api áamá imóniŋáoni anani seaipapaxíri. Ápo Gorixo ‘Mimiwiároariŋoríani?’ niniaiwiri xío e éwiniginiri nirípeaŋoni aiwá api anani seaipapaxíri.” uríagi ²⁸ ayí re urigíawixini, “Nene pí nerína Gorixo áamá e oépyiniri wimónariŋipi yaníwini?” uríagía ²⁹ Jisaso re uriŋinigini, “Seyíné ripi neróná Gorixo wimónariŋipi yariŋoi. Áamá xío nirowárenapiŋoni diŋí ninikwírorónáyí, xío wimónariŋipi yariŋoi.” uríagi ³⁰ ayí re urigíawixini, “Nene siŋwí niwinirane diŋí rikwíroani náni pí emimí neawapiyírini? Joxi aga píyí erúni? ³¹ Bikwíyo xwiyíá re niriniri eániŋípa, ‘O aiwá nipíri náni aŋŋnami dáni wiŋinigini.’ niriniri eániŋípa negí aríowa áamá diŋí meaŋe nemeróná aiwá manái riniŋípi —Aiwá api Gorixoyá diŋíyo dáni xegípi weagípirini. Aríowa áamá diŋí meaŋe nemeróná aiwá api nagíarini.” uríagía ³² Jisaso re uriŋinigini, “Nioni aga nepa searariŋini. Aiwá eŋíná aŋŋnami dáni seaipariŋo, ayí Mosesomani. Agwi eni aga aiwá nepaxiŋípi aŋŋnami dáni seaipariŋo, ayí gí áporini. ³³ Aiwá nepaxiŋí ápo Gorixo seaipariŋípi, ayí aiwá aŋŋnami dáni niweapiri áamá xwíá tíyo ŋweagía diŋí niyimiŋí tígíáyí imónipíría náni sixí umímoariŋorini.” uríagi ³⁴ ayí re urigíawixini, “Ámináoxini, aiwá joxi nearariŋípi íníná neaiapíríxini.” uríagía ³⁵ Jisaso re uriŋinigini, “Aiwá nepaxiŋí diŋí niyimiŋí imónipíríápi, ayí nionirini. Áamá nioni tíámmini bíá giyí giyí ámi agwí wipaxí menini. Nioni diŋí nikwírórá giyí giyí ámi iniigí náni bi gwíni yeáyí wipaxí mimónini. ³⁶ E niseariri aiwi nioni re searíanigini, ‘Seyíné emimí nioni eŋápi siŋwí ninaniro aiwi “Oríani?” niniaiwiro diŋí minikwíroariŋoi.’ searíanigini. ³⁷ E neri aí áamá ápo ‘Dixíri.’ niniriri niapiŋíyí níni xixeni diŋí ninikwíroro nioni tíámmini bipíríarini. Nioni tíámmini bíáyí mixí wí umáinimíámani. ³⁸ Nioni aŋŋnami dáni niweapiríná nioni gí nimónariŋípi emíániri weapiŋáonimani. Nioni nirowárenapiŋo wimónariŋípi emíániri niweapiri náni áamá xíoyá diŋí tíni nioni tíámmini bíáyí mixí wí umáinimíámani. ³⁹ Nioni nirowárenapiŋo e éwiniginiri wimónariŋípi, ayí ripirini. Nioni áamá xío niapiŋíyí wíyo miyoríripa eri síá yoparíyi imónáná ámi wiápínimeapíría náni diŋí sixí umímori emíá náni wimónariŋíri. ⁴⁰ ‘Gí ápo e éwiniginiri wimónariŋípi, ayí ripirini.’ searariŋini. O áamá

xewaxoni siŋwí ninaniro diŋí níkwíróiá giyí giyí diŋí niyimiŋípi tígiáyí imónipíríá nání wimóniri nioni síá yopariyimi ayí ámi wiápínimeapíríá nání diŋí sixí umímómíá nání wimóniri yariŋírini.” uriŋinigini.

⁴¹Judayí xewaniŋo re riníŋípi nání, “Aiwá aŋínami dání weapiŋípi, ayí nionirini.” riníŋípi nání aniŋúmí niriniro o nání ⁴²re rinigíawixini, “Jisaso ro Josepomi xewaxo menirani? Xaniyaú nání nene majíáraní? O arige neri ‘Aŋínami dání wepíniniáonirini.’ ríá rarini?” rinariŋagía ⁴³Jisaso re uriŋinigini, “Pí nání aniŋúmí niriniro rinariŋoi? ⁴⁴Ámá wo aí xewaniŋoyá diŋíyo dání nioni tíámíni bipaxí menini. Ápo, nirowárenapiŋo xe o tíámíni ouniri diŋí ukikayoŋánáni nioni tíámíni bipaxírini. Ayí síá yopariyimi wiápínimeapíríá nání nioni diŋí sixí umímómíárinini. ⁴⁵Ríwamiŋí wíá rókiamoagiáwa eagiáyo re rinini, ‘Gorixo ámá niyoni wíwapiyiniárinini.’ rinini. Ayináni ámá ápo wíwapiyaríná aríá wigíá giyí giyí níni nioni tíámíni barigíárinini. ⁴⁶Gorixo wíwapiyiniŋí aiwi ayí wí Gorixomi siŋwí winigíá nání mirariŋini. Ná woni Gorixo tíŋí e dání biŋáoni ápomí siŋwí winiŋárinini. ⁴⁷Aga nepa searariŋini. Nioni diŋí níkwíróiá giyí giyí diŋí niyimiŋí íníná ŋweapíríá nání tígiáyírinini. ⁴⁸Aiwá niniriŋípi dání diŋí niyimiŋí imónipaxípi, ayí nionirini. ⁴⁹Eŋíná segí seáriáwéyí ámá diŋí meaŋe nemeróná aiwá manái riniŋípi niniro aiwi niŋweagiásaná pegíawixini. ⁵⁰Aiwá aŋínami dání weapiŋí ripi xegí bixini. Ámá ninirínáyí, ni pepíríámani. ⁵¹Aiwá diŋí niyimiŋí imónipírí nání aŋínami dání weapiŋípi, ayí nionirini. Ámá giyí giyí aiwá ripi ninirínáyí, aniŋí íníná ŋweapíríárinini. Aiwá ámá xwíá rirími ŋweagiá níni diŋí niyimiŋí tígiáyí nimóniro íníná ŋweapíríá nání mini wimíápi, ayí gí warápirini.” uriŋinigini.

⁵²Judayí wigípi xwiyíá ximiximí niniro re rinariŋagía, “Ámá ro arige neri xíoyá wará naníwá nání neapiŋíríani?” rinariŋagía ⁵³Jisaso re uriŋinigini, “Aga nepa searariŋini. Seyíné ámá imóniniáoniyá warápi minípa ero ragípi minípa ero nerónáyí, diŋí niyimiŋí imóniniŋípi tígiáyíné menini. ⁵⁴Gí wará niro gí ragí niro éiá giyí giyí diŋí niyimiŋí imóniniŋípi tígiáyí eŋagía nání síá yopariyimi owiápínimeapoyiniri diŋí sixí umímómíárinini. ⁵⁵Gí wará ripi aiwá nepaxiŋí imóniri gí ragípi iniigí nepaxiŋí imóniri eŋagi nání searariŋini. ⁵⁶Ámá gí wará niri ragí niri éi go go nioni tíni níkwumixinirai nawíni imóniŋwii. Nioni eni xío tíni níkwumixinirai nawíni imóniŋwii. ⁵⁷Ápo, diŋí niyimiŋípi míkí tíŋo nirowárenapiŋírini. Ápo e eŋí eŋagi nání nioni eni diŋí niyimiŋípi míkí tíŋáoni imóniniŋini. Ayináni go go níbiri nioni ninirínáyí, nioni eni diŋí míkí tíŋáoni eŋagi nání xío eni diŋí niyimiŋí íníná ŋweanía nání tíŋí wo imóniniárinini. ⁵⁸Aiwá aŋínami dání weapiŋí ripi nání searariŋini. Ripi aiwá eŋíná negí aríowa niniro niŋweagiásaná pegíápi yapi mimónini. Go go aiwá ripi ninirínáyí, diŋí íníná ŋweanía nání tíŋí wo imóniniárinini.” uriŋinigini. ⁵⁹Jisaso rotú aŋí Kapaneamiyo miriniŋiwámi dání nuréwapiyiríná e nura uŋinigini.

Xwiyía diñí ikwíróáná diñí niyimiñí imónipaxípi uriñí nánirini.

⁶⁰ Ayináni xegí wiepisariñíyí obaxí amípi o nuréwapiyiríná nura úipi aría niwíroná re rigíawixini, “Xwiyía o rariñípi ududí iniñípi rarini. Ámá go xixeni aría winiríeniñoi?” rariñagía aiwi ⁶¹ Jisaso xegí wiepisariñíyí obaxí o ríipi náni aniñúmí irinariñagía nijía nimóniri re uriñinigini, “Xwiyía ududí seainipaxí searíapimi dáni róreámioariñoi? Nioni píni niniwiárimí upíri riseaimónarini? ⁶² Seyíné ámá imóniñáoni xewaniñoni weapiñae náni ámi peyariñagi ninanirínáyí, pí wipíri seaimóniníáríani? Sini píni niniwiárimí upíri náni seaimóniníáríani?” nuriri ⁶³ re uriñinigini, “Diñí niyimiñí íníná ñweapíría náni wiaríñípi, ayí kwíyí Gorixoyápirini. Ámáyí wigí eñí eánigía tñni wí e imónipaxí menini. Xwiyía nioni searíapi ámá diñí nikwíroriñípiimi diñí íníná ñweapíría náni kwíyí eweariñípirini. ⁶⁴ E neri aí wiyíné xwiyía nioniyá sini diñí minikwíroariñoi.” uriñinigini. Jisaso iwamíó dáni ámá xíomi diñí miwikwíróíayí náni nijía imóniri xío náni miyí urinío náni eni nijía imóniri ego eñagi náni e nuriri ⁶⁵ re uriñinigini, “Wiyíné diñí minikwíroariñagía náni re searíanigini, ‘Ápo ámá go go nioni tññí e xe ouniri siñwí miwinipa nerínáyí, o nioni tñámíni wí bipaxí menini.’ searíanigini.” uriñinigini.

⁶⁶ Xwiyía api nura úf eñagi náni xegí wiepisariñíyí obaxí omí píni niwiárimí nuro ámi o tñni nawíni bi añí memegíawixini. ⁶⁷ Ayináni Jisaso xegí wiepisariñí wé wúkaú síkwí waú awami re uriñinigini, “Soyíné eni ‘Rixa píni niwiárimí owaneyi.’ riseaimónarini?” uríagi ⁶⁸ Saimoni Pitao re uriñinigini, “Ámináoxini, none go tñámíni waníwini? Xwiyía diñí niyimiñí tññwáone imónani náni imóniñípi joxini tññoxirini. ⁶⁹ None rixa diñí nirikwírorane nijía re imóniñwini, ‘Joxi siyikwí míníñí Gorixo rirípeañoxiríani? Yeáyí neayimixemeanía náni aríowayá xwía piaxíyo dáni iwiaronífoyi rariñwáo, ayí joxirini.’ niyaiwirane nijía imóniñwini.” uríagi ⁷⁰ Jisaso re uriñinigini, “Nioni ámá wé wúkaú síkwí waú soyíné misearípeapa reñanigini? E neri aí woxi oboxíniñí imóniñini.” uriñinigini. ⁷¹ Isikarioti dání Saimonomi xewaxo Judaso —O wiepisariñí wé wúkaú síkwí waú awa worini. O xío náni miyí urinío eñagi náni e uriñinigini.

Jisasomi xogwáowa xíomi diñí miwikwírogía nánirini.

7 ¹ Jisaso e niyárimo néisáná Judayí ámináowa xíomi pikianiro náni mekaxí meariñagía nijía nimóniri náni “Judía piropenisíyo oememini.” miwimóní Gariri piropenisíyo añí emearíná ² aiwá Judayí añí pákí pákí iniñíyo niñwearíná imixayarigíápi —Aiwá api, ayí eñíná íwiáriawé Moseso tñni nemeróná senía añíyo niñweaxa wagíápi náni diñí winini náni xwiogwí ayí ayo Judayí wigí añíyí píni niwiárimí

nuro síá wé wíúmi dánjé waú wo aŋjé pákí pákí iniŋjéyo niŋwearo aiwá imixarigíápirini. Aiwá api rixa aŋwi e imóniŋáná ³xogwáowa re urigíawixini, “Dixí wiepisariŋjé wíniyí eni emimí amipí joxi yariŋjépi síŋwí winipiri náni aŋjé re píni niwíarimi Judia piropeniŋjéyo náni ui. ⁴Ayí ripi náni rirariŋwini. Ámá wo ámá níni xío náni níjía oimónipoyiniri niwimónirínáyí, xegí yariŋjépi ínimi yariŋjémani. Emimí joxi yariŋjépi nepa nerínáyí, jiwaniŋoxi nuri ámá níyíyá síŋwíyo dání siwá winiríni.” urigíawixini. ⁵Awa xegí xogwáowa aí diŋjé miwíkwíropa nero náni e urigíawixini. ⁶Jisaso re uriŋinigini, “Soyíné upíríná anani gíni gíná upíría náni imóniŋagi aiwi nioni umíáfná sini mimónini. ⁷Ayí ripi náni searariŋjéni. Ámá xwíá tíyo dánjé níniyí soyíné tíni símí tíni inipaxí mimóniŋoi. E neri aiwi nioni wigí yariŋjépi náni ‘Sipírini.’ nuriri waropárí wiarariŋagi náni símí tíni niariŋoi. ⁸Segípi aiwá nene xwiogwí o omí imixayariŋwápi náni yoápoyi. Nioni gí umíáfná sini mimóniŋagi náni wí umiméni.” ⁹nurárimi Gariri piropeniŋjéyo ŋweaŋinigini.

**Jisaso aiwá aŋjé pákí pákí iniŋjéyo niŋwearoná
imixarigíápi náni yoaŋjé nánirini.**

¹⁰Jisaso, xexirímeáowa rixa aiwá api náni yoáíámi eŋáná xío eni ámáyá síŋwíyo dání miyoá yumí ínimi níyiri Jerusalemi nírémori ŋweaŋáná ¹¹Judayí aiwá imixarigíé xío náni píá néra nuro “O gerini?” níriga nuro ¹²ámá e epíroyí egíáyí ikeagigwí ayá wí níriga nuro wí “Ámá naŋorini.” riro wí “Oweoi, naŋomani. Ámá níyoni diŋjé nukinimixiri xejwími nipemeámi warinorini.” riro nero aiwi ¹³Judayí ámináowa náni wáyí nero náni ámá wí o náni ámá símímanjé e dání mirinígawixini.

¹⁴Jisaso síá aiwá imixarigíáyí rixa áwini e imóniŋáná aŋjé ridiyowá yariŋjéwámi náni nuri nipáwiri ámáyo uréwapiyaríná ¹⁵Judayí ámináowa diŋjé ududí niwiniro re rigíawixini, “Arire neri níjía o rariŋjépi nimóniri ría rarini? Sikuríá meŋoyoi.” rariŋagía ¹⁶Jisaso re uriŋinigini, “Xwíyíá nioni searéwapiyariŋjépi nioni gípimani. Nioni nirowárenapiŋoyápirini. ¹⁷‘O wimónariŋjépi oemini.’ wimónariŋjépi gíyí gíyí nioni searéwapiyariŋjépi náni níjía nimóniri re yaiwipaxírini, ‘Gorixoyá diŋjéyo dání ría nearéwapiyarini? Xío xegí diŋjéyo dání ría nearéwapiyarini?’ niyaiwiri níjía imónipaxírini. ¹⁸Ámá go go xío xegí diŋjéyo dání nirirínáyí, ámá weyí onimépyiniri yariŋjéni. E neri aí ámá níni ámá xíomi uowárenapiŋomi weyí oumépyiniri yariŋjé, o aga nepaxinorini. Yadiŋjépi yariŋjéni. ¹⁹Eŋjíná Moseso ŋwí ikaxí niriniri eániŋjépi miseaiapipa reŋinigini? E neri aí soyínéyá wo aí ŋwí ikaxí eániŋjépi pírániŋjépi xidariniŋjémani. Pí náni soyíné nioni nipíkianiro yariŋjépi?” uríagi ²⁰ámá e epíroyí egíáyí re urigíawixini, “Imíó xixéroariŋjé roxini, ámá gíyí ripíkianiro yariŋjépi rariŋjéni?” uríagi ²¹Jisaso re uriŋinigini, “Nioni emimí ná bini éagi seyíné sini ududí ikárinariŋjépi. ²²Moseso ŋwí

ikaxí ‘Segí niaíwíyo nixirimáná síá wé wíumi dánj wau wo múróána síá ayimi iyí símí síó wákwíríxini.’ riñírini. E niseariri aiwi ayí Moseso maríái, negí aríowa síwí apí érowiápínigíárini. Ayináni seyíné segí niaíwíyí ñwí ikaxí riniñipi nixídirinípimi dání nanj oimónípoyiniri Sabariáyo aiwi iyí símí síó wákwiarigíárini. ²³Seyíné ‘Nanj nerane ñwí ikaxí Moseso niriri eañipi píri miwiaíkpa oyaneyi.’ nyaiwiro Sabariáyo eni iyí símí síó wákwiarigíárini. Seyíné e yarigía eñagi nání pí nání nioni ámá womi Sabariáyo nanj wimixiápi nání wikí nónarinjoí? ²⁴Siñwí tñini niwinaxídiro mirípa époyi. Xío yariñagípi eni mí nómixiríná ríríxini.” uriniginini.

Jisaso nání “Kiraisoríani? Woríani?” rinigía nánirini.

²⁵Ámá Jerusaremi ñweagíáyí wí re nira ugíawixini, “Ámá ro ámá nipikianiro egío menirani? ²⁶Siñwí winípoi. Ámá nñni aría egíe siñáni nirori rariñagi aí mebá neameñweagíáwa omi xwíyía bi murarinjoí. Awa ‘Ámá ro Kiraiso, ámá yeáyí neayimixemeanía nání aríowayá xwíá piaxíyo dání iwiaronfoyi rariñwáo, ayí oríani?’ miyaiwipa riyarinjoí? ²⁷E neri aí ‘Ámá o Kiraiso, ámá aríowayá xwíá piaxíyo dání iwiaronfoyi rariñwáoríani?’ waiwipaxí menini. Ayí rípi nánirini. Nene xináf xíomí xiriñe nání nijíá imóniñwini. E neri aiwi Kiraiso, ámá Gorixo yeáyí neayimixemeanía nání urowárenapínío imóniníániyí ámá wo ‘E dánorini.’ ripaxí menini. Ayináni ‘O Kiraisoríani?’ waiwipaxí mimóniñwini.” rariñagía ²⁸Jisaso añj ridiyowá yarigíiwámí dání nuréwapiyiríná eñj tñi niriri re uriniginini, “Seyíné nepa nioni nání nijíá ero ‘O e dánorini.’ ripaxí imóniro yarigíáyínérani? Nioni gí diñj tñi biñámáni. Nepaxiñj imóniño —O soyíné majíorini. O nioni nirowárenapiñirini. ²⁹O tñj e dání biñáoni eñagi nání o nioni nijíárini. O nioni nirowárenapiñirini.” uríagi nání ³⁰omi íá xiraniro nero aiwi íá xiripaxíná sini mimóniñagi nání íá bi mixirigíawixini. ³¹E neri aí ámá e epíroyí egíáyí obaxí wí diñj niwikwírore re nira ugíawixini, “Kiraiso, ámá yeáyí neayimixemeanía nání aríowayá xwíá piaxíyo dání iwiaronfoyi rariñwáo nimóniríná emímí ámá ro yariñípimi nimúrori eníarani? Oweoi.” rigíawixini.

Jisasomi íá oxirípoyiniri urowárigía nánirini.

³²Parisiowa ámá e epíroyí egíáyí Jisaso nání ikeagígwí e rariñagía aría niwiro nání awa tñi apaxípaniñj imónigía xwéowa tñi diñj axípi nixiriro Jisasomi íá oxirípoyiniri ridiyowá yarigíiwámí awí mearoarigía wami urowárigía awa nuro o uréwapiyariñe rémógía ³³Jisaso re uriniginini, “Seyíné tñi re bi onimiápi niñweámoni gí nirowárenapiño tñe nání umíarini. ³⁴Ríxa úáná seyíné nioni nání píá niñiro aiwi wí siñwí nanipíríámáni. Seyíné nioni ñweámíáé upaxí wí mimóniño.”

uríagi ³⁵Judayí ámináowa re rinigíawixini, “O gimi nání uminiri rarini? Aga gimi nání úaná nene o nání piá meginaníwárinini? Negí ámáyi Gírikíyi aŋíyo ŋweagíami nání nuri émáyo uréwapiyimíániri ría neararini? ³⁶Xwíyá o re rípi, ‘Seyíne nioni nání piá niniro aiwi wí siŋwí nanipíríamani. Seyíne nioni ŋweámíae upaxí wí mimóniŋoi.’ rípi pí niyaiwiri ría riŋoi?” rinigíawixini.

Inigi oyía tíŋi nání uriŋi nánirini.

³⁷Síá aiwá api imixarigíáyí yoparíyi —Ayi seáyi e imóniŋíyirini. Síá ayi imóniŋáná Jisaso éi nirori eŋi tíni re riŋinigini, “Ámá inigi nání gwíni yeáyí wí giyí giyí nioni tíamini nibiro inigi onípoi. ³⁸Nioni diŋi nikwíróiá giyí giyí Bikwíyo niriniri eániŋi ripi tíni xixeni imónipírói, ‘Wigí xwioxíyo ná ínimi dání inigi diŋi niyimiŋi imixariŋipi oyía tíŋi pweníarini.’ niriniri eániŋiŋi tíni xixeni imónipírói.” uriŋinigini. ³⁹Jisaso e níríríná kwíyí Gorixoyá xíomi diŋi wikwíróiáyí meapíríapi nání e uriŋinigini. Íná Jisaso sini aŋínami niŋeyiri mikínipa éiná eŋagi nání Gorixo sini xegí kwíyípi ámáyo sixí mumímopa yagínarini.

Jisaso nání diŋi xixegíni tíni nepayoro rigíá nánirini.

⁴⁰Ámá e epíroyí egíáyí o e rariŋagi aría níwiro wí re nira ugíawixini, “Aga neparini. Ámá ro wía rókiamoagi nene xwayí naniri ŋweaŋwáorini.” nira waríná ⁴¹wí re nira ugíawixini, “Ámá ro Gorixo yeáyí neayimixemeanía nání aríowayá xwía piaxíyo dání iwiaroníoyi rariŋwáo, Kiraisorini.’ neaimónarini.” nira waríná wí re nira ugíawixini, “Gariri piropeniŋíyo dánŋi wo Kiraiso, ámá aríowayá xwía piaxíyo dání iwiaroníoyi rariŋwáo imónipaxírani? Oweoi, e dánŋi wo ámá aríowayá xwía piaxíyo dání iwiaroníoyi rariŋwáo imónipaxí menini. ⁴²Bikwíyo re mirinípa reni, ‘Kiraiso, aríowayá xwía piaxíyo dání iwiaroníoyi rariŋwáo negí arío Depitoyá íwiáriawé wo imóniníarini. Aŋi Betirexemi —Eŋíná Depito xegí ŋweaagerini. Omi e dání xiriníarini.’ mirinípa reni?” nira nuro nání ⁴³ámá e epíroyí egíáyí o nání diŋi xixegíni tíni nepayoro níríróná ⁴⁴wí “Rixa íá oxiraneyi.” niwimóniri aiwi omi íá bi mixirigíawixini.

Judayí mebaowa Jisasomi diŋi miwikwírogíá nánirini.

⁴⁵Ridiyowá yarigíiwámi awí mearoarigíáwa ámi nuro apaxípániŋi imónigíá xwéowami tíni Parisiowami tíni wímeááná awa re urigíawixini, “Pí nání omi íá mixirí anipáoyíné baríŋoi?” uríagiá ⁴⁶awí mearoarigíáwa re urigíawixini, “Eŋíná aiwi ámá o nearéwapiyariŋípa wo mĩnearéwapiyagírini.” uríagiá ⁴⁷Parisiowa ikayíwí nuriro re urigíawixini, “Soyíne eni rixa diŋi niseakinimixiri xerŋwími niseaipemeámi mupa reŋoi?” nuriro ⁴⁸re urigíawixini, “Seameŋweaŋwáone worani, Parisione

worani, omi diñí bi wikwíróirani? Oweoi! ⁴⁹E neri aí áamá epíroyí egíá jíayí ñwí ikaxí niriniri eáñiñipi náni píráníñi nijíá mimónipa nero náni Gorixoyá siñwíyo dání anínipíría náni ramixáriníñiyírini.” uríagía ⁵⁰Nikodimaso —O eni Parisi worini. Xámi áriwiyimi nuri Jisasomi niwímeari yariñí wiñorini. O niwiápinimeari re uriñinigini, ⁵¹“Negí ñwí ikaxí niriniri eáñiñíyo bi ripi ririnini, ‘Ámá womi xío rinariñipi aríá miwipa eri o yariñipi píráníñi nijíá mimónipa eri nemáná anani xwiyíá umeáripaxírini.’ ririnini?” uríagi ⁵²awa ikayíwí re urigíawixini, “Joxi eni Gariri dájí iwoxíríani? Bikwíyo píráníñi íá rori píá meri nerínáyí, joxi re niyaiwiri nijíá imóniríni, ‘Wíá rókiamoariñí wo Gaririyo dání imónariñimani.’ niyaiwiri nijíá imóniríni.” urigíawixini.

Apixí íwí iniñí wími xwirixí umeagíá nánirini.

⁵³Ámá níni wigí añí xixegíniyo umíagía aiwi

8 ¹Jisaso díwí xegí yoí Oripiyo náni nuri ²sá weño wíá móniñími ámi niwiápinimeámi nibiri añí ridiyowá yarigíiwámi nipáwiri áamá níni xío tífámini bariñagía náni o éi niñweámáná uréwapiyaríná re eñinigini. ³Ñwí ikaxí eáñiñipi mewegíawa tñni Parisiowa tñni awa apixí áamá wí íwí inariñagi winimeáíá wími niméra nibiro áwini e éi nurárárimáná ⁴omi re urigíawixini, “Nearéwapiyariñoxini, apixí rí íwí inariñagi winimeáírini. ⁵Apixí ríniñi imóniñíyí náni ñwí ikaxí Moseso níriri eañipimi dání re rinini, ‘Síñá tñni iwaní nearo pikírixini.’ riniñagi aí joxi píoi ríríni?” urigíawixini. ⁶Ríwéná o Moseso riñipi niwiaíkiri xegí bí ríípimi dání xwiyíá uxekwímoaneyinero iwamíó niwíwapiyiro e uríagía aiwi o ípípá éi niñweámáná xwíáyo webíá tñni ríwamiñí neari ⁷awa aríki ámi ámi yariñí wiayariñagía o ámi éi nirori re uriñinigini, “Soyíné woxi goxi íwí bi miyariñoxi xámi ími síñá eai.” nurimi ⁸ámi ípípá éi niñweari xwíáyo ríwamiñí eaaríná re eñinigini. ⁹Awa Jisaso e uríagi aríá niwiro woni woni Jisaso tññi e píní niwiárimini nuróná ámináowa xámi numearo níni rixa núáná apixíni xegí xewini Jisasoyá símí e éi roñagi niwiniri ¹⁰ámi éi nirori ími re uriñinigini, “Ineyi, ámayí giminirini? Ayí wo xwiyíá mirimearíirani?” uríagi ¹¹í re uriñinigini, “Ámináoxini, wo xwiyíá minimearíirini.” uríagi Jisaso re uriñinigini, “Nioni eni xwiyíá wí rimeariméini. Dixí añí ui. Re dání ámi íwí bi minipa éirixini.” uriñinigini.

“Nioni áamá náni uyíwíniñi imóniñáonirini.” uriñi nánirini.

¹²Jisaso ámi re uriñinigini, “Nioni áamá xwíá tíyo ñweagíá niyoni uyíwí wíániñi wókímixariñáonirini. Ámá nioni níxídíáyí síá yiniñimíni añí emepíría menini. Wíá diñí niyimiñi tígíáyí imixipaxí imóniñipi wókímixiniárini.” uríagi náni ¹³Parisiowa re urigíawixini, “Joxi e ríipi jiwaniñoxi símeaní míkoxíniñi nimóniri áwaní rinariñagi náni

'Neparini.' niyaiwirane aría seaianiméwini." uríagía ¹⁴Jisaso re uríjiginini, "Nioni aí niwaniñoni náni áwanj rinaríjápí, ayí neparini. Ayí ripi náni searariñini. Ge dáni ría biñaniginiri gimí náni umíárianiri imóniñipi náni nijía nimóniri náni searariñini. E neri aí soyíne nioni bijaé nánirani, nioni umíae nánirani, majía nimóniro náni nirariñoi. ¹⁵Soyíne áma xwía tíyo dánjyí yarigíapa siñwí tñini niwinaxídiro rariñagía aí nioni áma womi aí siñwí tñini niwinaxídiri xwiyía numearariñini. ¹⁶Nioni xwiyía numeariri siñwiriyí, nioni gí diñj tñi mepa neri ápo, nirowárenapiñoyá diñjyo dáni neri náni nepa xixeni imóniñipi tñi umearipaxíri. ¹⁷Segí ñwí ikaxí eániñjyo aí re niriniri eánini, 'Áma waú xwiyía áwanj niriríná axípi ni nirirínáyí, xwiyía api nepa imónini.' niriniri eánini. ¹⁸'Nioni niwaniñoni náni áwanj searini ápo, nirowárenapiño eni nioni náni áwanj seariri yariñagi náni soyíne nioni searariñapi náni "Neparini." yaiwipaxíri." uríagi ¹⁹awa re urigíawixini, "Dixí ápo ge ñweani?" uríagía o re uríjiginini, "Soyíne nioni náni nijía mimónipa ero gí ápo náni nijía mimónipa ero yariñoi. Soyíne nioni náni nijía nimóniro siñwiriyí, gí ápo náni eni nijía imónaniro éfári." uríjiginini. ²⁰Añj ridiyowá yarigíwámi Gorixo náni nigwí tarigía tñj e dáni nuréwapiyiríná xwiyía api urariñagi aiwi omi ía xiripíríná sini mimóniñagi náni ía bi mixirigíawixini.

"Nioni umíae náni soyíne wí upaxí menini." uríj nánirini.

²¹O ámi re uríjiginini, "Nioni píni niseawiárimi úaná soyíne nioni náni píá niniro aí segí íwí yarigíapi sini yokwarimí miniñaná pepíríarini. Nioni umíae soyíne bipaxí wí mimóniñoi." uríagi ²²Judayí ámináowa re nira ugíawixini, "O 'Nioni umíae soyíne bipaxí mimóniñoi.' ríagi náni xewaniño pikíniminiri náni minearipa riyarini?" nira waríná ²³o re uríjiginini, "Nioni erami dánonirini. Soyíne birami dánoyínérini. Soyíne xwía tíyo dánoyínérini. Nioni xwía tíyo dánonimani. ²⁴Ayináni re searíni, 'Segí íwí yarigíapi sini yokwarimí miniñaná pepíríarini.' searíni. Ayí ripi searariñini. Soyíne diñj ninikwíro 'Ayí orini.' miniaiwipa nerónáyí, segí íwí yarigíapi sini yokwarimí miniñaná pepíríarini." urariñagi ²⁵awa re urigíawixini, "Goxirini?" uríagía Jisaso re uríjiginini, "Nioni iwamíó dáni searagáoni onirini. ²⁶Soyíne yarigíapi náni xwiyía searimearimi náni xwiyía xwapí xiriñáonirini. Soyíne aría miniariñagía aiwi nioni nirowárenapiño nepaxiñorini. Amipí omi aría wiñapi áma níni aría egie dáni rariñarini." uríagi aiwi ²⁷ayí majía nimóniro "Ápo Gorixo náni ría neararini?" miyaiwariñagía náni ²⁸Jisaso re uríjiginini, "Soyíne áma imóniñáoni íkíayo niyekwiroáripíri seáyí e ninimíeyoaríná nijía 'Ayí orini.' imónipíríarini. Nioni gí diñj tñi amipí bi yariñamani. Ápo niréwapiyiniñipi rariñarini. ²⁹Íníná nioni nirowárenapiño yayí winipaxípiñi yariñagi náni nioni píni niníwiárimi

minú sini diñí níkikayoni.” uriñinigini. ³⁰Xwiyá api uraríná áamá obaxí diñí wikwírogíawixini.

Áamá áxeñwarí inigíáyí nání uriñí nánirini.

³¹Jisaso Judayí omi diñí wikwíróíayo re uriñinigini, “Seyíné gí xwiyá rariñápi diñí íá nixirirónáyí, nioniyá gí seaiepisariñá nepaxiñíyíné imóniñoi. ³²Xwiyá nepaxiñí imóniñipi nání nijá nimóniro e nemáná xwiyá api diñí íá nixiririñípimi dání áxeñwarí minigíáyíné imónipírírini.” uríagi ³³wa re urigíawixini, “Negí arío Ebiríamoyá íwiáriawenerini. Eníná dání áamá wayá xináíwanéniñí nimónirane omiñí miwiiagwaéne, joxi arige neri ‘Áxeñwarí minigíáyíné imónipírírini.’ nearariñini?” uríagía ³⁴Jisaso re uriñinigini, “Aga nepa searariñini. Áamá íwí yariñí go go íwí xío yariñípiyá xináíniñí nimóniri áxeñwarí wini. ³⁵Áamá xináíwániñí nimóniro omiñí wiariñíyáyí aniñí añiwámi xiáwo tñni ñweaarigíamani. E neri aí xewaxo íníná aniñí e ñweaaríñirini.” nuriri áamá e rówapigíáyí re oyaiwípoyniri, “ ‘Seyíné xináíwayínéniñí nimóniro omiñí wiariñíyáyíné yapi imóniñoi.’ ría neararini?” oyaiwípoyniri ewayí xwiyá api nuriri ³⁶re uriñinigini, “Ayináni xewaxoni xináíwayínéniñí nimóniro omiñí wiariñíyáyíné áxeñwarí seainiñipi anipá seaimixiyáná aga áxeñwarí minigíáyíniñí imónipírírini.” nuriri ³⁷re uriñinigini, “Nioni nijárini. Seyíné arío Ebiríamoyá íwiáriawéyínérini. E nimóniro aí seyíné gí xwiyápi segí xwioxíyo aumaúmí miníí eñagi nání nioni nipíkianiro nání yariñoi. ³⁸Nioni ápo tñni niñwearíná siñwí winiñápi nání rariñáini. Seyíné eni amipí segí ápo rariñagi aría wigíápi yariñáini.” uriñinigini.

‘Segí ápo oborini.’ uriñí nánirini.

³⁹Awa re urigíawixini, “Negí arío Ebiríamorini.” uríagía Jisaso re uriñinigini, “Nepa Ebiríamoyá íwiáriawéyíné eñánáyí, xío yagípa epaxíri. ⁴⁰E neri aí nioni xwiyá nepáni Gorixomi aría wiñápi searariñáoni ninipíkianiro yariñoi. Soyíné nianiro yariñápa arío Ebiríamo wí e meñinigini. ⁴¹Ayináni re searíni, ‘Segí ápo yariñipi yariñoi.’ searíni.” uríagi ayí re urigíawixini, “Negí inókiwa íwí niniro neaxirigíamani. Negí ápo imóniño ná woni Gorixorini.” uríagía ⁴²Jisaso re uriñinigini, “Nioni gí diñí tñni biñámani. Gorixo nirowárénapíagi o tññí e píni niwiárimi biñá eñagi nání Gorixo nepa segí ápo eñánáyí, soyíné nioni diñí sixí niyipaxíri. ⁴³Soyíné nioni xwiyá raríná aría nero aí pí nání nijá mimónipa yariñoi? Ayí ripi nánirini. ‘Xwiyá aría owianeyi.’ miseaimónariñagi nání nijá mimónipa yariñoi. ⁴⁴Soyíné niaíwí segí ápo oboyáoyíné eñagía nání xío wimónariñípa niaíwíyíné eni ‘Axípi oyaneyi.’ seaimónariñirini. O eñíná dání áamáyo pikíxwiríó yagorini. Nepa bí miripaxí imóniño eñagi nání pí pí xwiyá níríríná yapíni rariñorini. O

yapí rariño imóniri áamá yapí rariǵiá niyíyá xanóniǵi imóniri enjagi náni gíni gíná yapí niriríná sa mǵkí xío imóniǵipi tǵni xixeni rariǵirini. ⁴⁵E neri aí nioni nepaxiǵi imóniǵipini searariǵagi náni ‘Neparini.’ niyaiwiro diǵi minikwíroariǵoi. ⁴⁶Soyíné goxi íwí náni xwiyíá nimeáripaxírini? Oweoi, wí xwiyíá nimeáripaxímani. E neri aí nioni nepáni seararíná pí náni ‘Neparini.’ niyaiwiro diǵi minikwíroariǵoi? ⁴⁷Ámá Gorixoyáyí xwiyíá xíoyápi aríá wiarigíárini. Soyíné Gorixoyáoyíné mimóniǵagiá náni xwiyíá oyápi aríá miniarǵoi.” urinǵini.

“Arío Ebiríamo sini meǵaná nioni ǵweaagárini.” urinǵi nánirini.

⁴⁸Judayí ámináowa omi ikayíwí re urigíawixini, “None joxi re niririranéná, ‘Ámá sipí roxiyí Samariayí woxirini. Imíó xixéroariǵi roxini.’ niririranéná xixeni miriripa réwini?” uríagiá ⁴⁹Jisaso re urinǵinigini, “Nioni imíó diǵi minixixéroarinini. Gí ápomí wé íkwianǵwíyo uǵwirárarariǵagi aí soyíné wé íkwianǵwíyo mininǵwirárarariǵoi. ⁵⁰Nioni gí diǵi tǵni seáyí e imónimíániri miyarǵagi aiwi wo nioni náni ‘Seáyí e oimónini.’ naiwífoyí soyíné tǵni nioni tǵni neapayonío ǵweani. ⁵¹Aga nepa searariǵini. Ámá giyí giyí xwiyíá nioniyápi nixídirínáyí, wí nipepíríámani.” uríagi ⁵²Judayí ámináowa re urigíawixini, “Joxi e rariǵagi náni rixa niǵjá re imóniǵwini, ‘Joxi imíó xixéroariǵi woxini.’ niǵjá e imóniǵwini. Arío Ebiríamo tǵni wíá rókiamoagiáwa tǵni pegíárini. E éagiá aí joxi re rariǵini, ‘Ámá giyí giyí xwiyíá nioniyápi nixídirínáyí, wí nipepíríámani.’ rariǵini. ⁵³Joxi negí arío Ebiríamo peǵomi seáyí e miwimóniǵoxirini.’ neaimónarini. Wíá rókiamoagiáwa ení pegíárini. Joxi gonirini yaiwinariǵini?” uríagiá ⁵⁴Jisaso re urinǵinigini, “Niiwanǵoni seáyí e nimíeyoánirínáyí, surímá imónáripaxírini. Seáyí e nimíeyoariǵo, ayí gí áporini. O náni soyíné ‘Negí ǵwíáorini.’ rariǵíárini. ⁵⁵E niriro aí xío náni nepa niǵjá mimóniǵoi. E neriǵi aiwi nioni niǵjárini. ‘O nioni majíárini.’ nirirínáyí, nioni soyínéniǵi yapí rariǵáoni imónipaxírini. E neri aí o nioni nepa niǵjá nimóniri náni xwiyíá oyápi xídariniǵini. ⁵⁶Segí arío Ebiríamo síá nioniyáyi náni ‘Siǵwí winimíárani?’ niyaiwiri náni yayí wininǵinigini. Oyi, o siǵwí ninaniri yayí seáyimi dáni wininǵinigini.” uríagi ⁵⁷Judayí ámináowa re urigíawixini, “Joxi sini xweyaǵoxi meǵnyí ‘Arío Ebiríamomi siǵwí winagáonirini.’ rirariǵini?” uríagiá ⁵⁸Jisaso re urinǵinigini, “Aga nepa searariǵini. Arío Ebiríamo sini meǵaná nioni xámi ǵweaagárini.” uríagi ⁵⁹awa “ ‘Gorixo tǵni xixeni imóniǵoríani?’ oniaiwípoyniri ría neararini?’ niyaiwiro omi siǵá eaniro náni siǵá meáagiá aiwi xewaniǵo re enǵinigini. Yumí nimóniri anǵ ridiyowá yarigíwámi dáni peyeaǵinigini.

Siǵwí supáriǵi womi naǵi imixiǵi nánirini.

9 ¹E nemo niǵpuríná weniǵi éiyí wininǵinigini. Ámá wo xinái xiriǵe dáni siǵwí supáriǵi néra uǵo ǵweaǵagi wináná ²xegí wiepáariǵowa

eni siŋwí niwiniro yariŋí re wigíawixini, “Nearéwapiyariŋoxini, íwí go eŋípimi dáni xinái siŋwí supáriŋí ro xiriŋírini? Xíó éagi nánirani, xaniyaú éagí nánirani?” yariŋí e wíagía ³Jisaso re uriŋinigini, “Ámá ro íwí éagi maríái, xaniyaú eni íwí éagí maríái, sa omi dáni emimí Gorixoyá siwániŋí ininía náni e eŋo xiriŋírini. ⁴Agwi sini ikwáwiyíná imóniŋáná emimí nirowárenapiŋo ‘E éwinigini.’ yaiwiariniŋí éwanigini. Áríwiyíná ámá wo emimí mepaxí imóniŋíná rixa aŋwi e eŋagi náni rariŋini.” uriŋinigini. Diŋí re oyaiwípoyiniri, “Xíomi pikíáná áríwiyiniŋí imóniniŋírini.” oyaiwípoyiniri e nuriri ⁵ámi re uriŋinigini, “Nioni xwíá tíyo niŋwearíná ámá niniyí náni wíá wókímixiniŋini.” nurárimi ⁶xwíáyo reawí núrímáná xwíá tñni reawí tñni yiyí nídiri ámáoyá siŋwíyo xópé niwimáná ⁷re uriŋinigini, “Joxi nuri ipí Siroamiyi riniŋíwámi náni —Yoi míkí ayí mewárininiŋí nánirini. E riniŋíwámi náni nuri símimaŋíyo wayí rónei.” urowáriagi o nuri símimaŋíyo wayí nirónimáná re eŋinigini. Rixa siŋwí aniŋo biŋinigini. ⁸Rixa siŋwí aniŋo bariŋagi ámá aŋí xío tñŋí e ŋweagiáyí siŋwí e niwiniro siŋwí supáriŋo eŋagi náni éí niŋweámáná aiwá náni rixiniŋí urago bariŋagi siŋwí niwiniro re nira ugíawixini, “Ámá royí e niŋweámáná aiwá náni rixiniŋí nearariŋo meniŋani?” nira waríná ⁹wí re nira ugíawixini, “Ayí orini.” nira waríná wí “Oweoi, ayí o yapi imóniniŋí worini.” nira waríná xewaniŋo aríkí re uriŋinigini, “Nioni onírini.” urariŋagi ¹⁰ayí re urigíawixini, “Joxi arige neri dixí siŋwí oxoáini?” uríagía ¹¹o re uriŋinigini, “Ámá Jisasoyi rariŋíoxo xwíá bimi reawí núriri yiyí nídiri gí siŋwíyo xópé ninimáná re niriŋoi, ‘Joxi ipí Siroamiwámi náni nuri wayí rónei.’ niriŋíagi nioni nuri wayí niróniríná re éini. Siŋwí noxoari aníni.” uríagi ¹²ayí re urigíawixini, “Ámá o ge ŋweani?” uríagía o “Nioni majíarini.” uríagi ¹³⁻¹⁴ámá ayí síá Jisaso xwíápimi reawí núriri yiyí nídiri omi siŋwí naní wimixiniŋí Sabariáyí eŋagi náni ámá xámi siŋwí supáragomi Parisiowa tñŋí e náni niméra nuro wáráná ¹⁵Parisiowa eni omi yariŋí re wigíawixini, “Joxi arige neri siŋwí oxoáirini?” uríagía o re uriŋinigini, “O xwiriŋwí bi tñni gí siŋwíyo xópé níáná nioni nuri wayí niróniríná siŋwí oxoáini.” uríagi ¹⁶Parisiyí wía re nira ugíawixini, “Ámá o Sabariá náni ŋwí ikaxí riniŋípipimi xopirárí niyayiri náni Gorixo tñŋí e dáni biŋomani.” nira waríná wía re nira ugíawixini, “Ámá íwí yariŋíyí wo eŋánáyí, arige neri emimí o yariŋípiŋiniŋí imóniniŋí epaxírini?” nira nuróná diŋí xixegíni tñni nepayoro náni ¹⁷ámi siŋwí supáragomi re urigíawixini, “O dixí siŋwí roxaóí eŋagi náni pí ámáoxini rariŋini?” uríagía o re uriŋinigini, “O Gorixoyá wíá rókiamoariŋí wo meniŋani?” uriŋinigini.

¹⁸O xegí siŋwí oxoáiyí náni pírániŋí áwaní urariŋagi aiwi xámi siŋwí supáragomi aiwi Judayí ámináowa aríá miwipa nero re yaiwigíawixini, “Nepa siŋwí supárago ámi siŋwí maniŋorini.” niyaiwiro “Ámá siŋwí oxoáoyá xaniyaú obípiyi.” niriŋo ayaú rixa báná ¹⁹yariŋí niwiróná

re urigíawixini, “Niaíwí ayagwíyáorani? Ayagwí re rirariñi, ‘Xináí nixiriríná siñwí supáriño xiriñirini.’ rirariñi? E xiriñi eñánáyí, arige neri agwi siñwí noxoari anarini?” uríagía ²⁰xaniyaú re urigísixini, “Ayí yegí íwo eñagi náni yayawi nijjárini. Xináí nixiriríná siñwí supáriñi eñyí náni eni yayawi nijjárini. ²¹E neri aí agwi o siñwí oxoáiyí náni yayawi majjárini. Siñwí supáriñiyí woxoáo náni eni yayawi majjárini. Xewaniñomi yariñi wípoyi. Sini onomani. Xewaniño náni áwaní osearini.” urigísixini. ²²Xaniyaú Judayí ámináowa náni wáyí winíagi náni e urigísixini. Ayí ripi nánirini. Judayí ámináowa re rinárigíá eñagi náni, “Ámá giyí giyí Jisaso náni waropári nero ‘ “O Kiraiso, ámá yeáyí neayimixemeanía náni aríwayá xwíá piaxíyo dáni iwiaroníoyi rariñwáorini.” neaimónarini.’ ránáyí, rotú añíyo dáni yoi emi kwírimoaníwárinini.” ²³rinárigíá eñagi náni xaniyaú re urigísixini, “Onomani. Xewaniñomi yariñi wípoyi.” uríagí ²⁴Parisiowa ámi “Siñwí supárago obini.” niriro o rixa báná re urigíawixini, “Joxi Gorixomini seáyí e numíeyoari waropári inei. Ámá ‘Naní nimixiñoi.’ rariño íwí yariñiyí wo eñagi náni none nijjárini. Ayináni waropári inei.” uríagía ²⁵o re uriñinigini, “O íwí yariñorani? Nanorani? Nioni majjárini. E neri aí ripi náni nioni nijjárini. Xámi siñwí supáragáoni aiwi agwi o níípimi dáni siñwí noxoari aniñini.” uríagi ²⁶awa re urigíawixini, “O pí sífrini? Arige neri dixí siñwí roxoáirini?” uríagía ²⁷o re uriñinigini, “Nioni rixa áwaní searíagi aí aría miniariñoi. Arige niyaiwiro ‘Ámi aría osianeyi.’ nirariñoi? Soyíné eni rixa xegí wiepisariñiyíniñi imónaniro miripa riyariñoi?” uríagi ²⁸awa ikayíwí numeariro re urigíawixini, “Xewaniñoxini xegí wiepisariñiyí woxirini. None neaiepisagi Mosesoyáonerini. ²⁹None Mosesomi xwiýíá Gorixo uriñipi náni nijía imóniñwini. E neri aí ámá oyí e dánorfaniri none majjárini.” uríagía ³⁰ámá o re uriñinigini, “Soyíné rarigíapi ududí ninipaxí rariñoi. Soyíné o biñe dáni majía eñagía aiwi o gí siñwí noxaóirini. ³¹Ámá íwí yariñiyí Gorixomi rixiñi uráná aría miwipa yariñi eñagi náni nene nijjárini. E neri aí ámá go go Gorixomi wéyo numeri xío wimónariñipi nixídirínáyí, Gorixo ámáomi aría niwiri xío rixiñi urariñipi náni arirá wipaxirini. ³²Aga eñiná dáni aí nene aría wí re miwiñwárinini, ‘Ámá wo niwiápínimeari xináí xiriñe dáni siñwí supáriñi womi siñwí oxoáinigini.’ rariñagía aría miwiñwárinini.” nuriri ³³re uriñinigini, “Ámá o Gorixo tíñi e dáni mibipa neri siñwiriýí, xío yariñipi bi epaxí imónimíniri éímani.” uríagi ³⁴awa mixí re urigíawixini, “Íwí niniriñipimi dáni rixiriñoxini, joxi none rinearéwapiyariñini?” nurimáná xegí yoi emi kwírimogíawixini.

Siñwí supáriñiñi imónigíayí nánirini.

³⁵Jisaso “Ámá siñwí supáragoyá yoi kwírímóoi.” rariñagía aría e niwiri o náni píá nemerí niwímeámáná re uriñinigini, “Joxi ámá imóniñomi

diñjí riwikwíroñini?” uríagi ³⁶o re uriñinigini, “Ámináoxini, áamá imóniño gorini. Nioni diñjí wikwírómi nání áwanj nirei.” uríagi ³⁷Jisaso re uriñinigini, “Omí joxi rixa siñwí winiñírini.” nuriri siñáni re uriñinigini, “Joxi tñni rinariñwí roni, ayí onirini.” uríagi ³⁸o re uriñinigini, “Ámináoxini, nioni rixa diñjí rikwíroñini.” nurimi xío tñj e xómiñj niyikwiri yayí wiñinigini.

³⁹Jisaso re riñinigini, “Áamá niyoni epayómía nání xwíá tño nání biñárini. Áamá siñwí supárigíáyiniñj imóniñjyí siñwí anipíri imóniro siñwí anigíáyiniñj imóniñjyí siñwí supáripíri imóniro epíría nání biñáonirini.” riagi ⁴⁰Parisi xío tñni añwi e rówapigíáwa re urigíawixini, “None nání eni ‘Siñwí supárigíoyínérini.’ rinearariñini?” uríagi ⁴¹Jisaso re uriñinigini, “Soyíné siñwí supárigíoyíné siñwiriyí, ríwí nimoarigíápi nání xwiýíá meárinipaxímani. E neri aí soyíné ‘Siñwí anijwáonerini.’ niriro nání ríwí nimoarigíápi nání xwiýíá meárinipíríarini.

Ewayí ikaxí sipisipí awí mearoariño nánirini.

10 ¹“Aga nepa searariñini. Go go sipisipí xwíná íwíyo mipáwipa neri wí e dání ogámí neri nipixemoánirínáyí, íwí meariñj wo imónini. Íwí xaurápariñj wo eni imónini. ²E neri aí xwíná íwíyo páwiaríño, ayí sipisipí xiáworini. Awí mearoariñorini. ³O xwíná róniñe nání báná íwí e íníná awí roño ówanj wíkwíáná xiáwo xegí sipisipí nání yoí ráná xiáwoyá mañj aríá niwiri uxídáná niméra nipeyeari ⁴rixa xíoyá níni bíariwámíni eñáná o xámi umearíná sipisipíyí xiáwoyá mañj umiñinariñj eñagi nání númi warigíárini. ⁵Xeñwí womi wí númi uxídipíríméoi. Mañj áamá xeñwí woyá umiñinariñjagi niwiniro nání númi muxídipa nero éi upíráoí.” uriñinigini. ⁶Jisaso ewayí xwiýíá api uríagi aiwi xío api nání nijíá oimónipoyiniri uréwapiyiminiri yariñjipi nání nijíá mimónigíawixini.

“Sipisipí pírániñj awí mearoariñáoni nionirini.” uriñj nánirini.

⁷O ayí nijíá mimónipa yariñagiá nání ámi ewayí xwiýíá re uriñinigini, “Aga nepa searariñini. Nioni sipisipí xwíná íwíniñj imóniñáonirini. ⁸Nioni sini miñipa eñáná bigíá giyí giyí íwí meaarigíáyiniñj imóniñoi. Íwí xauráparigíáyiniñj eni imóniñoi. E neri aí sipisipíyí wigí mañj aríá miwigíárini. ⁹Nioni niñwaníñoni íwíniñj imóniñáonirini. Giyí giyí nioniýáyómíni íwiapáná yeáyí uyimixemeámíárini. Ará wiwákwíni epíría nání íwiapiro peyearo nero epíríarini. ¹⁰Íwí meariño sipisipíyo pípi wiminiri bariñjmani. Íwí xaurápiri pipikímí eri xwiríá ikixeri wiminiri bariñjagi aiwi xewaniñoni ripi wiminiri biñárini. Ewáraníñj érixiniri diñj niyimiñj imóniñjipi sixí umímómíni bñáonirini. ¹¹Sipisipí nání pírániñj awí mearoariñáoni, ayí nionirini. Sipisipí nání awí pírániñj mearoariñáoni sipisipí arirá wiminiri neríná ‘Nioni nipikíáná ayí

ananirini.’ yaiwiarinjarini. ¹² Nigwi meaminiri awi mearoarinj wo —O sipisipi xiawo nimoniri piraninj awi mearoarino mariai, o sivi sayi sipisipi roaniminiri barinagi niwinirina sipisipi pini niwirimini ei uana sivi sayi rironi eri xixidowari eri yarinirini. ¹³ O sa nigwi nani meaminiri yarino enagi nani sipisipi nani nepa dinj moarinjmani.” nuriri ¹⁴⁻¹⁵ re uriniginini, “Sipisipi piraninj awi mearoarino, ayi nionirini. Apo tni nioni tni xixe mi omixinarigwipa nioni tni sipisipi nioniyay tni eni xixe mi omixinarinjarini. ‘Nioni gi sipisipi imoninjyo arira wiminiri nani nupeirina ayi ananirini.’ yaiwiarinjanirini.” nuriri ¹⁶ re uriniginini, “Nioni sipisipi ami wi —Sipisipi xwina tyo danj imoninjyi mariai, ami wi eni tinjanirini. Ayi wi aninj e xe nweairixiniri sinjwi winipaxi mimoninjini. Ayo eni winiyi tinj e awi nearfimiginini. Ayi gi manj aria niniro xwina tyo danjyi tni nawini imoniro awi mearoarinj na woni axoni tinj imoniro epiriririni. ¹⁷ Ami sinj nimoniri wiapnimeamia nani sipisipyo arira wiminiri nerina ‘Nioni niperina ayi ananirini.’ yaiwiarinagi nani apo dinj sixi niyini. ¹⁸ Nioni ama xe onipikipoyiniri sinjwi miwinipa nerinay, wi ninipikipaxmani. Xe onipikipoyiniri sinjwi winarinjayi giyi mariai, niwaninonirini. Peri ami wiapnimeari emia nani enj sixi eaninjpi tinjanirini. Gi apo o e ewiniginiri sekaxi nirinj eagi nani api e epaxonirini.” uriniginini.

¹⁹ Juday aminaowa Jisaso e rarinagi aria niwiro nani dinj xixegini tni nepayoro bi bi nirinirona ²⁰ wa obaxowa re nira ugawixini “Imio dinj uxieroarinjagi nani xoxwi neri rarini. Pi nani aria wiarino?” nira warina ²¹ wa re nira ugawixini, “Xwiya o rarinjpi imio xixeroarinj wo yapi mirinarinini. ‘Ama imio dinj xixeroarinjyi ama sinjwi suparigiayo sinjwi woxopaxi imoninjo.’ riseaimonarini? Oweoi.” nira ugawixini.

Jisasomi riwi umogia nanirini.

²² Sia Juday enina emayi wa anj ridiyowa yarigiwami xorori nero xwiria ikixegia enagi nani ami piraninj imixaragipi sia api nani dinj winini nani awi neanro yayi yayarigipi imoninana ²³ —Ayi inia eari iminj riri yarinjarini. Ina Jisaso anj ridiyowa yarigiwami nipawiri anj wiameo wig eninanj mixi inayi Soromono nani rininjipimi emearina ²⁴ Juday aminaowa niwimearo mini mini xapixapi numero re urigawixini, “Gina jiwanijoxi nani xe nijia oimonipoyiniri neaririririni? Aninj yumia neairirani? Joxi Kiraisoxi, ama yeayi neayimixemearia nani arıowaya xwia piaxyo dani iwiaronıoyi rarinjwaoxi enanayi, sinjani awanj nearinei.” urigia ²⁵ Jisaso awami re uriniginini, “Nioni rixa awanj searigagi aiwi soyine ‘Nepa neararini.’ niyaiwiro dinj minikwiroarino. Emimi gi apo e ewiniginiri nirinj nioni yarinjapi sinjani awanj ayi orinininj searinjagi a ²⁶ soyine gi sipisipiyineninj mimonipa neri nani nioni dinj minikwiroarino. ²⁷ Sipisipi nioniyayi gi manj aria niniro

nixídarigíárini. Nioni ayo mí niwómixiri ²⁸ diñí aniñí íniná ñweapíría nání mini wiariñagi nání wí aníñipíría menini. Sipisipí nioniyáyí niniwéú tñi íá xiriñagi nání áamá gíyí nirápipíríárini? ²⁹ Gí ápo sipisipíyí niapiñirini. O áamá niyoni seáyí e wimóniñagi nání nioniyá gí imóniñyí ápo niniwéí tñi eni íá xiriñagi nání áamá gíyí urápipíríárini? ³⁰ Nioni tñi ápo tñi axowawirini.” uríagi ³¹ Judayí ámináowa xámi yaniro egiápa síñá tñi Jisasomi opíkianeyiniro meariñagiá ³² Jisaso re uriñinigini, “Nioni emimí ápo e éwiniginiri niriñipi obaxí seaíwapiyíárini. Gímini gipi seaíwapiyíápi nání síñá tñi nipíkianiro yariñoi?” uríagi ³³ Judayí ámináowa re urigíawixini, “Amipí naní joxi yariñipi wí nání síñá tñi ripíkianiri miyariñwini. Joxi aga áamáoxi eñagi aiwi Ñwíáoniriníñiñi niriniriñipimi dání Gorixomi ripirirí umeariñagi nání ripíkianiri yariñwini.” uríagiá ³⁴ Jisaso xíomi wikí wónarigíápi piyíá owépoyniri re uriñinigini, “Segí ñwí ikaxí eáníñipimi Gorixo re riñipi niriniri meánipa reni, ‘Ñwíáoni re riñanigini, ‘Seyíné eni ñwíáéyíné imóniñoi.’ riñanigini.’ niriniri meánipa reni? ³⁵ Soyíné nijíárini. Xwiyíá Bikwíyo eáníñipi wí surímá rinipaxí mimónini. Ayináni Gorixo segí aríowami ‘Seyíné eni ñwíáéyíné imóniñoi.’ uriñí eñagi nání ³⁶ soyíné pí nání ápo ninirípearí xwíá tíyo nirowárenapiñoni re searána, ‘Nioni Gorixomi xewaxonirini.’ searána pí nání mixí niniriro ‘Joxi Gorixomi ripirirí umeariñini.’ nirariñoi? ³⁷ Nioni emimí gí ápo e éwiniginiri niriñipi mepa nerínáyí, diñí ninikwíro ‘Nepa orini.’ miniaiwipa éfrixini. ³⁸ E niseariri aiwi nioni emimí ápo e éwiniginiri niriñipi nepa nerínáyí, soyíné xwiyíá nioni searariñápi aría niniro diñí minikwíropa nero aí emimí nioni yariñagi síñwí ninaniro nání diñí ninikwíro ‘Ayí orini.’ naiwífrixini. ‘Ápo tñi nawíni imónigíwaurini. Axowaurini.’ niniawiro nijíá imónipíri nání emimí nioni yariñápi diñí ikwírópoyi.” uríagi ³⁹ xámi yaniro egiápa omi íá oxiraneyiniro yaríná anani éí múroniginini.

⁴⁰ Jisaso ámi nuri iniigí Jodani rapáyo nixeri Jono xámi ámáyo wayí umeaiñe nání nuri e ñweañáná ⁴¹ áamá obaxí xío tñí e nání niñiro re rinayigíawixini, “Wayí neameañí Jono emimí wí mepa neri aiwi amipí áamá ro nání riñyí rixa xixeni imónini.” nirinayiróná ⁴² ámi obaxí wí diñí wikwírogíawixini.

Rasaraso peñí nánirini.

11 ¹⁻² Áamá wo, Betani dání Rasarasoyi riniño simixí yaríná — Aní ayí xío xegí xexirímeáipáu Mariaí tñi xinapí Mataí tñi ípaúyá aní eni erini. Mariaí ayí apixí ríwíyo Ámináoyá síkwíyo werixí niwíwayimómáná díá tñi kwíriñirini. Ími xexirímeáo Rasaraso simixí wiariñagi nání ³ xinapixaniñipáu Jisaso tñí e nání xwiyíá re uowárigíisixini, “Ámináoxini, aría ei. Áamá joxi diñí síxí uyariñoyí simixí yarini.” uowáragíí aí ⁴ Jisaso aría e niwiríná re riñinigini, “Simixí o

yariņipi nipeni nánimani. Ámáyi eņi sixi eániņi Gorixoyá siņwí winaniri ero Gorixomi xewaxoni yayí seáyi e dáni nimeaniri ero epíría náni simixí api wímeaņirini.” uriniginini. ⁵Jisaso Mataími tni xinaniņimi tni ípaúmi xexirímeáo Rasarasomi tni ayo diņi sixi nuyiri aiwi ⁶“Rasaraso simixí yarini.” uríagi aría niwiríná ámi síá wíyau xío ŋweaņe ŋweaņiginini. ⁷E niņweaņisáná xegí wiepisariņowami re uriniginini, “Ámi Judia piropeniśyo náni owaneyi.” uríagi ⁸wiepisariņowa re urigíawixini, “Nearéwapiyariņoxini, ayí xámi síá tni ripikianiri egie náni ámi numiniri rinearariņi?” uríagi xío ikwáwiyiņi imóniņagi náni ⁹ewayí xwiyá re uriniginini, “Sogwí íwapié dáni wée náni awá wé wúkaú sikwí waú tñirini. Ámá ikwáwiyíná aņi neríná ná eánariģiamani. Xwía tño wía ókiņagi náni siņwí pírániņi niwinaxída nuro náni ná eánariģiamani. ¹⁰E neri aí ámá árwiyimi aņi neríná ná eánariģiári. Siņwí niwiga upíri wía mókiņagi náni ná eánariģiári.” nuriri ayí re oyaiwípoiņiri “Gorixo wimónariņipi nixídiríná ayí ikwáwiyíná aņi nemeřnániņi ría imónini?” oyaiwípoiņiri ¹¹e nurimáná awami re uriniginini, “Negí nikumixiniri emeariņwáo Rasaraso simixí neri sá weni. E neri aí nioni saiwiáři wiminiri wariņi.” uríagi ¹²wiepisariņowa re urigíawixini, “Ámináoixini, sa sáni niweríná anani naņi imóniņoi.” nuriro ¹³awa “Rasaraso sa sá weņagi náni ría neararini?” niyaiwiro e uríagi aí Rasaraso rixa péi náni ínimi nuriri náni ¹⁴ámi nipikwini siģáni áwaņi re uriniginini, “Rasaraso rixa piyirini. ¹⁵E neri aí soyiné siņwí winipírípi náni yayí ninarini. O simixí yaríná nioni xío tni miņweáá eņagi náni soyiné nioni emíápi siņwí ninaniróná diņi nikwíropíri náni yayí ninarini. O tñi e náni owaneyi.” uríagi ¹⁶Tomaso —O xegí yoí ámi bi Didimasoyi rarigiřirini. O xío tni wiepisariņi wiami re uriniginini, “O tni nawíni peaníwá náni none eni owaneyi.” uriniginini.

¹⁷Jisaso Rasarasoyá aņi tñi e náni aņwi e niřiríná aría re wiņiginini, “O rixa niperi xwáripáyo tigiámi eņáná síá wíyau wíyau pwéřirini.” aría e wiņiginini. ¹⁸Aņi Rasarasoyá Betaniyi riniņe Jerusalemí dáni afwimimani. Sa kiromita waú wo imóniņerini. ¹⁹Ayináni Judia piropeniśyo dāņi obaxí wí xexirímeáo Rasaraso péi náni Mataími tni Mariaími tni ípaúmi ogaņi wianiřo náni niřiro ípaú tni ŋweaņáná ²⁰Mataí “Jisaso barini.” rinariņagiá aría niwiri ói e wirimiaminiri nuri xinaniņi Mariaí sini aņiyo ŋweaņáná ²¹í Jisasomi re urémeaņiginini, “Ámináoixini, joxi re niņweari siņwiriyí, gí niřixímeáo nipéminiri eņimani. ²²E neri aí niini re nipimónarini, ‘Gorixomi pí pí náni yariņi wíyí agwí aí anani xixeni siiniņoi.’ nipimónarini.” uríagi ²³Jisaso re uriniginini, “Dixí riřixímeáo ámi niwiápínimeaniņoi.” uríagi ²⁴Mataí re uriniginini, “O síá yopariyi ámá níni niwiápínimearóná o eni wiápínimeaniápi náni niini niģiári.” uríagi ²⁵Jisaso re uriniginini, “Ámá piyí egíáyí ámi niwiápínimearo siņi epíri náni diņi sixi umímoariģáyí,

ayí nionirini. Nioni diñí níkwírófá giyí giyí nípero aí ámi siñí upíríárini. ²⁶Ámá siñí nero diñí níkwírófá giyí giyí wí anínipíríá menini. Jíxi diñí niníkwírori ‘O nepa ría nirarini?’ riniaiwariñini?” uríagi ²⁷í re uriñinigini, “Oyi, Ámináoxini, níni joxi diñí níkwírori re siaiwariñini, ‘Kiraisoxi, niaíwí Gorixoyáoxiráni? Eníná dáni re rigíoxiráni, “Aríowayá xwíá piaxíyo dáni ámá wo yeáyí neayimixemeaníá náni iwiaroníárini.” rigíoxiráni?’ siaiwariñini.” uriñinigini.

²⁸E nurimí nuri xinaniñí Mariaími “Eini.” nuriri yumíí re uriñinigini, “Nearéwapiyariño níremónapiri jíxi náni ‘Obini.’ rarini.” uríagi ²⁹í aríá e níwiríná anjini níwiápínimeámi Jisaso tíñí e náni uriñinigini. ³⁰Jisaso sini anj e míremónapí sini Mataí tíni órórí inífe ηweañáná ³¹Judayí anjyo Mariaí tíni nawíni niñweámáná ogañí wiarigíáyí í anjini níwiápínimeámi peyeáagi níwiniro xexirímeáoyá xwáripáyo ámixíá eminiri náni wariniri númi úagía ³²Mariaí Jisaso roñe níremori níwiniríná xíoyá sikwí tíñí e nípíknimeari re uriñinigini, “Ámináoxini, joxi re niñweari siñwiriyí, gí nírixímeáo péminiri enímani.” uríagi ³³Jisaso í ámixíá yariñagi níwiniri Judayí í tíni barigíáyí eni ámixíá yariñagía níwiniri wá níwuniri xwioxíyo dáni diñí ría uxeariñagi ³⁴re uriñinigini, “Seyíné omi ge tigíawixini?” uríagi re urigíawixini, “Ámináoxini, níbiri siñwí winei.” uríagi ³⁵Jisaso eni ηwí eañinigini. ³⁶ηwí eáagi Judayí siñwí e níwiniro re rigíawixini, “Omi aga diñí sixí uyiño eñagi náni ría earini?” raríná ³⁷wí re rigíawixini, “Ámá royí siñwí supáriñomi siñwí níwoxoapa eñirani? Rasaraso sini siñí eñími níbiri siñwiriyí, piyí mepa oeniri siñí imiximiniri mepa epaxíríani?” rigíawixini.

Jisaso Rasaraso piyomi siñí imixiniñí nánirini.

³⁸Jisaso ámi wá bí níwuniríná oyá xwáripá —Awá síñá ófyi eñagi náni síñá wo píroárininiñwárinini. Awá tíñí e níremori ³⁹re riñinigini, “Síñá ro riwómópoyi.” uráná peñomi xexirímeái Mataí re uriñinigini, “Ámináoxini, nene omi tíñwaé dáni síá wiyáú wiyáú rixa óriñí eñagi náni rixa piyanj neaeañiñoi.” uríagi ⁴⁰Jisaso re uriñinigini, “Nioni re míriripa réanigini, ‘Jíxi diñí niníkwírorínáyí, eñí eániñí Gorixoyápi siñwí winiríini.’ miriripa réanigini?” uríagi ⁴¹wa síñá emi riwómóáná Jisaso anjínami siñwí nanániri re riñinigini, “Ápoxini, Rasaraso náni rixiñí wuriyíápi aríá níagi náni yayí siariñini. ⁴²Nioni rixiñí riránáyí, joxi íníná aríá niariñagi náni nioni níjía aiwi oxí apixí re rogíá tí diñí níkwíroro ‘Gorixo urowárenapiñoráni?’ oniaiwípoiñiri rirariñini.” nírimáná re eñinigini. ⁴³Eñí tíni níriri ríaiwá re riñinigini, “Rasarase, íwiapei.” ráná ⁴⁴re eñinigini. Peño íwiapiñinigini. Peño íwiapáná írikwí wí wéyo tíni sikwíyo tíni xopixopí róniri rapirapí wú tíni miñíyo xopixopí róniri eñagi náni Jisaso re uriñinigini, “Xopixopí róniñíyí íkwíkeámí níwiro wáripoyi.” uriñinigini.

Judayí ámináowa “Jisasomi opikianeyi.” rinárigiá nánirini.

⁴⁵ Judayí obaxí wí Mariaí tñj e náni bíáyí Jisaso e éagi niwiniro omi dñj wikwírógía aiwi ⁴⁶ wí Parisiowa tñj e náni nuro Jisaso éipi náni áwanj uríagía náni ⁴⁷ Apaxípáníñj imónigiá xwéowa tñi Parisiowa tñi Jisaso náni xwiýá imixaniro náni Judayí mebaowami awí neáariro re niriga ugíawixini, “Ámá oyí emimí ayá wí yariñagi náni arire yaníwáriní?” nira nuríná ⁴⁸ re rinigíawixini, “None o xegí yariñipi xe aníñj néra ouniri siñwí niwinárináyí, ámá nñi omi dñj niwikwíroo neróná Romi dánjyo —Ámá Romiyí rinigíáyí Judayí simañwíyóniñj ínimi wurínigíáyirini. ‘Ámá ayo mixí oxídwáraneyi.’ raríná ayí nibiro negí añj ridiyowá yariñwáiwá pipinamí ero negí ámáyo eni xwiríá ikixero epírixiniri náni ari yaníwáraní?” rinaríná ⁴⁹ wigíyí wo, Kaiapasoyi rinijo —O xwiogwí omi dáni apaxípáníñj imónigíáwami seáyi e wimónijorini. O niwíápínimeari mixí nuriri re uriñinigini, “Soyíné aga nijáá bí mimónigíoyínérini. ⁵⁰ Ripi náni eni dñj neñwipero mimoariñoi, ‘Negí ámá nñi pepírixiniri ayí ríniñj meaaniri éíápi náni ámá ná woni ríniñj api nimeari niperínáyí, negí dñjyo dáni nañrini.’ mimoariñoi.” uriñinigini. ⁵¹ O riñipi xegí dñjyo dáni miriñinigini. O xwiogwí omi dáni apaxípáníñj imónigíáwami seáyi e wimónijo eñagi náni wía nirókiamori réniñj riñinigini, “Jisaso negí Judayo arirá niwiríná upeiniñoi. ⁵² Negí Judayí nánini mariái, Gorixoyá niaíwí imónigíá ami gimi ñweagíáyí eni ámá axíyíniñj imónipíría náni upeiniñoi.” éniñj riagi náni ⁵³ síá ayimi dáni xíomi pikianiro náni mekaxí nira ugíawixini.

⁵⁴ Jisaso xíomi pikianiro mekaxí nira wariñagía náni Judayí tñj e ámi siñániñe memepa neri ámá dñj meañj tñjímimi omiñj tñj e náni nuri añj onimíá bí Ipiremiyi riniñipimi xegí wiepisariñowa tñi nawíni ñweañáná ⁵⁵ síá Añínajo Neamúroagoi riniñyí añwi e imóniñagi náni ámá obaxí síá ayi sini mimónipa eñáná Judayí wigí yariñgíápa Gorixo oneamímíniri igíá eánaniro náni wigí omiñj tñjímimi píni niwíárimí Jerusaremíyo náni nuro ⁵⁶ e dáni Jisaso náni píá nemero añj ridiyowá yariñwáiwá ákiñáyo íniriwámimi éí niromeróná re niriga ugíawixini, “ ‘O aiwá ripi náni wí mibipa epaxírini.’ riseaimónarini?” niriga ugíawixini. ⁵⁷ Apaxípáníñj imónigíá xwéowa tñi Parisiowa tñi Jisasomi íá oxiraneyiniróná re rinárigiá eñagi náni “Jisaso ge ge ñweañagi ámá go go niwiniríná nibiro áwanj nearírixini.” rinárigiá eñagi náni e niriga ugíawixini.

Mariaí werixí nañj bí Jisasomi sikwíyo iwayimoñj nánirini.

12 ¹ Jisaso síá Añínajo Neamúroagoi riniñyí imóninfa náni síá wé wíumi dánj wo sini eñáná o añj Betaniyi riniñe Rasaraso, ámi siñj imixiño ñweañipimi náni nuri ñweañáná ² ámá añj apimi dánj wí aiwá Jisaso náni ríá niyero Mataí aiwá nixeri yanj niwia waríná

Rasaraso áamá Jisaso t́ni aiwá narigíáyí t́ni nawíni niŋweámáná aiwá naríná re eŋinigini. ³ Mariaí werixí awiaxí nigwí xwé roŋí wá —Sixí wíxaú eŋáná xegí saŋí kiro wo imónipaxíwárini. Awá nimeari Jisasomi sikwí sosíayo niwayimómáná xegí d́á t́ni kwikwírini yariná xegí sinadiní áamá aŋiwámi ŋweagíayo niyoni weaáriagi aí ⁴ Isikarioti d́aŋí Judaso —O wiepisariŋowa eni worini. Jisaso náni miyí wurimíaniri imóniŋo, ayí orini. O niwiápínimeari re riŋinigini, ⁵ “Pí náni werixí d́iŋí naŋí eaariŋí awá ámányo K300.00 náni bí nerane nigwí meáwápi áamá uyípeayíyo arirá wiani náni mini miwipa réwini?” riŋinigini. ⁶ O uyípeayíyo d́iŋí sipí niwiri náni e murí íwí meariŋorini. Ayináni nigwí wowíyí o íá nixiriri náni nigwí wa tíapi bi íwí meariŋo eŋagi náni e ríagi ⁷ Jisaso re riŋinigini, “Í niariŋípi xe owiniri siŋwí winípoi. Síá nioni nitipíríáyimi e náni xe oxirini. ⁸ Áamá uyípeayí sini seyíné t́ni aŋiŋí ŋweapíríá eŋagi náni ayo gíní gíná ‘Arirá owianeyi.’ niseaimónirínáyí, anani arirá wipaxírini. E neri aiwi nioni seyíné t́ni nawíni aŋiŋí re ŋweámíá meŋagi náni searariŋini.” uriŋinigini.

**Apaxípániŋí imónigíá xwéowa “Rasarasomi
eni pikíwanigini.” rinigíá nánirini.**

⁹ Judayí obaxí “Jisaso aŋí apimi ŋweani.” rinariŋagía aríá niwiro Jisasomini siŋwí winaniro maríái, Rasaraso, siŋí imixiŋomi eni winaniro bíagía aiwi ¹⁰ Apaxípániŋí imónigíá xwéowa xwiyíá nimixiro “Rasarasomi eni pikíwanigini.” rinigíawixini. ¹¹ Jisaso Rasaraso piyomi siŋí imixiŋí eŋagi náni Judayí obaxí wigí ámináowa tíámini píni niwiárimi nuro Jisasomi d́iŋí wikwíroariŋagía siŋwí niwiniro náni e niriniro mekaxí megíawixini.

**Jisaso Jerusaremiyo nirémoríná mixí ináyí
rémoarigíapa rémoŋí nánirini.**

¹² Áamá obaxí aiwá síá Aŋínajo Neamúroagoi riniŋíyi náni imixarigíapi náni Jerusaremiyo epiroyí egiáyí sá wegíá wíapi t́ni aríá re wigíawixini, “Jisaso Jerusaremiyo re náni barini.” aríá e niwiro ¹³ irimiŋí eaarigíáyí wí nidoro o t́ni óí e órórí inaniro náni nimeámi nuróná apí re nira ugíawixini, “Gorixomi seáyí e oumeaneyi. Áamá Gorixo uowárenapiŋí royí oyá d́iŋí t́ni seáyí e oimónini. O mixí ináyí Isirerene negorini.” O t́ni óí e órórí inaniro apí e nira waríná ¹⁴⁻¹⁵ Jisaso Bikwíyo re niriniri eániŋípi t́ni xixeni eŋinigini, “Saioni —Jerusaremi náni d́wí yoí bi Saonirini. Apimi ŋweáyíné siŋwí winípoi. Segí mixí ináyo dogí sipikíyo niŋweámáná iwo bariŋagi náni amipí wí náni wáyí mepani.” niriniri eániŋípi t́ni xixeni o dogí sipikí wo nimeari seáyí e nixenweari nimeámi biŋinigini. E éagi aiwi ¹⁶ axínáyí wiepisariŋowa xío yariŋípi náni “Ayí náni ría yarini?” miyaiwí majíá néra núfasáná Jisaso rixa nikíniri

niwiápinimeámi aŋínami náni niŋeyimáná eŋáná xío náni e niriniri eániŋipi náni diŋí winiri ámá ayí xíomi seáyi e numero wigíápi náni eni diŋí winiri egíawixini.

¹⁷Ámá Jisaso Rasaraso xwáripáyo wenjáná “Íwíapei.” nuriri siŋí imixaríná xío tíni e niŋwearo siŋwí winarogíáyí o éipi náni repiyí niwiéra emeariŋagía náni ¹⁸ámá epíroyí egíáyí emimí xío eŋí api náni repiyí néra waríŋagía aríá wíá eŋagi náni o tíni ói e órórí inaniro náni ugíawixini.

¹⁹Ayiánani Parisiowa re rinigíawixini, “Siŋwí winípoyi. Ámá obaxí tíni bariŋagía náni none o náni rinárwápi arige yaníwini? Siŋwí winípoyi. Oxí apixí síwí niaíwí níni omi rixa númi bariŋoi.” rinigíawixini.

Émáyi wí Jisasomi siŋwí winaniro egíá nánirini.

²⁰Ámá síá aiwá api imixarigíápi Goriŋomi seáyi e umeaniro náni úíáyí wí ámá Giriŋiyi riníŋiyíri. ²¹Ayí Piriŋomi —O wiepisariŋowa wo aŋí Betisaida riníŋí Gariri piropeniŋyio ikwíróniŋipimi dáŋorini. Ayí omi niwímearo rixiŋí re urigíawixini, “Rároxini, ‘Jisasomi siŋwí owinaneyi.’ neaimónarini.” uríagía ²²Piriŋo nuri xexírimeáo Adiruomi áwaní nurimi awaú nuri Jisasomi áwaní uríagí ²³Jisaso ámá ayo re uriníŋinigini, “Ámá imóniŋáoni seáyi e nimóniri ikínimífa náni rixa aŋwi ayorini.” nuriniri ²⁴ewayí xwiýá bí xío peníápi náni re uriníŋinigini, “Aga nepa searariŋini. Wití siyí wo urí neri xwíáyo mپیéropa nerínáyí, xegípi ropaxírini. Urí neri xwíáyo nipiérorínáyí, ná obaxí wepaxírini. ²⁵Ámá xewaniŋo nánini ayá rimixiní go go anímixininiárini. Ámá xewaniŋo nánini ayá mirimixiní ámá wíyo náni eni ayá urimixiní go go manímixiní diŋí niyimiŋí imóniŋipi tíŋo imóniniárini. ²⁶Ámá ‘Jisaso wimónariŋipi éimigini.’ yaiwariŋí go go nioni nixídíwinigini. Nioni ami gimi ŋweáámi ‘Jisaso wimónariŋipi éimigini.’ yaiwí go go xío eni e ŋweaniárini. Ámá nioni e éirixiniri nimónariŋipi yariŋí gomi gomi ápo wé íkwiaŋwíyo uŋwiráriníárini.

Jisaso xíomi pikipíríápi náni uriní nánirini.

²⁷“Agwi ríná rixa diŋí ríá nixeariŋagi ápomí píoi urimíini? ‘Ápoxini, xeaniŋí nioni nímeanípi “Miwímeapa oeni.” osimónini.’ urimíniréini? Oweoi, ríná api onímeaniri náni biŋá eŋagi náni wí e urimiméini. ²⁸‘Ápoxini, dixí yoí seáyi e imixiri eŋí sixí eániŋí joxiyápi ámáyo siwá wiri éirixini.’ rirariŋini.” ráná re eŋinigini. Aŋínami dáni xwiýá bí re rinénapariŋinigini, “Nioni emimí joxi niwíwapiyiriŋipimi dáni gí yoí rixa seáyi e nimixiri gí eŋí sixí eániŋipi siwá niwiri aiwí ámi bí tíni siwá wimíini.” rinénapariŋinigini. ²⁹Xwiýá e rinénapáagi ámá e epíroyí nero rówapigíáyí aríá e niwiro náni wí “Sa akiriwí rarini.” raríná wí “Aŋínají wo xíomi uriŋoi.” raríná ³⁰Jisaso ayí e rinariŋagía aríá niwiri re

uriñinigini, “Mañí apá nioni náni mirinénapiñoi. Seyiné diñí mopíri náni rinénapiñoi. ³¹Gorixo áamá xwíá tíyo dánjyo xwiyíá umeárini rixa aṅwi ayorini. Xwíá rirími meṅweaño —O oborini. Omi xopirári wini eni aṅwi ayorini. ³²Niiwanijoni xwíámi dáni seáyi e nimíeyoááná nioniyá diñjyo dáni áamá níni nioni tíámimi bipíríárini.” nuriri ³³xewanijomi íkíáyo niyekwiroáriríná peníápi náni diñí omópoyiniri e uríagi ³⁴ámá e epíroyí egíáyí re urigíawixini, “Negí ḡwí ikaxí eáníjyo dáni ‘Kiraiso, áamá yeáyí neayimixemeanía náni aríowayá xwíá piaxíyo dáni iwiaroníoyi rariṅwáo, aníñí íníná ḡweaníárini.’ riniñagi aría wiñwá eñagi náni joxi arige neri ‘Áamá imónijomi nipikiro íkíáyo niñwiráriro seáyi e umíeyoapíríárini.’ nearariñini? Áamá imónijoyí gorini?” uríagiá ³⁵Jisaso xewanijono wíániñí eñagi náni ewayí xwiyíá bi nuriri re uriñinigini, “Wíápi síá áríní wíyo seyiné tíñí e óniniñoi. Síá seaóriniginiri sini wíá óniñáná aṅí époyi. Áamá síá yiniñími yarigíáyí ‘Ami iyí riwarini?’ miyaiwiarigiá eñagi náni searariñini. ³⁶Wíápi sini seyiné tíni niñweari seaóniñáná wíápiyá niafíwíyínéniñí wimónipíría náni wíápimi diñí wikwírópoyi.” uriñinigini. O xwiyíá api nurárimi pñni niwíárimi nuri pñí ḡweañinigini.

Judayí obaxí Jisasomi diñí miwikwírogíá nánirini.

³⁷Judayí Jisaso wigí siṅwí tíñí e dáni emimí ayá wí wíwapiyáagi aí sini diñí miwikwíró nero “Ayí oríani?” miyaiwigíawixini. ³⁸Ayí ripi náni e egíawixini. Xwiyíá wíá rókiamoagi Aisaiayo riniño xegí Judayí náni niriri eañí ripi, “Ámináoxini, negí repiyí wiarinwápi giyí ‘Neparini.’ niyaiwiro diñí neaikwírogíárini? Oweoi. Ámináoxiniyá eñí sixí eáníñípi giyo siwá wíáná mí nómixiro niñjá imónigíárini? Oweoi.” niriri eañípi xixeni imóninía náni Judayí Jisasomi diñí miwikwírogíawixini. ³⁹⁻⁴⁰Xwiyíá ámi bi Aisaiáo niriri eañí ripi, “Áamá ayí pírániñí siṅwí winiro diñí pírániñí moro neróná saniñí nimóniro wigí íwí yarigíápi emi nimamoro ámi Gorixo tíámimi upírixiniri siṅwí upírori diñí síñániñí wimixiri eñirini.” Aisaiáo e niriri eañípi xixeni imóninía náni Judayí Jisasomi diñí miwikwíropaxí imónigíárini. ⁴¹Aisaiáo oriñá niwiniríná Gorixo urowárenapinío níkiniri ḡweañagi niwiniri náni o náni e riñirini. ⁴²Judayí náni Jisasomi diñí miwikwíroariñagiá aiwi Judayí áminá obaxí wí aí omi diñí niwikwíroro aiwi Parisiowa negí rotú aṅjyo dáni yoí emi neakwírimopírixiniri wáyí nero náni waropári niniro “Jisasomi xídariñáonirini.” miriniñíawixini. ⁴³Weyí Gorixo umeañípi náni miwimónipa neri weyí áamá umeañigíápi náni niwimóniri náni waropári niniro “Jisasomi xídariñáonirini.” miriniñíawixini.

“Nioni rariñápiimi dáni áamá níni epayónipíríárini.” uriñí nánirini.

⁴⁴Jisaso eñí tíni ráiawá niriri re riñinigini, “Nioni diñí níkwíroariñí giyí giyí nionini diñí miníkwíroariñoi. Nirowárenapiñomi eni diñí

wikwíroariŋoi. ⁴⁵Nioni siŋwí nanarigiá giyí giyí nirowárenapiŋomi eni siŋwí winariŋoi. ⁴⁶Ámá nioni diŋí nikwírófáyí aniŋí síá yiniŋe miŋweapa érixiniri xwíá tíyo wíániŋí wókímiximiniri biŋárini. ⁴⁷Nioni ámá xwíá tíyo ŋweagiáyo xwiyíá umeáriminiri mibí ámá niyoni yeáyí uyimixemeámániri biŋárini. Ayináni ámá xwiyíá nioni rariŋápi aríá niniro aí minixífdíá giyí giyo nioni wí xwiyíá umeáriŋámani. ⁴⁸Ámá nioni ríwí ninimoro xwiyíá nioni rariŋápi peayí niwianíro éfáyí woni woni xwiyíá meárinipaxípi rixa weni. Xwiyíá nioni uráná aríá minigiáyo dáni síá yopariyimi xwiyíá meárinipaxí eŋagi náni rariŋini. ⁴⁹Nioni gí diŋíyo dáni wí mirí ápo, xewaniŋo nirowárenapiŋo amípí nioni urimíápi náni sekaxí niriŋí eŋagi náni gí diŋíyo dáni rariŋámani. ⁵⁰Ápo sekaxí riŋípiimi ámá diŋí nikwíroriŋípiimi dáni diŋí niyimiŋí tígíá aniŋí íníná ŋweapíríá náni imónipaxí eŋagi náni nioni niŋíárini. Ayináni amípí nioni searariŋápi, ápo niriŋípiini searariŋárini.” uriŋinigini.

Jisaso wiepisariŋowami sikwí sosisáyo igiá weaŋí nánirini.

13 ¹Aiwá síá Aŋínajo Neamúroagoi riniŋíyi náni sini mimixipa eŋáná Jisaso xwíá tíyo píni niwíárimimi xano tfe náni yini aŋwi ayo eŋagi náni o niŋíárini. Ámá xío xegí imónigiáyo diŋí sixí nuya nibísáná xío pene náni aí nuya uŋinigini. ²Síápi tñi xío tñi wiepisariŋowa tñi aiwá api naníro náni awí neánimáná Obo re eŋinigini. Saimonomi xewaxo Isikarioti dánŋ Judaso nuri Jisaso náni miyí ouriniri diŋí niwikwírómáná eŋáná ³Jisaso xegí xano amípí níni íániŋí wiepíxíniasiní eŋagi náni niŋíá imóniri Gorixo tíámimi biŋípi náni niŋíá imóniri ámi xío tíámimi uníápi náni eni niŋíá imóniri neri náni ⁴aiwá narigie dáni niwíápinimeari xegí rapirapí e pániŋíyi nipírárimáná roariŋí wú nimeari íriŋíyo níkiŋiyinimáná ⁵iniigí pírerixí winami niwayimori wiepisariŋowami sikwí sosisáyo igiá niweáa nuri roariŋí kíkíyiniŋú tñi nikwíra nuri ⁶rixa Saimoni Pitaomi wiminiri yaríná re uriŋinigini, “Ámináoxini, joxi gí sikwíyo igiá neáminiri riariŋini?” uríagi ⁷Jisaso re uriŋinigini, “Nioni simípi náni agwi joxi majíá nimóniri aiwi ríwéná ‘E níwapiyiminiri ríá eŋinigini?’ niyaiwiri niŋíá imóniríárini.” uríagi ⁸Pitao re uriŋinigini, “Ná ríwíyo aiwi joxi gí sikwíyo wí igiá nearíá menini.” uríagi Jisaso re uriŋinigini, “Nioni dixí sikwíyo igiá mireapa nerínáyí, joxi nioni tñi nawíni kumixinipaxí mimóniŋini.” uríagi ⁹Saimoni Pitao re uriŋinigini, “Ámináoxini, sikwíyoni igiá míneapani. Gí wéyo tñi miŋíyo tñi aí igiá neai.” uríagi ¹⁰Jisaso re uriŋinigini, “Igiá eániŋí go go kíyí bi meŋagi náni sa sikwíyoni igiá eániŋipaxí imónini. Soyíné kíyí bi meŋagi aiwi noyínéni maríá.” uriŋinigini. ¹¹Xío náni miyí wurino náni niŋíá nimóniri náni “Noyínéni kíyí mayoyínemani.” uriŋinigini.

¹²Rixa sikwíyo igiá niweáa núisáná xegí rapirapí nimeari niyíniri aiwá narigie ámi éi niŋweari re uriŋinigini, “Nioni seaíápi náni diŋí

‘Ayí nání ría neaiarini?’ rimoŋoi? ¹³Soyíné ‘Nearéwapiyariŋoxiní niri-ro ‘Ámináoxiní niri-ro yarigíárini. E imóniŋáoni eŋagi nání e niniriróná xixeni nirarigíárini. ¹⁴Nioni Ámináoni imóniri searéwapiyariŋáoni imóniri eŋagi aiwi segí sikwí sosiáyo igíá seaeáini. Ayináni soyíné eni segí sikwíyo xixe igíá eánírixini. ¹⁵Nioni rixa siŋwepigí seaíwapiyáagi nání nioni seaíapa soyíné eni axípi e niga úfrixini. ¹⁶Aga nepa searariŋini. Ámá xináíniŋí nimóniri omiŋí wiiariŋíyí go xegí bosomi seáyi e wimónariŋirini? Xwiyá yaŋí wiowáriŋo eni urowáriŋomi seáyi e wimónariŋirani?” nuriri ¹⁷re uriŋinigini, “Soyíné nioni siŋwepigí seaíwapiyá api nání niŋíá nimóniro xixeni nerínáyí, yayí seainipaxí seaímeaníárini. ¹⁸Nioni noyínéni nání misearariŋini. Searípeariŋáoyíné imónigíápi nání nioni niŋíá aiwi Bikwíyo re niriniri eániŋí ripi, ‘Ámá nioni tíni aiwá nawíni narigwíso nioni xopírári nimiriri sikwí nimíeyoari sosiá neaníárini.’ niriniri eániŋípi xixeni imóníwiniginiri noyínéni searípeanárini. ¹⁹Soyíné amipí ríwíyo imóninípi imónariŋagi niwiniróná ‘Ayí oráni?’ naiwipíri nání agwi re dání amipí sini mimónipa éimi áwanŋí searariŋini. ²⁰Aga nepa searariŋini. Ámá nioni urowáriŋáyo umíminipíríá giyí giyí nioni eni nimíminariŋoi. Nioni nimíminipíríáyí nirowárenapiŋomi eni umíminariŋoi.” uriŋinigini.

“Miyí nurino Judasorini.” ínimi uriŋí nánirini.

²¹Jisaso e nuríísáná diŋí ría uxéagi siŋáni áwanŋí nuriri re uriŋinigini, “Aga nepa searariŋini. Soyíné woxi miyí nuriniŋoi.” uríagi ²²xegí wiepisariŋowa o ríó nání majíá eŋagía nání kíkímí nimóniro siŋwí nainega nuróná ²³wiepisariŋowa wo —O Jisaso xío diŋí sixí uyiŋorini. O xío tíŋí e aŋwi e éí ŋweaŋagi nání ²⁴Saimoni Pitao omi símimajíó niwiríná réniŋí uriŋinigini, “Joxi yariŋí niwiri ámá xío ríó nání áwanŋí rei.” Éniŋí uríagi ²⁵wiepisariŋo xío tíámíni nikinimónaumaná yariŋí re wiŋinigini ‘Ámináoxini, joxi ríó, ayí gorini?’ uríagi ²⁶Jisaso re uriŋinigini, “Aiwápimi múyo neagwiri wimo, ayí orini.” nurimáná aiwápi múyo neagwiri Isikarioti dánŋí Saimonomi xewaxo Judasomi míni wiŋinigini. ²⁷Míni wíáná Seteno Judasomi diŋí xixeróagi Jisaso re uriŋinigini, “Joxi erípi aŋíni ei.” uríagi aí ²⁸xío tíni aiwá narigíáwa o Judaso e oeniri urípi nání majíá nero ²⁹wí diŋí re yaiwigíawixini, “Judaso niŋwí wowí xiriŋo eŋagi nání re ría uriŋoi, ‘Aiwá Aŋíniŋí Neamúroagi ripi nání nanípi joxi bí neaii.’ ría uriŋoi? ‘Uyípeayíyo arirá wiminiri nání amipí bí míni wii.’ ría uriŋoi?” yaiwiaríná ³⁰Judasó, múyo neagwiri wípi nurápanimo áríwiyimi peyeŋinigini.

Jisaso ŋwí ikaxí siŋípi uriŋí nánirini.

³¹O rixa peyeáná Jisaso re riŋinigini, “Ámá imóniŋáoni rixa seáyi e imóníagi ámáyí siŋwí nanipíri rixa rínárinini. Nioni e éagi ninaniríná

Gorixoyá eñí sixí eáñiñipi náni eni nijjá imónipíraoi. ³²Nioni e nimóniriñipimi dáni Gorixoyá eñí eáñiñí siñáni nimónirínáyí, nioni eni seáyi e ninimixiri niniiniñoi. ³³Gí niaíwoyiné, sini soyíné tíni bi onimiápi ñweámíni. Soyíné nioni náni píá nipíría eñagi aiwi negí Judayo re uriñápa, ‘Nioni umíae soyíné eni wí upaxí menini.’ uriñápa agwi soyíné eni axípi searariñini.” nuriri ³⁴re uriñinigini, “Nioni ñwí ikaxí siñí bi osearimini. Nioni diñí sixí seayariñápa soyíné eni axípi xixe diñí sixí yinírixini. ³⁵Sewanioyíné diñí sixí xixe niyiniñáyí, áamá siñwí niseanro re seaiawipíríarini, ‘Oyá wiepisiñowaríani?’ seaiawipíríarini.” uriñinigini.

“Pitaoxini, joxi ríwí nimoríini.” uriñí nánirini.

³⁶Saimoni Pitao re uriñinigini, “Ámináoxini, joxi gimi uminiri náni nearariñini?” uríagi Jisaso re uriñinigini, “Agwi nioni ume agwi joxi wí minixídipaxí eñagi aí ríwéná joxi anani nixídiríarini.” uríagi ³⁷Pitao re uriñinigini, “Ámináoxini, pí náni ‘Agwi joxi minixídipaxíri.’ nirariñini? Joxi éí rimíniminiri náni yaríná nioni nipikirínáyí, ananirini.” uríagi ³⁸Jisaso re uriñinigini, “Joxi nepa nioni éí nimíniri náni ripikipaxoxirani? Aga nepa rirariñini, ‘Karíkarí sini ríaiwá miripa eñáná joxi biaú bi nioni náni “O náni nioni majíarini.” riríini.’ rirariñini.” uriñinigini.

“Gorixo tíñí e náni óyíniñí imóniñáonirini.” uriñí nánirini.

14 ¹Wiepisiñiñíyo “Soyíné diñí ría miseaxepani.” nuriri re uriñinigini, “Gorixomi diñí wikíroro nioni eni diñí nikwíroro érixini. ²Aní gí ápoyáyo awawá obaxí ikwíronini. Nioni soyíné náni aní wé searoárimía eñagi náni aní awawá ayí mikwíronipa neri siñwiriyí, anani áwaní searimíniri eñárin. ³Nioni nuri aní wé nisearoárimi ámi nibíri soyíné eni nioni ñweámíae nioni tíni nawíni ñweapíría náni niseairiménapimi umíarini. ⁴Óí nioni aní apimi náni umíayí náni soyíné nijíarini.” uríagi ⁵Tomaso re uriñinigini, “Ámináoxini, joxi uríe náni none majíá nerane náni arige óí uríayí náni nijjá imóniñwini?” uríagi ⁶Jisaso re uriñinigini, “Ámá ‘Gorixo tíñí e náni úimigini.’ wimónariñiñíyo náni niwanioñi óyíniñí imóniñáonirini. Amípí Gorixo náni nepa imóniñipi áamá ayo siwá wiri diñí niyimíñí imóniñipi sixí umímori yariñáonirini. Ámá wo óí wiyimi dáni ápo tíñí e náni wímeapaxímani. Nionini óí ápo tée naniyíniñí imóniñáonirini. ⁷Soyíné nioni náni ‘Oríani?’ niniaiwiwo pírániñí nijjá nimóniro siñwiriyí, gí ápo náni eni pírániñí nijjá imónanro egíarini. E niseariri aiwi agwi ríná dáni soyíné o náni nijjá nimóniro siñwí winigíarini.” uríagi ⁸Piripo re uriñinigini, “Ámináoxini, joxi ápo siwá nealáná ‘Ayí apánirini.’ neaimónarini.” uríagi ⁹Jisaso re uriñinigini, “Piripe, nioni soyíné tíni eñíná dáni emeñá aiwi

joxi nioni nání sini pírániŋí nijá mimónipa reŋini? Ámá nioni siŋwí naná giyí giyí ápomí eni winíáyí eŋagi nání joxi pí nání ‘Ápo eni siwá neaii.’ nirariŋini? ¹⁰ Ápo xewaxoni tíni nawíni imónirai xewaxoni ápo tíni nawíni imónirai eŋagwíi nání joxi sini ‘O xano tíni axowaúriani?’ niniaiwiri diŋí minikwíroariŋí reŋini? Xwiyá nioni searariŋápi gí diŋíyo dání searariŋámani. Amipí nioni yariŋápi eni ápo, nioni tíni nawíni imónigwífoyá diŋíyo dání yariŋámini. ¹¹ Xwiyá nioni re seariápi, ‘Ápo nioni tíni nawíni imónirai nioni ápo tíni nawíni imónirai eŋwii.’ seariápi nání ‘Neparini.’ niyaiwiro diŋí nikwírópoyi. ‘E oyaneyi.’ miseaimónipa nerínáyí, emimí amipí nioni niseaŋwapiya baríná soyíné siŋwí winigíápi nánini ‘Neparini.’ niyaiwiro diŋí nikwírópoyi. ¹² Aga nepa searariŋini. Nioni diŋí nikwíroarigíá giyí giyí amipí nioni seaŋwapiyariŋápi eni epíríárini. Oyi, nioni ápo tfe umíá eŋagi nání amipí nioni seaŋwapiyariŋápi wiári seáyi e imóniŋípi aí epíríárini. ¹³ Xewaxoni eŋí eániŋí ápoyá ámáyo siwá niwiriŋípi dání ‘Ápo seáyi e imóniŋoríani?’ wiawírixiniri soyíné pí pí nání ápomí rixiŋí nuriríná xegí xewaxonimi dání nuriri rixiŋí uránáyí, nioni anani xixeni niseaiimíárini. ¹⁴ Amipí ápomí rixiŋí nuriríná nionimi dání nuriri rixiŋí urfápi nioni anani niseaiimíárini.

“Nioni Kwíyí Gorixoyápi uowárimíárini.” uriŋí nánirini.

¹⁵ “Soyíné nioni diŋí sixí niniyirínáyí, nioni sekaxí seariŋápi xixeni xídipíríárini. ¹⁶ Nioni ápomí rixiŋí uráná arirá seaipaxí imóniŋí ámi wo soyíné tíni nawíni aniŋí íníná ŋweáwiniginiri segí tífamini uowárenapiníárini. ¹⁷ Kwíyí xío nání nepa imóniŋípi seaŋwapiyariŋápi nání rariŋini. Ámá xíomi diŋí miwikwíroarigíáyí kwíyí xíoyápi mí niwómixiro nijá mimónipaxí eŋagi nání arirá wiminiri eníápi umíminipaxí menini. E neri aí kwíyípi rixa soyíné tíni nawíni imóniŋagi nání api nání nijá imóniŋoi. Idáná soyíné eni niseaímeari xwioxíyo seaŋweaníárini. ¹⁸ Nioni wimiáoyínéniŋí segípi niseawárimi umíámani. Ámi soyíné tŋí e nání bimíárini. ¹⁹ Ámá nioni diŋí minikwíroarigíáyí siŋwí minanipa epíri nání aŋwi ayorini. E neri aí soyíné ámi siŋwí nanipíríárini. Nioni ámi siŋí emíá eŋagi nání soyíné eni siŋí epíríárini. ²⁰ Síá soyíné nioni ámi siŋí éaná nanipíríáyimi re niyaiwiro nijá imónipíríárini, ‘O xano tíni imóniri eŋáná none xío tíni imónirane xío none tíni imóniri eŋagwi nání xío tíni axonerini.’ niyaiwiro nijá imónipíríárini. ²¹ Ámá go go gí sekaxí rariŋápi íá nixiriri nixídirínáyí, nioni diŋí sixí niyariŋorini. Nioni diŋí sixí niyariŋí gomi gomi gí ápo diŋí sixí uyiri nioni uyiri neri niwaníŋoni nání yumí bí miwí xixeni siwá winimíárini.” uríagi ²² Judaso —Isikarioti dání Judaso maríái, wiepisiariŋowa Judasoyi riniŋí worini. O re uriŋinigini, “Ámináoxini, pí éagi nání ámá níni xwíá tíyo ŋweagíáyo siwá miwinipa neri

newaniḡoneni siwá neainiríárini?” uríagi ²³Jisaso re uriḡinigini, “Ámá go go nioni diḡí sixí niniyirínáyí, xwiyá nioni rariḡápi xídiníárini. Omi gí ápo diḡí sixí nuyiri yawawi o tíámini nibirai o tíni nawíni aniḡí ḡweaníwáriní. ²⁴Ámá nioni diḡí sixí miniyarigíáyí nioni rariḡápi xídarigíámani. Xwiyá nioni seararíná soyíné aría niarigíápi, ayí nioni gí diḡí tíni rariḡápimani. Ápo nirowárenapiḡoyá diḡí tíni rariḡápirini.” nuriri ²⁵re uriḡinigini, “Nioni sini soyíné tíni niḡwearíná amipí api náni searíini. ²⁶E neri aí ríwéná arirá seainíó —O kwíyí Gorixoyápirini. Xío ámá nioni nixídarigíáyo náni urowárenapiniápirini. Api amipí níni náni seaíwapiyíáná nioni niseara wariḡá nipini náni diḡí seaininíárini. ²⁷Nioni soyíné píni niseawiárimí nuri aiwi soyíné nioniyá diḡí tíni niwayiróniro ḡweapíríárini. Nioniyá diḡí tíni niwayiróniro ḡweapíríápi náni niriríná ámá xwía tḡyo dání wigí diḡí tíni yarigíápi náni mirariḡini. Nioniyá diḡí tíni aga niwayiróniro ḡweapíría náni imónipíríárini. Ayináni diḡí ría niseaxeri wáyí bí minípa éfrixini. ²⁸Xwiyá nioni searíá ripi, ‘Nioni píni niseawiárimí nuri ámi seyíné tíḡí e náni bimíárini.’ searíápi soyíné rixa aría níoí. Nioni ápo tíḡí e náni umi eḡagi náni soyíné nepa diḡí sixí niniyirínáyí, yayí seáyimi dáni seainiminiri éfrixini. Ápo seáyí e nimúroḡo eḡagi náni rariḡini. ²⁹Soyíné nioni searíápi xixeni imóníagi niwiniríná diḡí níkwíroro ‘Ayí o neariḡápiríani?’ yaiwiro oépyoiniri sini mimónípa éfmi searariḡini.” nuriri ³⁰re uriḡinigini, “Xwía tḡyo meḡweaḡo —O oborini. O rixa bariḡagi náni nioni soyíné tíni niḡweari ámi ayá wí searimiméini. O nioni eḡí mineániḡo eḡagi aiwi ³¹ámá xwía tḡyo dáníyí níni re niaiwíríxiniri, ‘O xanomi diḡí sixí uyiḡoríani?’ niaiwíríxiniri ápo sekaxí niriḡípi tíni xixeni oemini.” nuriri re uriḡinigini, “Re dáni niwíápnimeámi rixa owaneyi.” uriḡinigini.

“Wainí uraxí nepaxiḡí imóniḡipíniḡí imóniḡáonirini.” uriḡí nánirini.

15 ¹Jisaso ewayí xwiyá nuriri re uriḡinigini, “Wainí uraxí nepaxiḡí imóniḡípi, ayí nionirini. Wainí omiḡí xiáwo gí áporini. ²Wireḡí nionimi dáni neániri ná miwéyí níni ápo emi wiximoariḡirini. Wireḡí ná wearíḡíyí níni xwiogwí wíomi ná xwé wéwinigini o emi wiwákwímí niyárimáná mía imixáraríḡirini. ³Xwiyá nioni searariḡápimi dáni soyíné rixa míániḡí iniḡoi. ⁴Soyíné uraxí wireḡí eániḡípa axípi nioni neánírixini. E nerínáyí, nioni wireḡíniḡí axípi soyíné seaeánimíárini. Wainí míkomi wireḡí meániḡa nerínáyí, ná miwepaxí imóniḡípa soyíné eni nioni wireḡíniḡí mineániḡa nerínáyí, ná wepaxí menini. ⁵Nioni uraxí wainí míkíniḡí imóniḡáonirini. Soyíné uraxí wainí wireḡíniḡí imóniḡíoyínérini. Ámá nioni wireḡíniḡí neániḡí go go nioni xíoyá míkí imóniḡáoni eḡagi náni ná xwéniḡí wearíḡirini. Ayí ripi nánirini. Soyíné nioni píni niníwiárimí nurínáyí, amipí wí epaxí menini. ⁶Wireḡí emi móyí yeáyí yáraríḡípa ámá nioni wireḡíniḡí mineániḡa éí gomi gomi

emi móaná yeáyí yárarini. Wireñí axípini e enjáyí awí neaariri ría ikeaaráná ría nowárarini. ” nuriri 7re uriñigini, “Soyiné nioni wireñini neániri xwiýá nioniyápi xidiri nerínáyí, soyiné pí pí seaimónariñí náni ápomí rixini uráná anani seaiiníarini. ⁸ Soyiné e nero ná xwéniñí neriniñipi dání enjí sixí eáñini gí ápoyápi ámayó siwá wíáná ‘O seáyí e imóniñoríani?’ waiwipíríarini. Soyiné e neriniñipi dání eni ‘Xegí wiewisiniñí wíríani?’ wipimóniniarini. ⁹ Ápo diñí sixí niyiniñipa nioni eni diñí sixí seayini. Ayináni nioni diñí sixí seayiniñipi anini neayiwiniñiniri érixini. ¹⁰ Soyiné nioni sekaxí searíayo xixeni nixidíronáyí, nioni gí ápo sekaxí niniñipi píranini xidarini gí náni diñí sixí niyiniñipa nioni eni axipi anini soyiné diñí sixí seayimíarini. ¹¹ Diñí nífá bi onimiápi seairi yayí bi onimiápi seainiri oeniri náni miseararini. Diñí nífá niniri yayí ninariñipa soyiné eni diñí nífá ayá wí seairi yayí seainiri oeniri seararini. ¹² Sekaxí nioni rariñipi ripirini. Nioni diñí sixí seayiniñipa soyiné eni axipi xixe diñí sixí yiniñixini. ¹³ Ámá wo xegí ámayó diñí sixí nuyiríná arirá wiminiri náni upeípi diñí sixí uyarigíapi bi tni xixeni mimónini. Aga seáyí e múronini. ¹⁴ Soyiné nioni sekaxí searariñipi xixeni axipi nerónáyí, gí ámayíne imóniñoi. ¹⁵ Xináiwániñí nimóniro omiñí wiarigíáyí wigí boso ‘E emíaniri náni ría neararini?’ miyaiwí majíá imónariñí gí náni sini ‘Inókiwayíneñí imónigíoyíneñí searimiméini. Amipi ápo ninaríná aríá wiñá nipi áwaní niseairi náni ‘Gí ámayíneñí seararini. ¹⁶ Soyiné nioni íá niyamixigíamani. Ayí nioni soyiné nuro ámayó nuréwapiyiniñipi dání aiwá niyiminiñí wérixiniri íá yiyamiximí niseairi searipeañarini. Ayináni pí pí náni ápomí rixini nuriríná nionimi dání nuriri uránáyí, anani xixeni seaiiníarini. ¹⁷ Sekaxí nioni rariñipi ripirini. Aga xixe diñí sixí yiniñixini.

“Gí seaiepisariñíoyiné gí náni ámá símí tni seaipíríarini.” uriñí nánirini.

¹⁸ “Ámá xwíá tíyo enipi nánini moarigíáyí soyiné símí tni seaiariñigí niwiniríná diñí re mórixini, ‘None sini símí tni mineaipa neríná xami Jisasomi wigíarani?’ mórixini. ¹⁹ Soyiné ámá xwíá tíyo wenipi nánini moarigíáyí tni nawíni nimóniri siñwiriýí, soyiné wigíyí imónaniri éíá gí náni diñí sixí seayipaxirini. E neri aí soyiné ámá xwíá tíyo wenipi nánini moarigíáyí tni nawíni mimónipa ero ayí tni axipi mimónipa érixiniri íá yiyamiximí seairi enjá gí náni ayí símí tni seaiariñoi. ²⁰ Ewayí xwiýá nioni searíá rípi, ‘Ámá xináiniñí nimóniri omiñí wiarini go go xegí bosomi seáyí e wimónariñimani.’ searíapi náni diñí mórixini. Nioni xeaniniñí niniñirónáyí, soyiné eni xeaniniñí seaikaripíríarini. Xwiýá nioniyápi aríá niniñi niniñidíronáyí, soyinéyápi eni aríá niseairo seaxidipíríarini. ²¹ E neri aí nioni nirowárenapiñoi náni niñíá píranini

mimónipa nero nání soyíné nioni ninixídiro ‘Jisasoyáonerini.’ rariŋagía nání xeaniŋí ripi nipini seaikáripíríárini.” nuriri ²² re uriŋinigini, “Nioni nibiri xwiyíá murípa neri siŋwiriyí, wigi íwí nero nioni ríwí nimóíápi nání xwiyíá meárinipaxí imónaniri éíamani. Nioni rixa biŋá eŋagi nání ayí re wí ripaxí menini, ‘Negí eŋwápi neríná íwí miyariŋwiniri eŋwáriní.’ ripaxí menini. ²³ Ámá nioni símí tñi niariŋíáyí gí ápomí eni símí tñi wiaríŋoi. ²⁴ Nioni emimí amipí ámá eŋíná dání aiwi miwíwapiyigíá bi miwíwapiyípa neri siŋwiriyí, wigi íwí nero nioni ríwí nimóíápi nání xwiyíá meárinipaxí menini. E neri aiwi nioni emimí wíwapiyíŋápi siŋwí ninaniri aí nioni tñi gí ápo tñi eni niwawini símí tñi yeaiariŋoi. ²⁵ Ríwamiŋí nioni nání wigi ŋwí ikaxí eániŋíyo dání eániŋí ripi, ‘Míki meŋagi aiwi símí tñi nigíárini.’ niriniri eániŋípi xixeni imónini nání niariŋoi.” uriŋinigini.

²⁶ Ámi re uriŋinigini, “Arirá seainí —O Gorixoyá kwíyípirini. Api nioni ápo tñi e dání soyíné tñi e nání uowárenapimíápirini. Api kwíyí Gorixoyápi xío tñi e dání nibiri xío nání nepa imóniŋípi seaíwapiyariŋípi nání rariŋini. Api nibiríná nioni nání áwaŋí searíníárini. ²⁷ Soyíné nioni ámáyo iwamíó nuréwapiya uŋae dání nioni tñi emeagíoyíné eŋagi nání seaímeaní míkoyíné eni ámáyo nioni nání áwaŋí uripíríárini.

16 ¹ Soyíné axínáni diŋí ninikwíroero nemáná óreámioapírixiniri api nipini seariŋini. ² Ayí re seaipíríárini. Rotú aŋíyo dání segí yoí emi niseakwírímoro aiwi ríwéná xe nimóniríná ámá seapikííáyí Gorixo wimónariŋípi yariŋwiniri seapikipíríárini. ³ Ápo nání nijíá píraníŋí mimónipa ero nioni nání eni axípi e mimónipa ero nero nání api seaipíríárini. ⁴ Xwiyíá nioni searíápi, ayí ripi nání searíni. Xeaniŋí api rixa nimónaríná nioni niseara úápi nání diŋí mopíría nání searíni. Api nání iwamíó soyíné tñi emeŋwae dání áwaŋí miseariŋanigini. Sini soyíné tñi nimeri nání áwaŋí miseariŋanigini.

Kwíyípi eníápi nání uriŋí nánirini.

⁵ “Rixa niowárenapiŋo tñi e nání wariŋagi aí soyíné woxi ‘Joxi gimí nání uríni?’ minirariŋoi. ⁶ Nioni ‘Rixa numíni.’ searíagi nání soyíné íkíniŋí sipí seaiarini. ⁷ E neri aí aga nepa seariŋini, ‘Nioni soyíné tñi aniŋí re niŋwearíná arirá niseaipaxí aiwi píni niseawiárimi nuríná arirá aga seáyí e imóniŋípi seaipaxíriní.’ seariŋini. Ayí ripi nánirini. Nioni píni niseawiárimi mupa nerínáyí, arirá seainíomi —Kwíyípi nání rariŋini. Omi muowárenapiŋa epaxíriní. Nioni nurínáyí, omi soyíné tíamini uowárenapimíá eŋagi nání rariŋini. ⁸ Kwíyípi nibiríná ámá xwíá tío dáníyí re yaiwírixiniri, ‘Nene ‘íwípi, ayí apíríani?’ moariŋwápi tñi “Wé róniŋípi, ayí apíríani?” moariŋwápi tñi “Gorixo ámáyo xwiyíá numeáriríná e winíáríani?” moariŋwápi tñi apiaú api

xerjwíni moariŋwárfiani?’ yaiwírixiniri wíwapiyiniárfini. ⁹ Ayí nioni diŋí minikwíropa yariŋagía náni kwíyípi ‘fíwípi, ayí apiríani?’ oyaiwípoyiniri wíwapiyiri ¹⁰ nioni ápo tíŋí e náni yíáná o ninimíminimáná soyíné sini siŋwí ámi wí minaná eŋagi náni kwíyípi ‘Wé róniŋípi, ayí apiríani?’ eni oyaiwípoyiniri wíwapiyiri ¹¹ Gorixo obo, ámá xwíá tíyo meŋweaŋomi rixa xwiyíá umeáriŋí eŋagi náni kwíyípi ‘Gorixo xwiyíá numeáriríná e winíárfini.’ eni oyaiwípoyiniri wíwapiyiri eníárfini.” uriŋinigini.

¹² Ámi re uriŋinigini, “Nioni xwiyíá xwapí ámi bi tíni ‘Osearimini.’ nimónariŋagi aiwi agwi soyíné aría nipaxí mimóniŋoi. ¹³ E neri aiwi kwíyí amipí nepaxiŋí imóniŋípi náni rariŋípi nibiríná Gorixo náni nepáni imóniŋípi níni seáwapiyiniárfini. Api xegí diŋí tíni wí misearipa neri ápomini aría wiaríŋípi riniá eŋagi náni amipí Gorixo náni imóniŋípi xixeni searéwapiyiniárfini. Amipí ríwíyo imóniŋípi náni eni wíá searókiamoníárfini. ¹⁴ Kwíyípi xwiyíá nioni rariŋápi wíá nisearókiamori nioni náni niseariri náni nioni seáyi e nimixiníárfini. ¹⁵ Ápo nioni fániŋí niepíxíniasiŋí eŋagi náni amipí níni oyá imóniŋípi nioniyárfini. Ayináni nioni re searíni, ‘Kwíyípi nioni rariŋápi aría niniri wíá searókiamoníárfini.’ searíni.” uriŋinigini.

“Íkíniŋí sipí niseaíísaná yayí seaininiárfini.” uriŋí nánirini.

¹⁶ Jisaso ámi re uriŋinigini, “Nioni bi onimiápi soyíné tíni niŋweámáná eŋáná siŋwí nanipíríméoi. Soyíné segípi ámi bi onimiápi niŋweámáná siŋwí nanipíríárfini.” uríagi ¹⁷ wiepisariŋíyí wa re rinigíawixini, “O pí enípi náni ría re áwaní neararini, ‘Nioni bi onimiápi niŋweámáná eŋáná siŋwí nanipíríméoi. Soyíné segípi ámi bi onimiápi niŋweámáná siŋwí nanipíríárfini.’ Ripi eni ‘Ápo tíŋí e uminiri rariŋini.’ nearariŋípi pí enípi náni ría neararini?’ niriniro ¹⁸ re rinigíawixini, “ ‘Bi onimiápiyí rariŋíyí pí náni ría neararini? None xío rariŋípi náni nijíá mimóniŋwini.’ rinariŋagía ¹⁹ Jisaso awa yariŋí owianeyiniro wimónariŋagi náni nijíá nimóniri náni re uriŋinigini, “Nioni ‘Bi onimiápi niŋweámáná eŋáná siŋwí nanipíríméoi. Segípi ámi bi onimiápi niŋweámáná siŋwí nanipíríárfini.’ searíápi náni yariŋí niniro ririnariŋoi? ²⁰ Aga nepa searariŋini. Soyíné ámixiá nero ŋwí piyí wírinipíri aiwi ámá xwíá tíyo dáníyí —Ayí Gorixo tíni xepíxepá rónigíáyírfini. Ayí yayí seáyiimi dání winiŋoi. Ríná soyíné íkíniŋí sipí niseairi aiwi ríwéná diŋí níá seaininiárfini.” nuriri ²¹ ewayí xwiyíá bi ripi uriŋinigini, “Apíxíwa niaíwí nixiríná yariŋíápi náni diŋí mópoyi. Apíxí niaíwí siŋwí wanaríná ‘Riniŋí nininiri niaíwí xirimi náni rixa rínárfiani?’ niyaiwiri náni íkíniŋí sipí wiaríŋirini. E neri aí ríwéná niaíwí rixa nixirimáná niaíwí xirío náni diŋí níá winariŋagi náni riniŋí winípi náni aría ikeamoariŋirini. ²² Soyíné eni axípiŋiŋí seaimónini. Agwi soyíné íkíniŋí sipí niseairi aiwi nioni ámi siŋwí seanáná xwioxíyo diŋí níá seaininiárfini. Yayí api ámá

wí amipí wí niseaikáriro aí píri searakipaxí mimóniŋipi náni rariŋini. 23 Diŋí yayí seainé dáni nioni ámi amipí bi náni yariŋí nipírífamani. Aga nepa searariŋini. Ápomí amipí bi náni rixiŋí nuriríná nionimi dáni uránáyí, anani niseaiapiníárini. 24 Íniná dáni ápomí nionimi dáni rixiŋí muripa néra nibásaná aí diŋí níá seaininíápi bi onimiápi miseainipa éwiniginiri omi anani rixiŋí urírixini. Rixiŋí uráná seaiapiníárini.” uriniginini.

“Nioni áamá Gorixo tíni xepixepá rónigíáyo rixa xopirári wiŋárini.” uriní nánirini.

25 Ámi re uriniginini, “Xwiyá nioni niseara úápi ewayí xwiyá tíni niseariri aiwi ríwéná ewayí xwiyá tíni ámi bi misearí ápo náni siŋáni áwaní searimíáiná nimóniníárini. 26 Íná Gorixomi rixiŋí nuriríná nionimi dáni uripíríárini. Sewaniŋoyíné rixiŋí uráná anani aría seainíá eŋagi náni ‘Íná nioni soyíné náni ápomí rixiŋí seuriyimíárini.’ misearariŋini. 27 Xewaniŋo diŋí sixí niseayiri náni aría seainíárini. Soyíné nioni diŋí sixí niyiro ‘Ápo tíŋí e dáni biŋoríani?’ naiwiwo yariŋagía náni xewaniŋo diŋí sixí niseayiri náni aría seainíárini.” nuriri 28 re uriniginini, “Eŋíná nioni ápo tíni ŋweaagáoni aí o tíŋí e dáni píni niwiárimí xwíá tíyo náni biŋárini. Re niŋweaŋisáná xwíá tíyo píni niwiárimí ámi o tíŋí e náni umíni.” uríagi 29 xegí wiepisariŋowa re urigíawixini, “Ayí apirini. Agwi joxi ewayí xwiyá tíni mínearariŋini. Rixa siŋáni áwaní nearariŋini. 30 Agwi none diŋí re nisaiwirane niŋíá imóniŋwini, ‘Amipí níni náni niŋíoríani? Ámá yariŋí miwipa émi aiwi wigí xwioxíyo “Yariŋí api owimini.” yaiwiarigíápi náni niŋíá imóniŋoríani?’ nisaiwirane niŋíá imóniŋwini. Ayináni diŋí re nisaiwirane diŋí rikwíroariŋwini, ‘Joxi Gorixo tíŋí e dáni biŋoxirini.’ rikwíroariŋwini.” uríagía 31 Jisaso re uriniginini, “Agwi soyíné diŋí rinikwíroariŋoi? 32 Soyíné xidíxidowárá seaíáná nioni nigípi píni niniwiárimí segí aŋími náni xixegíni umipíríná rixa aŋwi e neri rixa imónini. Soyíné nioni píni niniwiárimí núagía aí ápo diŋí nikikayonagi náni nioni nigípi ŋweapaxímani. 33 Soyíné ayá síwí misearó ‘O tíni ikárininŋwáoneríani?’ niyaiwiniro kikiá érixiniri xwiyá nioni niseara bíápi searíárini. Soyíné xwíá tíyo ŋweaŋáná áamá Gorixo tíni xepixepá rónigíáýí xeaniŋí seaikáripíríá eŋagi aiwi nioni ayo rixa xopirári wíá eŋagi náni diŋí sixí níniro ŋweárixini.” uriniginini.

Wiepisariŋíyo náni rixiŋí wuriyiŋipi nánirini.

17 1 Jisaso xwiyá api nura núsáná aŋínami náni siŋwí nanániri re riŋiginini, “Ápoxini, nimónini náni rixa rínáriní. Dixí riwaxoni eŋí sixí eániŋí joxiyápi ámayo síwá wimi náni joxi ‘O áamá niyoni seáyi e imóniŋoríani?’ oniaiwípoyniri níírixini. 2 Ámá joxiyá diŋíyo dáni nioni níxídarigíáyo diŋí niyimíŋí imóniŋipi sixí umímopaxo imóníwiniginiri

‘Ámá náni náni néné tíŋoxi imónei.’ niriŋí eŋagi náni rirariŋini. ³Ámá ripini neriŋípimi dáni diŋí niyimiŋí imóniŋípi tígiáyí imónariŋiáriní. Joxi náni ‘Ŋwáá imóniŋo, ayí Gorixorini. Ámi wo miŋweanini.’ diŋí rimoro Jisasi Kiraisoni, joxi nirowárenapiŋoni náni ‘Nepa ayí orini.’ diŋí nimoro yariŋíáyí, ayí diŋí niyimiŋípi imónariŋiáriní. ⁴Joxi o e éwiniŋiniri niriŋípi xixeni nipini niyáriríná eŋí sixí eániŋí joxiyápi niwíwapiyiriŋípimi dáni seáyi e joxi imóniŋípi ámá xwíá tíyo dánŋyo siwániŋí wíáriní. ⁵Ápoxini nioni e éá eŋagi náni xámi xwíá riri sini mimónipa eŋími joxi tíni niŋwearíná níkiniri ŋweaagápi ‘Ámi nioni tíni niŋwearíná nioni tíni nawíni seáyi e nimóniri axípi oikínini.’ osimónini.” nuriri ⁶re uriŋinigini, “Ámá xwíá tíyo dánŋí joxiyá diŋí tíni nioni níxídarigiáyí joxi imóniŋípi náni xixeni níjía oimóniŋoyiniri wíwapiyiriŋáriní. Ayí ámá dixíyí nioni niapiŋíyí náni rirariŋini. Dixí xwiyá nioni niriŋípiimi pírániŋí níxída nibiro ⁷rixa níjía re imóniŋoi, ‘Amípí joxi íániŋí niepíxíniasiniŋí nioni niriri yariŋápi nipini joxi niapiŋíriní.’ Níjía e imóniŋoi. ⁸Xwiyá joxi niriŋípi xewaniŋoni rixa uríá eŋagi náni níjía e imóniŋoi. Xwiyá nioniyápi aríá niniróná diŋí ninikwíroro xixeni re nisaiwiro níjía imóniŋoi, ‘Gorixo tíámíni biŋorini.’ nisaiwiro ‘Gorixo urowárenapiŋoríani?’ naiwiáriŋoi.” nuriri ⁹re uriŋinigini, “Ámá xwíá tíyo dánŋí ápoxi tíni xepixepá rónigiáyo arirá owiniri yariŋí misariŋini. Ámá joxiyá diŋí tíni diŋí níkwíroarigiáyí dixí imóniŋagi náni yariŋí siariŋini. ¹⁰Amípí ámá aí nioniyáyí ayí joxiyá imónini. Amípí ámá aí joxiyáyí eni ayí nioniyá imónini. Ayí diŋí ninikwíroriŋípimi dáni ámáyo réniŋí urariŋoi, ‘Seáyi e imóniŋo, ayí orini.’ urariŋoi. ¹¹Nioni joxi tíámíni bimi eŋagi náni xwíáyo re bi tíni sini ŋweámiméini. E neri aí ámá rowa sini xwíá tíyo re ŋweapíríá eŋagi náni ápoxini, —Joxi siyikwí míniŋí imóniŋoxirini. Joxi dixí eŋí eániŋípi —Eŋí eániŋí joxi neámixowáriŋípi náni rariŋini. Api tíni pírániŋí uméirixini. Yawawi nawíni imóniŋwípa ayí eni axípi nawíni imónipíríá náni pírániŋí uméirixiniri rirariŋini. ¹²Nioni awa tíni emearíná eŋí sixí eániŋí joxi neámixowáriŋípi tíni níméra níbiri awíniŋí numearóá baríná awa wo miyorírinipa nemáná aiwi Bikwíyo dáni ríwamiŋí eániŋípi xixeni imónini náni awa wonini xewaniŋo neriŋípimi dáni yoríriniminiri yarini. ¹³Agwi nioni joxi tíŋí e náni bímíini. E neri aí diŋí níjía nioni ninariŋípa awa eni bí onímiápi miwini xwé wíwiniŋiniri sini xwíá tíyo niŋwearíná nioni nira wariŋápi rirariŋini.” nuriri ¹⁴re uriŋinigini, “Nioni ámá ápoxi diŋí rikwíroariŋíyo xwiyá joxiyápi uriŋá eŋagi náni ámá xwíá tíyo dánŋíyí ayo símí tíni wiariŋoi. Nioni xwíá tíyo dánŋoni mimónipa eŋápa awa eni xwíá tíyo dánŋiniŋí mimóniŋagiá náni símí tíni wiariŋoi. ¹⁵Awami joxi xwíá tíyo dáni owirimeaniri mirirariŋini. Sipí wikáranigo xwiríá miwikixepa eníá náni joxi pírániŋí méwiniŋiniri rirariŋini. ¹⁶Nioni xwíá tíyo dánŋoni mimónipa eŋápa awa eni xwíá tíyo dánŋiniŋí

mimónipa eḡagía náni áamá xwíá tíyo dánjýí t́ni axýí mimóniḡoi. ¹⁷Xwiyá joxiyápi aga nepáni imóniḡagi náni áamá rowa joxi simónariḡipi náni xixeni kumixinipíri náni xwiyá api nuréwapiyiriḡipimi dáni píranijí imixírixini. ¹⁸Joxi xwíayo náni úwiniginiri nirowárenapiḡipa xamiḡoni eni awami urowáriḡárini. ¹⁹Joxi áamáyí náni wiíwiniginiri nirowárenapiḡipi t́ni xixeni niíwanḡoni owiiminiri náni okumixinimini. Áamá rowa eni joxi e éfrixiniri simónariḡipi náni okumixinipoyiniri náni joxi wiíwiniginiri nirowárenapiḡipi t́ni xixeni owiimini.” nuriri ²⁰re uriḡiniginini, “Nioni awa nánini rixijí mirirariḡini. Awa uréwapiyíáná diḡí níkwírófáyí náni eni ápoxini rirariḡini. ²¹Ayí níni axýíniḡí imónipíría náni yariḡí siariḡini. ‘Ápoxi nioni t́ni imóniri nioni joxi t́ni imóniri egwípa ayí eni yawawi t́ni nawíni oimónipoyi.’ nimónarini. Áamá níni diḡí ninikwíro ‘Gorixo urowárenapiḡagi weapiḡoríani?’ niaiwírixiniri ‘Áamá tíyí axýíniḡí oimónipoyi.’ nimónarini. ²²Eḡí sixí eániḡí joxi neámixowáriḡipi awa eni yawawi axowawi imóniḡwípa axowániḡí oimónipoyiniri náni weámixowáriḡárini. ²³Awa aga xixeni axowániḡí oimónipoyiniri nioni awa t́ni nawíni imóniri joxi nioni t́ni nawíni imóniri eḡwini. Áamá níni re niyaiwiro nijíá imónipíría náni e imóniḡwini, ‘Gorixo omi urowárenapiḡárini. Omi diḡí sixí uyiḡipa awami eni diḡí sixí uyini.’ niyaiwiro nijíá imónipíría náni e imóniḡwini.” nuriri ²⁴re uriḡiniginini, “Ápoxini, áamá joxiyá diḡí t́ni níxídarigíá rowa nioni xámi joxi t́ni niḡwearná níkíniri ḡweaagápa ámi níkíniri ḡweaḡáná siḡwí nanipíría náni nioni ḡweámíáé awa eni nioni t́ni ḡweárixiniri náni nimónarini. Ápoxiniyá diḡí t́ni níkíniri ḡweaagápi náni rirariḡini. Ayí ripi nánirini. Xwíá rirí sini mimóniḡáná diḡí sixí niyiḡoxi eḡagi náni rariḡini. ²⁵Ápoxini, joxi wé róniḡoxirini. Joxi náni áamá xwíá tíyo dánjýí nijíá xixeni mimónipa eḡagía aiwi nioni joxi náni nijíá xixeni imóniḡini. Rowa eni joxi náni ‘O omi urowárenapiḡoríani?’ nisaiwiro nijíá imóniḡoi. ²⁶Joxi imóniḡipi náni awami rixa niwíwapiyiri wíá urókiamonárinini. Diḡí joxi sixí niyariḡipa awa eni wíniyo axípi uyipíría náni ámi bi t́ni wíwapiyimíni. Nioni eni awa t́ni nawíni imónimía náni ámi bi t́ni wíwapiyimíni.” uriḡiniginini.

Jisasomi íá xirigíá nánirini.

18 ¹Gorixomi rixijí e nurárimo xegí wiepisariḡowa t́ni nuro írirenj́ xegí yoi Kidironiyi riniḡipámi níxemoro omiḡí ojikwí bi oriwámi dáni iniḡipi t́e rémogíawixini. ²Judasó, Jisaso náni miyí urino eni Jisaso t́ni xegí wiepisariḡowa t́ni íníná e awí eánayarigíá eḡagi náni omiḡí ojikwí api náni nijíárinini. ³O émányí porisí wami awí eari anj́ ridiyowá yarigíwámi awí mearoarigíáwami eni Parisiowa t́ni apaxipániḡí imóniḡigá xwéowa t́ḡí e dáni awí eari nemáná awa ramixí t́ni uyíwí t́ni mixínápi t́ni níxirimáná ojikwípimi náni nuro rémóáná ⁴Jisaso xíomi wikáripírípi nípiini náni rixa

nijjá nimóniri náni aŋwi e nuri re uriŋinigini, “Soyíné go náni pía yariŋoi?” uríagi ⁵ awa re urigíawixini, “Nasareti dájí Jisaso náni pía yariŋwini.” uríagiá Judaso xío náni pasániŋí umeariŋo awa tñi roŋáná Jisaso “Ayí nionirini.” uriŋinigini. ⁶ “Ayí nionirini.” uráná awa re egíawixini. Óí nero ríwiminají úfáyí xwíáyo pikínimeagiawixini. ⁷ Xwíáyo píkínimeagiá o ámi re uriŋinigini, “Go náni pía yariŋoi?” uríagi awa “Nasareti dájí Jisaso náni pía yariŋwini.” uríagiá ⁸ Jisaso “ ‘Ayí nionirini.’ rixa searíanigini. Ayináni nioni náni pía ninirínáyí, áamá rowayí xe oúpoyiniri siŋwí winípoi.” uriŋinigini. ⁹ Xámi Gorixomi re uríipi, “Áamá joxiyá diŋí tñi xídírixiniri niapiŋíyí womi miwioríriŋarini.” uríipi xixeni imónini náni e uriŋinigini. ¹⁰ E uraríná Saimoni Pitao kirá bá nimixeari re eŋinigini. Mírí nuri apaxípániŋí imónigiáwami seáyi e wimóniŋoyá omiŋí wiariŋomi —O xegí yoí Marikasoyi riniŋorini. Omi miŋí rómíniri éiyí píri noyíkiri aría miŋí wirípieaŋinigini. ¹¹ Píri noyíkiri aría miŋí wirípieáagi Jisaso Pitaomi mixí re uriŋinigini, “Kirápá xegí aŋýo ámi upíroi. Xeaniŋí kapixíniŋí ápo o oniniri niapariŋipi ‘Minipa oeni.’ risimónarini?” uriŋinigini.

Jisasomi Anaso tñí e náni niméra nuro wárigiá nánirini.

¹² Émáyi porisowa tñi wigi seáyi e wimóniŋo tñi Judayí aŋí ridiyowá yarigiáwami awí mearoariŋiáwa tñi Jisasomi ía nixero gwí nijiro ¹³ xámi Anaso tñí e náni niméra ugíawixini. Anasomi xineagwo Kaiapasorini. Xwiogwí omi o apaxípániŋí imónigiáwa seáyi e wimóniŋorini. ¹⁴ Xámi xegí Judayo re uriŋo, ayí orini, “ ‘Negí áamá náni pepírixiniri ayí ríniŋí meaaniri éíapi náni áamá ná woni ríniŋí api nimeari niperínáyí, ananirini.’ nimónarini.” uriŋorini.

Pitao “Oyá niepisariŋí wonimani.” riŋí nánirini.

¹⁵ Omi xineagwo, Anasoyi riniŋo tñí e náni Jisasomi niméra waríná Saimoni Pitao tñi wiepisariŋíyí ámi wo tñi awaú Jisasomi ríwíyo nixída nuri apaxípániŋí imónigiáwami seáyi e wimóniŋoyá aŋí tñí e nírémómáná wiepisariŋí wíomi apaxípániŋí imónigiáwami seáyi e wimóniŋo símimaŋí oyá nijjá eŋagi náni o Jisaso tñi aŋí ákiŋáyo ínimi niápáwiri ¹⁶ Pitao sini bíariwámimi íwí e roŋagi náni nuri apixí ákiŋá íwíyimi awí roariŋími Pitao náni nurimo nipeyari niwirimeámi íwiaparíná ¹⁷ apixí ákiŋá íwíyimi awí roariŋí Pitaomi re uriŋinigini, “Joxi eni áamá royá wiepisariŋí woxi menirani?” uríagi o “Nionimani.” nurimi niápáwiri ¹⁸ xináíwániŋí nimóniro omiŋí yarigiáyí tñi aŋí ridiyowá yarigiáwami awí mearoariŋiáwa tñi e nírówapiro imiŋí rariŋagi náni ríá nikeámáná ríá imónaríná Pitao eni ríá oimónimíniri aŋwi e nuri awa tñi nawíni nírori ríá imónariŋagini.

Anaso Jisasomi yariŋí niwia uŋí nánirini.

¹⁹ Apaxípániŋí imónigiáwami seáyi e wimóniŋo Jisasoyá wiepisariŋíyí náni yariŋí wiri xwíyíá á máyo uréwapiyariŋipi náni yariŋí wiri

éagi ²⁰ Jisaso re urijinigini, “Nioni áamá niyoni siñánije dáni uréwapiyariñarini. Nioni gíni gíná nuréwapiyiríná rotú añíyo dánirani, añí ridiyowá yarigíwámi dánirani, sa negí Judayí awí eánarigie dáni uréwapiyariñá enagi náni ²¹ joxi pí náni nioni yariñí niariñini. Nioni xwiyía uraríná arfá niarigíáyo yariñí wi. Pí pí urariñápi náni ayí anani nijífarini.” uráná ²² añí ridiyowá yarigíwámi awí mearoarigíáyí wo añwi e éf nirómáná Jisasomi wé tñi nupikákwi re urijinigini, “Apaxípániñí imónigíáwami seáyi e wimóniñomi e nuriríná ‘Apáni urariñini.’ risimónarini?” uríagi ²³ Jisaso re urijinigini, “Nioni xejwíni niriri sipíni rarínáyí, xejwí ríápi náni áwaní nearei. Nioni naní rarínáyí, pí náni iwaní neariñini?” uríagi ²⁴ Anaso Jisaso sini gwí jiniñáná apaxípániñí imónigíáwami seáyi e wimóniñí ámi wo, Kaiapasoyi riniño tñí e náni wiowárijinigini.

Pitao “Oyá niepisariñí wonimani.” ámi urijí nánirini.

²⁵ Saimoni Pitao ría ikeáarinije éf nirómáná ría imónaríná e rówapigíáyí wí re urigíawixini, “Joxi ení xegí wiepisariñíyí woxi menirani?” uríagía aí o “Oweoi.” nuriri “Nioni ení wonimani.” uríagi ²⁶ Apaxípániñí imónigíáwami seáyi e wimóniñoyá xináíwániñí nimóniro omiñí wiariñíyí wo —O Pitao arfá miñí wirípieañomi xexirímeá worini. O ení Pitaomi re urijinigini, “Nioni ojikwíyo Jisaso tñi nawíni rojagi siñwí raníáoxi menirani?” uríagi ²⁷ Pitao ámi “Oweoi.” uráná re enijinigini. Karíkarí ríaiwá riñinigini.

Jisasomi Pairato tñí e náni wiowárigíá nánirini.

²⁸ Wíá móniñími Kaiapaso tñí e dáni émáyí gapimanowayá añiwámi náni Jisasomi niméra nuro aiwi Judayí ámináowa none nipáwiriñípimi dáni xwiríá ikixenáná aiwá Añínajo Neamúroagoi riniñíyí náni minipaxí imónaniginiri mipáwí yariñagía ²⁹ gapimaní pirimiá imóniño —O émáyí wo xegí yoí Pairatoyi riniñorini. O awa tñí e náni nfiwapiiri re urijinigini, “Omi pí xwiyía náni xwiyía mearaniro nimeámi bariñoi?” uríagi ³⁰ awa re urigíawixini, “Ámá ro íwí miyariño enánáyí, joxi tñe náni nimeámi baniri éwámani.” uríagía ³¹ Pairato re urijinigini, “Sewaniñoyíné nimeámi nuro segí ñwí ikaxí rariñípi tñi xixeni xwiyía umearípoi.” uríagi Judayowa re urigíawixini, “Émáoyíné íwí yarigíáyo opikípoiñiri siñwí neanarigíámani.” urigíawixini. ³² Xwiyía Jisaso xámi re urijípi, “Nioni ninipikiríná e niniro nipikípiñíarini.” urijípi xixeni imónini náni Judayowa Pairatomi xwiyía e urigíawixini. ³³ Pairato ámi gapimanowa wigí añí iwámi nipáwímáná “Jisaso obini.” niriri re urijinigini, “Joxi mixí ináyí Judayíáoxirani?” uríagi ³⁴ Jisaso re urijinigini, “Dixí diñí tñi rinirariñini? Wa riríagía rinirariñini?” uríagi ³⁵ Pairato re urijinigini, “Nioni dixí Judayí wonirani? Dixí gwí axírí

imónigíáyí t́ni apaxípániḡi imónigíá xwéowa t́ni joxi nirimeámi nibiro nioni t́ḡi re riwáraoi. Joxi pí éagi nimeámi ribáoi?” uríagi ³⁶Jisaso re uriniginini, “Ámá mixí ináyí nimóniro xwíá t́yo meḡweaarigíáyí yapi mimóninini. Nioni xwíá t́yo dánḡiyí mixí ináyí imóníwiniginiri minirípeagíá eḡagi náni xwíá t́yo meḡweaarigíáyinini mimóninini. Mixí ináyí xwíá t́yo dánḡi woni nimóniri siḡwiriyí, gí Judayowa íá minixiripa oépayiniri gí siminḡi nínarigíáyí mixí níwiipaxírini. E níriri aí mixí ináyí nioni imóninḡapi xwíá t́yo dánḡimani.” uríagi ³⁷Pairato re uriniginini, “Ayináni ‘Joxi mixí ináyí woxirini.’ nimónarini.” uríagi Jisaso re uriniginini, “ ‘Mixí ináyoxirini.’ joxi xixeni nírarinini. Nioni nepaxinḡi imóninḡipi ámayo áwanḡi uríimiginiri gí ókí nixiriri xwíá t́yo náni biri eḡárini. Ámá nepaxinḡi imóninḡipi xídarigíá giyí giyí ńni nioni aríá niarigíárini.” uríagi ³⁸Pairato re uriniginini, “Nepaxinḡi imóninḡipi pírinini?” uriniginini.

Pairato “Anani yekwiroáripoyi.” riḡi nánirini.

E nurimo Judayí ńni t́ḡi e náni nipeyari re uriniginini, “O xwiyíá meárinipaxí bi rarinagi aríá miwíni. ³⁹E neri aí xwiogwí ayí ayo síá Anḡinajo Neamúroagoi rarigíayi náni aiwá imixaríná ámá gwí ḡweanḡi wo seawáriarinḡarini. ‘Judayenyá mixí ináyí imóninḡo oneawárinini.’ riseaimónarini?” uríagi ⁴⁰ayí xwamiání níwiéra nuro “Omi mineawáripáni. Barabasomi —O ámayá amipí pikioráparinḡi worini. Omi neawárii.” nura eḡawixini.

19 ¹Ayí Pairatomi e urarinagíá náni porisowa Jisasomi nimeámi nuro sikwíá nearo ragí píri nuyikíárimáná ²ópiyá eḡinḡinḡi imóninḡi wirí níkiḡiyimáná mixí ináyí aminanḡwininḡi imóninḡi minḡyio díkinarigíápa minḡyio udíkiáriro rapirapí ayíá riḡi mixí ináyí yínarigíá wú nimearo omi uyíriro niyárimáná ³xío t́ḡi e anḡi e uro “Ámináoxini, Judayíyá mixí ináyoxirini.” uriro wé upikákwiro niyayimáná eḡaná ⁴Pairato ámi nipeyari re uriniginini, “Aríá nípoyi. ‘Xwiyíá meárinipaxí bi mirarinagi aríá níwiri nimeámi ríwiaparini?’ oniaiwípayiniri nimeámi íwiaparinini.” nuriri ⁵Jisaso, ópiyá eḡinḡinḡi imóninḡiri udíkiáriro rapirapí ayíá riḡi uyíriro éo íwiapáná Pairato ámá e awí neáárimáná roḡíayo re uriniginini, “Ámá royoi. Siḡwí winípayi.” uríagi ⁶Apaxípániḡi imónigíá xwéowa t́ni anḡi ridiyowá yarigíiwámi awí mearoarigíáwa t́ni omi siḡwí níwiniróná xwamiání níwiro “Íkíáyo yekwiroáripoyi. Íkíáyo yekwiroáripoyi.” uríagía Pairato re uriniginini, “Nioni o xwiyíá meárinipaxí bi mirarinagi aríá níwiri náni sewaninḡoyiné nimeáa nuro yekwiroáripoyi.” uríagi ⁷Judayowa re urigíawixini, “O náni negí ḡwí ikaxí eániḡyio dáni bi rinini. Ayo dáni ‘Xe siḡi ouni.’ ripaxí mimónini. O ‘Niaíwí Gorixoyáonirini.’ rininḡi eḡagi náni xe siḡi ouniri siḡwí winipaxí menini. Xe pikoi.” uríagía ⁸Pairato xwiyíá api aríá níwiríná wáyí

ámi bi tñi niwiniri ⁹ámi gapimanowayá anjwámi nipáwiri Jisasomi yariñi re uriñinigini, “Joxi gimi dánjoxirini?” uríagi aí Jiaso xwiýá bi muriñinigini. ¹⁰Xwiýá bi murariñagi niwiniri náni re uriñinigini, “Joxi xwiýá bi miniri riyariñini? ‘O íkiáyo niyekwiroáriri níkwewáriri mepa epaxorini.’ riniaiwariñini? Gí diñi tñi nriyekwiroáriríná nriyekwiroáripaxírini. Niriwáriríná niriwáripaxírini.” uríagi ¹¹Jiaso re uriñinigini, “Erami ñweaño api xe oimóniri siñwí miranipa neri siñwiriýí, joxiyá diñi tñi wí e ripaxí imóniminiri éímani. Ayináni sipi joxi nirípi xwé neri aiwi nioni joxi tie náni niwiowáríoyápi aga seáyi e imónini.” uríagi ¹²Pairato aría e niwiri náni omi wáriminiri éfyí Judayí xwamiání niwiyairo re urigíawixini, “Joxi ámá romi níkweari niwárirínáyí, émáýínéyá mixí ináyí Sisao tñi nikumixiniri emeariñi woxi mimóniñini. Ámá go go xewaniño náni ‘Mixí ináyonirini.’ nirinirínáyí, Sisaomi mamówáriminiri yariñi eñagi náni rariñini.” urariñagiá ¹³Pairato xwiýá api aría e niwiri náni Jisasomi nimeámi wáí e nipeyari sñá tñi wáí imixiniñe —Ayí Xibiruyí pñé tñi Gabatai rininjerini. E íkwiañwí xwirixí numeríná éí ñweaarigíánami éí niñweari ¹⁴—Sfá ayi Judayí Anñajo Múronñyi náni aiwá imixárarigíáyirini. Ayimi sogwí rixa áwinimi ñweáminiri eñáná Pairato re uriñinigini, “Siñwí winípoi. Segí mixí ináyo riworini.” uríagi ¹⁵Judayí xwamiání re wigíawixini “Xe nimeáa xe nimeáa oupoi. Nimeáa nuro íkiáyo yekwiroáripoyi.” urariñagiá Pairato re uriñinigini, “Segí mixí ináyo ‘Íkiáyo oyekwiroárini.’ riseaimónarini?” uríagi apaxípániñi imónigíá xwéowa re urigíawixini, “Negí mixí ináyí ámi wo menini. Émáýínéyá mixí ináyí Sisao eni negorini.” uríagiá ¹⁶Pairato Jisasomi oyekwiroáripoyiniri porisowami tñi wiowárinigini.

Jisasomi yekwiroárigíá nánirini.

¹⁷Jisasomi añi apimi dáni niméra nuróná xewaniño íkiá yoxáipá xwañwí níkwónimi nuri wí e xwíá yoí bi Miñi Gixweái riniñe —Xibiruyí pñé Gorigotai rininjerini. E nirémoro ¹⁸e Jisasomi yekwiroárigíawixini. Niyekwiroáriróná Jiaso áwini e eñáná ámá waú eni midimidáni yekwiroárigíawixini.

¹⁹Pairato ríwamiñi bi re niriri neari yoxáipámi seáyi e pírauninigini, “Nasareti dání Jiaso, Judayí mixí ináyorini.” ríwamiñi e neari píraúagi ²⁰Jisasomi yekwiroárie añi apimi ná jíami mimóniñagi náni Judayí obaxí nipuróná ríwamiñipi —Api nearíná Xibiruyí pñé tñi eari Romiyí pñé tñi eari Girikiyí pñé tñi eari eñipirini. Api íá roariñagiá náni ²¹Apaxípániñi imónigíá seáyi e imónigíáwa Pairatomi re urigíawixini, “Joxi ríwamiñi re niriri meapani, ‘Judayí mixí ináyorini.’ niriri meapani. Sa re niriri eai, ‘Xewaniño “Judayí mixí ináyonirini.” rininjerini.’ niriri eai.” uríagiá aí ²²Pairato re uriñinigini, “Nioni eáapi xe oeánini.” uriñinigini.

²³Porisowa Jisasomi rixa niyekwiroárimáná rapirapí amipí o yíninípi yaní nimeró biaú biaú nitiro nowani xixeni nimearo aí xegí soríá gwí bí mikiwéninú —Ú nimixiríná axúni imixárigírini. ²⁴Ú nání re rinigíawixini, “None maxepa oyaneyi. Áwini e nitimáná go go meanirífeninoiniri sárú oyaneyi.” rinigíawixini. Bikwíyo xwiýá nírini eáníníní ripi, “Rapirapí nioni seáyi e yínariníyá yaní niniro gí soríá meapíri nání go go meanirífeninoiniri sárú egíawixini.” ²⁵niriniri eánínínípi xixeni imónini nání porisowa e egíawixini.

Jisasomi xinái tñi xinisimái tñi Kiriopasomi xiepí Mariaí tñi Magidara dájí Mariaí tñi íwa íkiá yoxái Jisasomi yekwiroárininípámi aŋwi e roŋáná ²⁶Jisaso xegí xinái e roŋagi niwiniri wiepisariní xfo diŋí sixí uyinjo eni aŋwi e roŋagi niwiniri xináimi re uriniginini, “Ineyi, dixí íwo iworini.” nirimáná ²⁷wiepisariníomi re uriniginini, “Dixí rinái iyírini.” uríagi wiepisariní sía ayimi dání xegí aŋýo nání píraniní numéra uniginini.

Jisaso pení nánirini.

²⁸E nurárimo nijá re nimóniríná “Xano e éwiniginiri nirinípi rixa nipini yáriní.” nijá e nimóniríná Bikwíyo xío nání niriniri eáníníní nipini xixeni oimóniri re riniginini, “Inígí nání ninarini.” ráná ²⁹sixí wainí mixí yarinípi magwí íníní wá weŋagi nání wa írikwí bí nimearo inígí wainí apimi igíá neámáná xisopíyi rininí wegwíániní imóniníwámi nikiroárimáná xegí maŋí tñí e wimixíagi ³⁰Jisaso wainí mixí yarinípi ninimáná “Rixa pixwínigoi.” níriri miŋí warí niniri diŋí niyámiga uniginini.

Porisowa Jisasomi miwíyo ayiníwí ikirogíá nánirini.

³¹Sía Jisasomi yekwiroárigíyá —Ayí aŋínajo Judayo múroní nání aiwá amipí píraniní nimixiro tarigíáyirini. Ayi rixa sía óráná Sabaríá aga seáyi e imóniníyi nimónini eŋagi nání porisowa Jisasomi tñi awaúmi tñi awí meŋweaŋáná sabaríá imóniniginiri Judayí ámináowa nuro Pairatomi re urigíawixini, “Apaxí mé diŋí simigwíá niyiniri opépyiniri sikwíyo eŋí píri jeápoyi. Nipéáná wigí warápi oyoaneyiniri eŋí píri jeápoyi.” uríagiá ³²porisowa nuro midimidáni yekwiroárigíwámi sikwíyo píri nijearo aí ³³Jisaso yekwiroárininje weniní éáyí winigíawixini. O rixa nipéagi niwiniro nání xegí sikwí píri mijeapa nero aí ³⁴porisí wo wákwirixá tñi ayiníwí ikiróáná axíná inígí tñi ragí tñi íwiapiniginini. ³⁵Ámá Porisowa e yaríná siníwí winarónáoni áwaní níríná xixeni aga nepa rináriní. Nioni rarinápi nijá xixeni e nimóniri nání seyíné “Neparini.” yaiwiro diŋí ikwíroro érixiniri áwaní seararinini. ³⁶Bikwíyo re niriniri eánínínípi xixeni imónini nání porisowa omi e wigíawixini, “Xegí eŋí bí píri jeapírámani.” ³⁷Bikwíyo ámi bí re niriniri eánínínípi, “Ayiníwí ikiroárigíomi siníwí winipírírini.” rininípi eni xixeni e imóniniginini.

Jisasomi xwíáyo weyárigiá nánirini.

³⁸E niyárimáná eǵáná áamá wo —O Arimatia dánǵi Josepoyi riniǵorini. O Jisasoyá wiepisariǵiyí wo aí Judayí ámináowami wáyí niwiri nání ínimi xídariǵorini. O Pairato tíǵi e nání nuri “Jisaso piyo omeámini.” uráná Pairato xe omeaniri siǵwí winǵagi o nuri piyomi xwíá weyáriminiri nání nimeámi úaná ³⁹ámá ámi wo —Xegí yoí Nikodimasoyi riniǵorini. O xámi áríwiyimi Jisaso tíni xwiýiá rinigiǵorini. O eni nibiri íkiá díá biaú —Bi muríyi riniǵipi tíni bi earosíyi riniǵipi tíni apiaúrini. Apiaú xámi nawíni níá meǵiápiáú xegí saǵí 30 kiro imóniǵipirini. Api tíni piyomi xópé oeminiri nimeámi nibiri ⁴⁰awaú piyomi nimeari Judayí wigi áamá piyí nitiriná yarigiápa rapirapíyo rígwirígwí niroríná íkiá díá díǵi naǵi eariǵipi tíni xópé niyárimáná ⁴¹nimeámi omiǵi aǵwi e iniǵipimi nání —Omiǵi api Jisasomi yekwiroárte dání aǵwi e eǵipirini. Síǵá ói sini áamá mitarigiáyi tíǵipirini. Omiǵi apimi nání nimeáa nuri ⁴²síá ayi Sabariá nání Judayí amipí píranǵi nimixiro tarigiáyi imóniǵagi nání síǵá ói aǵwi e iniǵiyimi nání nimeámi nuri e tiǵisixini.

Jisaso wiápínimeǵi nánirini.

20 ¹Sadéyo wíá móniǵimi sini síá yiniǵáná Magidara dánǵi Mariaí síǵá óiyimi Jisaso weǵe nání nuri wenǵi éyí winiǵinigini. Síǵá xwé óiyimi éí rárarinǵo sini mipíróní rixa wí e weǵagi niwinimi ²aǵni nuri Saimoni Pitaomi tíni wiepisiǵi wío, xío díǵi sixí uyiǵomi tíni niwímeari re uriǵinigini, “Ámináomi rixa nexwearo gimi ría tíawixini? Newané majíarini.” uríagi ³Pitao tíni wiepisiǵi wío tíni aǵi e píni niwiárimi xwáripáyo nání nuri ⁴aǵaǵni nuri wío Pitaomi nimúrori xwáripáyo xámi nirémori ⁵niríkwíniri ínimi wenǵi yáníyí winiǵinigini. Rapirapí Jisasomi xopixopí róniǵúni weǵagi niwiniri aiwi ínimi mipáwí wenǵi yaríná ⁶Saimoni Pitao eni ríwíyo nibiri bíariwámíni éí nirómáná wenǵi mé xwáripáyo ínimi nipáwiri wenǵi éyí winiǵinigini. Rapirapí xopixopí róniǵúni weǵagi niwiniri ⁷rapirapí miǵíyo xopixopí rogíú wíu tíni nawíni miwé xegí wí e níkiǵorini weǵagi winaríná ⁸wiepisiǵi wío, xámi xwáripáyo rémóo eni nipáwiri rapirapí e imóniǵagi niwiniri “Neparini.” niyaiwiri díǵi wikwíroǵinigini. ⁹Íná awaú Bikwíyo Jisaso ámi xwáripáyo dání niwiápínimeaníapi nání niriniri eániǵipi nání sini píranǵi díǵi mimopa neri majíá neri nání ¹⁰ámi eǵi aǵi e nání ugíisixini.

Magidara dánǵi Mariaí Jisasomi siǵwí winiǵi nánirini.

¹¹Mariaí xwáripá tíǵi e aǵwi e nirómáná ǵwí neari e neríná xwáripáyo ínimi niríkwíniri wenǵi yáníyí winiǵinigini. ¹²Jisaso tiǵte aǵinaǵi waú rapirapí apíá weǵi niyínimáná wío miǵi tiǵiámíni ǵweari wío síkwí tiǵiámíni ǵweari eǵagi wináná ¹³awaú Mariaími re urigiǵisixini,

“Ineyi, jíxi pí nání ɣwí eaariɣini?” uríagí í re uriɣiniɣini, “Gí Ámináo nexweari tée nání níni majíá eɣagi nání ɣwí eaariɣini.” nurimáná ¹⁴nikinimóniri weniɣí éyí winiɣiniɣini. Jisaso daiwo roɣagi niwiniri aiwi mí miwómixiɣiniɣini. ¹⁵Mí miwómixiagi Jisaso re uriɣiniɣini, “Ineyi, pí nání jíxi ɣwí eaariɣini? Go nání pía yariɣini?” uríagi Mariaí omiɣí xiáwo nírariniri re uriɣiniɣini, “Ápoxini, joxi piyomi nimeámi nuri wí e tírá oɣwiriyi áwaní nirei. Níni nuri nimeari nimeámi umíni.” uríagi ¹⁶Jisaso “Mariaíxini!” uríagi í nikinimóniri Xibiruyí píné tíni Rabonaiyi —Api “Nearéwapiyarinoxini.” níríná rarigiápirini. E uríagi ¹⁷Jisaso re uriɣiniɣini, “Nioni siní gí ápo tée nání mipeyiá eɣagi nání jíxi íá minixepani. Jíxi nuri áma nioni gí nírixímeá imónigiáyo re urei, ‘O re riɣoi, “Nioni gí ápo Gorixo tée nání peyarini. O seyíne eni segí ápo Gorixorini.” riɣoi.’ urémeai.” uríagi ¹⁸Magidara dání Mariaí nuri xegí wiepisiɣíyo áwaní re urémeaɣiniɣini, “Níni Ámináomi rixa siɣwí winíni. Xíó nírípi, ayí apirini. Ayí apirini.” nura uɣiniɣini.

Xegí wiepisiɣowa xíomi siɣwí winigiá nánirini.

¹⁹Sadéyo síá axíyimi síápi tíni wiepisiɣowa Judayí ámináowa nání wáyí nero nání aɣí wígi ɣweagúiwámi ówaní xaíwí niyárimáná ɣweaɣáná re eɣiniɣini. Jisaso awami áwini e nírónapiri re uriɣiniɣini, “ ‘Gorixoyá diɣí tíni niwayiróniro oɣweápoi.’ nimónarini.” nurimáná re eɣiniɣini. ²⁰Wé nírí ogíúkaú siwá wiri miwí wákwirixá tíni ikirogíáyi siwá wiri éagi wiepisiɣowa Jisaso ámi siɣí eɣagi siɣwí niwiniro nání diɣí nífá winaríná ²¹ámi re uriɣiniɣini, “ ‘Soyíne Gorixoyá diɣí tíni niwayiróniro oɣweápoi.’ nimónarini. Ápo nioni xwíá tíyo nirowárenapiɣipa nioni eni soyíne searowárarini.” nurimáná ²²awami pírámi imimí niwiowáririri re uriɣiniɣini, “Kwíyí Gorixoyápi numíminiro api tíni nawíni emérixini. ²³Soyíne áma íwí yariɣíápi yokwarimí nerínáyí, ayí Gorixo eni yokwarimí wiilarini. Soyíne yokwarimí miwiipa nerínáyí, ayí Gorixo eni yokwarimí miwiilarinini.” uriɣiniɣini.

Tomaso Jisasomi siɣwí winiɣí nánirini.

²⁴Wiepisiɣowa wo, Tomaso —O wiepisiɣí wé wúkaú sikwí waú imónigiáwa worini. Xegí yoi ámi bi Didimisorini. O miɣweaɣáná wía Jisaso wiwanijowamini wímeái eɣagi nání ²⁵Tomasomi re urigiáwixini, “None Ámináomi rixa siɣwí winíwini.” uríagiá aí o re uriɣiniɣini, “Nioni wéyo nírí ogíáyaú miwinipa eri nírí ogíáyaúmi wé miwíxímopa eri miwí wákwirixá tíni ikirogíáyimi gí wé miwíxímopa eri nerínáyí, diɣí wí ‘Nepa orini.’ niyaiwiri wikwírómiméini.” uriɣiniɣini. ²⁶Síá wé wíumi dání waú wo nórimáná eɣáná ámi xegí wiepisiɣowa aɣíyo ínimi ɣweaɣáná Tomaso eni wía tíni nerimeániro ɣweaɣáná Jisaso aɣí ówaní niyárinijagi aiwi awami áwini e nírónapimáná re uriɣiniɣini,

“ ‘Gorixoyá dñj tñi niwayiróniro oñweápoi.’ nimónarini.” nurimáná ²⁷Tomasomi re uriñinigini, “Dixí wé símí re ninimixénapi ri gí wéyo siñwí nanei. Dixí wé re ninimixénapi ri gí miwíyo niwíxímoi. Sini dñj minikwíró mepani. Aga dñj níkwíroi.” uríagi ²⁸Tomaso re uriñinigini, “Joxi gí Ámináoxirini. Gí Ŋwíáoxirini.” uríagi ²⁹Jisaso re uriñinigini, “Joxi siñwí ninaniri náni rixa ‘Neparini.’ niyaiwiri dñj rinikwíróini? Ámá nioni siñwí minanipa nero aí ‘Neparini.’ niyaiwiro dñj níkwírófáyí yayí winiñyírini.” uriñinigini.

“Bikwí ripi ámáyí dñj wikwírórixiniri eánini.” uriñi nánirini.

³⁰Jisaso emimí ámi ayá wí wiepisariñowa siñwí anigíe dáni enj aí api náni bikwí ripimi ríwamiñj bi meánini. ³¹E neri aí seyíné Jisasomi dñj wikwíro “O Kiraiso, ámá yeáyí neayimixemeanía náni Gorixoyá dñj tñi aríowayá xwíá piaxíyo dáni iwiaroníoyi rariñwáorfani?” wiaiwiro “Gorixoyá xewaxorfani?” wiaiwiro érixiniri ríwamiñj ripi niriniri eánini. Omi dñj níwikwíroriñjipimi dáni dñj niyimiñj imóniñjpi tígíáyí imónírixiniri niriniri eánini.

Wiepisiñj wé wíúmi dájí waú ámi Jisasomi siñwí winigíá nánirini.

21 ¹Jisaso e néisáná xegí wiepisiñowami ipí Taibiriasiyi riniñjwá —Xegí yoí bi Gaririyi riniñjwárinini. Awá riwoñe ámi siñáni siwá niwiniríná ripi eñinigini. ²Saimoni Pitao tñi Tomaso, Didimasoyi riniño tñi Gariri piropenisíyo añj yoí Kena dájí Nataniero tñi Sebediomi xewaxowáú tñi wiepisiñj ámi waú tñi awa nerimeániro nawíni niñwearóná ³Saimoni Pitao re uriñinigini, “Nioni ubení ipíyo mamówárimimi umíini.” uríagi awa re urigíawixini, “None eni joxi tñi waníwini.” nuriro nipeyero ewéyo nípixemoániro síá ayimi áríwiyimimi peyí náni néra nuro aiwi simí egíawixini.

⁴Rixa sogwí xemónapimimiri yariñj tñi Jisaso nibiri ipí imañjápá tñi roñagi aiwi xegí wiepisiñowa omi mí miwómixí éagía ⁵Jisaso re uriñinigini, “Niaíwíyíné, segí ubení mamówárarigíáyo peyí íá miminipa reñoi?” uráná awa “Oweoi.” uríagía ⁶o re uriñinigini, “Ubení ewé námimi mamówáráná peyí bi mininiñjoi.” uríagi o ríipi tñi xixeni yaríná re eñinigini. Peyí xwé obaxí ayá wí miníagi náni mimixepaxí wimóniñjini. ⁷Mimixepaxí wimóníagi wiepisiñj Jisaso dñj sixí uyiño Pitaomi re uriñinigini, “E nearío negí Ámináorini.” uríagi Saimoni Pitao aríá e niwiri Jisasomi xámi owímeáminiri xegí rapirapí seáyi e yínariñú —Ú niwirárimáná yariñjúrini. Ú nimeari niyínimáná ipíyo nimawiri xeamoñinigini. ⁸Ipiyo nimawiri xeamóagi aí wiepisiñj wía ipí imañjápá tñj e añwi e sa 100 mita imóniñjagi náni ewépami peyí ubení magwí miníñjú ú tñi nimixeáa nibiro ⁹imañjápami niwiékínimearo weníñj éíáyí winigíawixini. Ríá nikeánimáná peyí bi ríkwamiñjyo weri bisíkeríá

bi eni weri eṅagi winaríná ¹⁰Jisaso re uriṅinigini, “Peyí soyínéya ubeníyo miníṅpi bi nimeámi yapípoyi.” uríagi ¹¹Saimoni Pitao ewéyo nipixemoániri ubení peyí magwí mininú imañpá tée nání nimixeáa biṅinigini. Peyí xwérixani 153 mininṅagi aiwi ubení ú wí maríkininṅagi wininṅinigini.

¹²Jisaso re uriṅinigini, “Soyíné aṅwi e nibiro aiwá nípoyi.” uríagi xegí wiepisiṅowa omi rixa mí niwómixiro “Negí Ámináorini.” niwiaiwiro nání wo yariṅí “Goxirini?” wipaxí mimónipa yaríná ¹³Jisaso ríá wearinṅe aṅwi e nuri bisíkeriá nimeari yaṅí niwia nuri peyí eni axípi e niwia uṅinigini. ¹⁴Jisaso xwáripáyo dání niwiápinimeámáná wiepisiṅowami xámi biaú siwá niwinimáná ámi siwá wininṅí bi apirini.

Pitaomi “Nioniyáyo pírániṅí uméirixini.” uriṅí nánirini.

¹⁵Rixa aiwá ninimi Jisaso niwiápinimeari Saimoni Pitaomi re uriṅinigini, “Jonomi xewaxo Saimonoxini, joxi diṅí sixí niniyiríná diṅí sixí ámá rowa niyigíápmi wiárí nimúrori riniyiniṅini?” uríagi o re uriṅinigini, “Oyi, Ámináoxini, nioni diṅí sixí risinṅápi nání joxi nijíárini.” uríagi o re uriṅinigini, “Sipisipí miá nimeríná aiwá wiarigíápa joxi ámá nioni tífámini bíáyo axípi neri pírániṅí uréwapiyíirixini.” uriṅinigini. ¹⁶Jisaso ámi bi nuriri re uriṅinigini, “Jonomi xewaxo Saimonoxini, joxi diṅí sixí riniyiniṅini? Miniyiniṅí reṅini?” uríagi o “Oyi, Ámináoxini, nioni diṅí sixí risinṅápi nání joxi nijíárini.” uríagi Jisaso “Ámá sipisipí awí mearoarigíápa joxi axípi neri ámá nioni gí imóninṅíyo pírániṅí uméirixini.” uriṅinigini. ¹⁷Jisaso ámi bi nuriri re uriṅinigini, “Jonomi xewaxo Saimonoxini, joxi diṅí sixí riniyiniṅini? Miniyiniṅí reṅini?” uríagi Pitao Jisaso rixa biaú bi “Joxi diṅí sixí riniyiniṅini?” uríṅpi nání diṅí sipí niwiniri re uriṅinigini, “Ámináoxini, amipí níni nání joxi nijíoxirini. Nioni diṅí sixí riyinṅápi nání eni nijíoxirini.” uríagi Jisaso re uriṅinigini, “Sipisipí aiwá wiarigíápa joxi eni ámá nioni nixídarigíáyo axípi neri pírániṅí uréwapiyíirixini. ¹⁸Aga nepa rirarinṅini. Joxi sini íwí sikiṅí neríná jiwaniṅoxi arerixí niyíniri dixí simónífámini wagírini. E neri aí joxi rixa xweyaṅí neríná dixí wé wúkaú wimixáná ámá wí gwí niríjoro joxi ‘Mupa oemini.’ yaiwiarinṅimini nimeáa rupiríárini.” uriṅinigini. ¹⁹Wiepisiṅowa re oyaiwípoyiniri, “Pitao peníápi nání ría neararini? O e neri niṅeriniṅipimi dání seáyi e Gorixo imóninṅípi nání siwá neainíárani? Oyi.” oyaiwípoyiniri e uriṅinigini. E nurimáná re uriṅinigini, “Joxi nixídei.” uriṅinigini.

Jisaso wiepisiṅí xío diṅí sixí uyiṅo nání riṅpi nánirini.

²⁰Pitao níkinimóniri wiepisiṅí Jisaso diṅí sixí uyiṅo —O xámi nerimeánimáná aiwápi niniróná Jisaso tífámini níkinimónnauri yariṅí re wiṅorini, “Ámináoxini, miyí rurino gorini?” uriṅorini. O awaúmi númi

bariŋagi niwiniri ²¹Jisasomi re uriŋinigini, “Ámináoxini, áamá romi eni pí wipíríáríani?” uríagi ²²Jisaso re uriŋinigini, “O nioni ámi aŋínami dáni weapimíáíná nání xe ŋweáwiniginiri ninimónirínáyí, ayí diŋí joxiyá meŋagi nání pí nání nirariŋini? Jiwanioŋoxini sa nixídei.” uriŋinigini.

²³Ayináni áamá Gorioxoyá imónigíáyí ripi rinimegíárini, “Wiepisiŋí o wí niperfámani.” rinimegíá aiwi Jisaso “Joxi niperfámani.” wí murí ripini uriŋinigini, “O nioni ámi weapimíáíná nání xe ŋweáwiniginiri ninimónirínáyí, ayí diŋí joxiyá meŋagi nání pí nání nirariŋini?” uriŋinigini. ²⁴O Jisaso wiepisiŋí Pitaomi e uriŋorini. O amipí api nání áwaŋí niriri ríwamiŋí eaŋorini. Nene o nání nijíá re imóniŋwini, “O áwaŋí riŋípi nepáni rinini.” nijíá e imóniŋwini.

²⁵Amipí Jisaso eŋí ámi obaxí ayá wí eni eŋagi aiwi nioni re nimónarini, “O eŋípi nipini nání bikwíyo ríwamiŋí pírániŋí nearínáyí, xwíá tíyo bikwí api déropaxírini.” nimónarini.